

1

BIBLIOTECA NAZ.  
Vittorio Emanuele III

XXIV

D

43

NAPOLI

*L. 26. 41.*



XXIV

8

4-3









2

# LE PHILOSOPHE CHRESTIEN.



A PARIS,  
Chez FRANCOIS TARGA, au  
premier pillier de la grand Salle du Pallais  
deuant la Chappelle au Soleil d'or.

---


M. D. C. XXXIX.

*Auec Priuilege du Roy, & Approbation.*

AD  
A V T H O R E M

- 1 En maximo *dans rara Lumen de Deo*
- 2 Ipsoque *narrans de Deo laudem sacram.*

T. Bill.



# ADVERTISSEMENT

## AV LECTEUR.



CE Discours ne peut tomber qu'entre les mains de trois sortes de gens, qui sont fidels, impies, ou indifferents. Les premiers y trouveront beaucoup de consolation, & les deux autres assés d'instruction pour changer de party. Je te demande vn esprit de iustice & d'equité: & pour ne point alterer ton iugement, ie te celle mon nom & ma condition. Je me suis attaché à la qualité d'un homme de Cour, tel qu'est celuy qui en a esté la cause & le motif. Luy seul est tesmoing des heures, & du peu de temps que i'y ay employé. Je n'auois pour lors autre pen-

## ADVERTISSEMENT

sée que de le satsfaire, & comme il est d'excellent esprit , releuer ses doutes en beaucoup d'endroits par les mesmes raisons qui auoient ébranlé son opinion. Si i'eusse creu t'en faire part, ie n'aurois pas espargné ta robe , ny ta profession. Mes amis me l'arachent des mains par violence, pour te le donner. Ils sont trop honnestes gens pour me laisser vne mauuaise opinion de cét ouurage , apres la bonne estime qu'ils en ont conçuë. La pieté y a plus de part que la doctrine, & la naifueté que l'eloquence. Si ie donne d'abord quelque credit à la raison, ce n'est qu'en qualité de seruant de la foy, qui de verité parle vn peu haut en l'absence de sa Maistresse, mais qui n'en abusera pas. Elle sçaura bien se taire en sa presence, & garder l'honneur & le respect qu'elle luy doit. Je sçay bien que ie luy fais prendre vn vol audelà de sa portée, & que de si hauts misteres ne doi-

uent pas estre souillés entre ses mains; mais sçache qu'elle ne s'esleue, qu'autant que ses forces luy peuuent permettre. Il luy suffit de t'en entretenir a sa mode; de te monstrier au doigt le chemin le plus seur, & te faire voir clairement, qu'il n'y a pour toy dans le monde autre voye de salut, que le sentier qui nous est marqué par la Croix de celuy dont nous portons le nom si indignement. Si tu en fais ton profit, i'ay tout ce que ie desire. Ie te remercie des à present de ta louange, & t'en quitte de bon cœur; comme ie n'ay pas dessein de faire grand estat de ton mespris. Si tu n'es pas raisonnable, ie n'entreprends pas de te guerir: Si tu es ignorant, mon Discours ne t'est pas propre, il est trop releué pour toy. La verité à ie ne sçay quoy de libre, qu'on ne peut appeller ny lasche ny glorieux. Ne t'estonne pas de ma franchise, ie ne te puis entretenir que de mes sentimens.

ADVERTISEMENT AV LECTEUR.  
Qu'il te suffise que ie n'ay d'autre but que  
la gloire de Dieu , qui seul cognoist , &  
nos cœurs & nos intentions.



## APPROBATION.

N Ous soubsignés Docteurs en Theologie de la  
Faculté de Paris, certifions à tous ceux qu'il  
appartiendra que nous auons leu & examiné vn cer-  
tain liure intitulé: *Le Philosophe Chrestien*, auquel nous  
n'auons rien trouué de contraire à la Foy Catholi-  
que, Apostolique & Romaine, ny aux bonnes mœurs,  
en tesmoin dequoy nous auons signé les presentes,  
le quatriesme Iuin mil six cens trente-huict.

DE FLAVIGNY, FLEVRY.

TABLE





# TABLE

## DES SECTIONS CON-

tenuës au present Liure.

### SECTION PREMIERE.



*A raison naturelle s'accommode facilement avec les plus hauts mysteres de la Foy.* pag. 1.

### SECTION DEUXIESME.

*Que l'homme, & tout ce qu'il y a de creatures vivantes ont esté créées, & que le monde a eu commencement.* pag. 2.

DE LA DIFFERENCE QV'IL Y A  
entre Dieu, la Nature, & le Monde,

### SECTION III.

#### PREMIERE PARTIE.

*Que l'ignorance est la mere de l'idolatrie, & que c'est elle-mesme encore qui a fait croire aux impies du temps, que Dieu, la Nature, & le Monde, estoient la mesme chose.* pag. 5.

# T A B L E.

## SECONDE PARTIE.

*Le monde , est tout ce qui paroist de sensible. La Nature qui l'anime, est ce beau jour , duquel Dieu est le Pere, & le veritable Soleil. p. 9.*

## SECTION QVATRIESME.

Du mystere de la Trinité.

## PREMIERE PARTIE.

*Que l'ordre de la Creation & les trois grands estages de la Nature, nous donnent une grande lumiere du Mystere de la Trinité. pag. 13.*

## SECONDE PARTIE.

*Il n'y a point de si petit corps dans la Nature qui dans l'unité de son sujet n'ait trois principes distincts, qui correspondent au pourtraict sur lequel ils ont esté copiés. pag. 19.*

## TROISIESME PARTIE.

*Que l'homme est le plus precieux des ouvrages de Dieu : qu'il est cette boiste de Pandore qui renferme l'extrait de ce qu'il y a de plus riche dans les Cieux. pag. 21.*

# TABLE.

## QUATRIESME PARTIE.

*Que le raisonnement ou le syllogisme est l'Image  
& la figure de l'ame : & partant que nous  
pouuons certainement inferer qu'elle est trine  
en l'unité de son essence.* pag. 22.

## CINQVIESME PARTIE.

*Que ces trois termes, estre, cognoistre, & aymer,  
sont distincts, & communs à l'ame de l'homme,  
& à la Diuinité.* pag. 26.

## SIXIESME PARTIE.

*Comme en l'ame de l'homme ce que nous appel-  
lons estre & cognoissance , resignent entre les  
mains de l'amour tout leur pouuoir. De mesme  
il semble qu'à l'esgard des personnes Diuines,  
l'amour par un priuilege special , fait tous les  
grands coups d'estat en la creation , conduite  
& consommation du monde.* pag. 30.

## SEPTIESME PARTIE.

*Il n'est pas insques à l'ordre & vicissitude con-  
tinuelle de la generation des choses qui ne se  
mesle de nous discourir du Mystere de la  
Trinité.* pag. 33.

# TABLE.

## SECTION CINQVIESME.

De la Religion Chrestienne.

### PREMIERE PARTIE.

*La creature doit honorer son Createur. Donc il faut une Religion: mais de toutes celles qui sont en usage parmy les hommes, il n'y a que la Chrestienne, qui seule porte la marque & le caractere de la Divinité.* pag. 35.

### PARTIE DEUXIESME.

*Que l'humilité est le fondement de la Religion Chrestienne, & le seul moyen pour s'approcher de la cognoissance de Dieu.* pag. 35.

### TROISIESME PARTIE.

*Que la Bible a son esprit, duquel il faut estre animé pour l'intelligence de la Sainte Ecriture.* pag. 43.

## SECTION SIXIESME.

De l'Incarnation.

*Qu'il ne repugne point à la raison, qu'en la ple-*

## T A B L E.

*nitude des temps Dieu se soit incarné au Ventre de la Sainte Vierge.* pag. 44.

### SECTION SEPTIESME.

Du mystere de la Croix.

#### P R E M I E R E P A R T I E.

*Que l'homme eust esté immortel s'il fust demeuré dans le Paradis terrestre: & pourquoy il est deuenu mortel, en ayant esté chassé.* pag. 47.

#### P A R T I E D E V X I E S M E.

*Qu'il n'y auoit que Dieu qui pût reestablishir le genre-humain : & qu'au Mystere de la Passion, la Diuinité a tousiours esté impassible.* pag. 50.

### SECTION HVICTIESME.

De l'Eucharistie.

#### P A R T I E P R E M I E R E.

*Que le Saint Sacrement nous estoit figuré par l'Arche d'Alliance, & qu'il n'est pas permis indifferemment à toutes personnes d'y porter la main.* pag. 53.

# T A B L E.

## PARTIE DEVXIESME.

*De mesme que l'humanité ne pouuoit de soy pretendre aucune part à la gloire de Dieu, sans l'union de la Diuinité. Il est pareillement impossible que l'homme s'unisse à Dieu, que par le moyen de l'humanité de Iesus-Christ, & la participation réelle de sa chair & de son sang.*

*pag. 55.*

## PARTIE TROISIESME.

*Qu'il n'y a aucune repugnance en la Transsubstantiation : soit de la part de Dieu, soit de la part de la Nature : & partant qu'elle est necessaire.*

*pag. 59.*

## SECTION NEVFVIESME.

*De la Resurrection.*

## PARTIE PREMIERE.

*Que la Religion suppose une loy : que celui qui y contrenient, & celui qui l'observe, ne doiuent pas estre traités de la mesme sorte : & partant qu'il doit y auoir une autre vie, puis-que en celle-cy les gens de bien sont opprimés, & les meschans au contraire gorgés de toutes sortes de biens.*

*pag. 65.*

# T A B L E.

## PARTIE DEUXIESME.

*Que la matiere qui entre en la composition de l'homme, peut estre vitrifiée & rendue aussi transparente, & durable que le cristal: Il n'y a donc point de repugnance de sa part que l'homme ne puisse ressusciter.* pag.67.

## PARTIE TROISIEME.

*Qu'en la Resurrection le vice & la vertu s'esleveront contre nous, et nous accableront de reproches, de nous estre portés en toutes choses, contre leurs sages conseils.* pag.71.

## SECTION DIXIESME.

De l'immortalité de l'Ame.

## PARTIE PREMIERE.

*La malice des Tyrans a fait tous ses efforts pour se persuader que nostre Ame estoit mortelle, & se mettre par ce moyen aucinement à couuert du chastiment de Dieu.* pag.73.

## SECONDE PARTIE.

*Le desir de l'immortalité que Dieu a insepara-*

## T A B L E.

*blement attaché à l'ame de l'homme est une  
preuve indubitable de l'estat glorieux & im-  
muable qui luy est promis.* pag. 75.

### PARTIE TROISIESME.

*L'ame de l'homme est une substance Spirituelle,  
incapable de corruption, & partant immor-  
telle.* pag. 79.

### QVATRIESME PARTIE.

*Que l'amour de Dieu particulier à l'ame de  
l'homme, entre toutes les creatures, doit ren-  
dre Dieu mortel comme nous, ou l'ame doit  
estre immortelle.* pag. 83.

### PARTIE CINQVIESME.

*Ceux qui cognoissent le mieux les forces de la rai-  
son, scauent bien qu'elles sont si foibles en tou-  
tes choses qu'il ne s'y faut pas fier.* pag. 86.

### SECTION ONZIESME.

De la Prouidence.

### PARTIE PREMIERE.

*Que les moyens dont la Prouidence Diuine se sert  
pour*



## T A B L E.

*pour acheminer toutes choses à son but, sont  
directement opposés à la conduite & Proui-  
dence des hommes.* pag. 88.

### PARTIE DEUXIESME.

*Que Dieu s'est formé le dessein d'une sainte  
Cité, que les tribulations sont les artisans &  
manœuvres, qui trauaillent à ses gages, &  
que les gens de bien sont les pierres, & les ma-  
teriaux dont il veut former les plus superbes  
Palais qu'il y desseigne.* pag. 94.

### PARTIE TROISIESME.

*Que la tribulation est un Rosier duquel l'amour  
de Dieu arrache toutes les espines, & ne nous  
presente que les Roses.* pag. 100.

### QUATRIESME PARTIE.

*Que les afflictions sont necessaires à l'homme de  
bien, & qu'une vie tranquille & assaisonnée  
de toutes sortes de felicitez mondaines, est une  
marque de reprobation.* pag. 109.

# T A B L E.

## SECTION DOVZIESME.

De la Liberté.  
PARTIE PREMIERE.

*Que de toutes les choses que Dieu a faiçtes pour sa gloire, il n'y en a pas vne qui la releue dauantage, & la rende plus anguste que la liberté de l'homme.* pag. 115.

PARTIE DEUXIESME.

De la Liberté.

*Dieu est iuste & tout connoissant, il s'ensuit donc qu'il preuoit nostre salut où nostre perte de toute eternité, & que cette prescience infaillible ne blesse point nostre liberté.* pag. 120.

PARTIE TROISIESME.

De la Liberté.

*La liberté de l'homme se trouue assaillie & combatuë par la violence des obiects qui l'environnent : mais elle ne peut estre vaincuë sans son consentement.* pag. 125.

PARTIE QUATRIESME.

*Il n'y a pas vne de toutes les choses qui nous violentent, dont l'Empire soit plus absolu que le*

## T A B L E.

*temperament , lors principalement qu'il est chaud & sec & qu'il approche le plus du dernier degré de cette constitution. pag. 127.*

### CINQVIESME PARTIE.

*Quoy qu'on vueille dire de l'Eloquence , qu'elle conduise les hommes ainsi que bon luy semble comme des troupeaux, qu'elle les mene a la breche , & les empoisonne d'un certain mépris de leur sang & de leur vie. si est-ce qu'elle n'a point d'autre pouuoir sur nous que celuy qu'elle emprunte de nostre consentement. pag. 134.*

### SIXIESME PARTIE.

*Ce n'est pas sans raison que les Poëtes ont soumis les Dieux à l'obeissance de l'Amour, puis qu'il attaque cette partie diuine qui est en nous, & que par des artifices merueilleux il surprend quelquefois les plus saincts mouuements de nos volontés. pag 139.*

### SEPTIESME PARTIE.

*Le consentement vniuersel des Philosophes & l'autorité que les loix s'acquierent dans les Republicques, nous enseignent qu'il n'est rien de si libre que la volonté de l'homme. p. 145.*

# TABLE.

## SECTION TREIZIESME.

### Du Concours.

*Le Concours de Dieu ne violente point nostre liberté. Avec les choses nécessaires, il opere nécessairement. Avec les naturelles, naturellement, & librement avec celles que nous appelons libres.* pag. 147.

### De la Prescience.

*Il est certain que la Prescience de Dieu est infail-  
lible, mais ceux qui ne la peuvent accorder avec  
nostre liberté, ne cognoissent pas les forces & les  
vertus de l'une & de l'autre.* pag. 152.

## SECTION QUATORZIESME.

### De la Predestination.

### PARTIE PREMIERE.

*La Predestination est la dernière retraite des en-  
nemis de nostre liberté, mais estant bien enten-  
due, ils demeureront sans deffences & seront  
contraints de changer de party.* pag. 175.

## T A B L E.

### SECONDE PARTIE.

*Que la Tredestination ne procede que du seul merite de nos actions, & que nos crimes sont les auteurs & les iuges de nostre condemnation.* pag. 162.

### TROISIESME PARTIE.

*La misericorde de Dieu se porte quelquefois iusques au point d'esleuer au Trosne de sa gloire qui bon luy semble, sans aucun merite preueu: mais il n'en condamne iamais pas-un que la multitude des crimes n'ait forcé sa iustice de le punir.* pag. 167.

### SECTION DERNIERE.

#### De la Raïson & de la Foy. PREMIERE PARTIE.

*Qu'il y a pareille difference entre la Raïson & la Foy, qu'entre la Lune & le Soleil: & qu'il se faut seruir de la raïson comme d'une chandelle, ou de la clarté de la Lune pour affermir une mauuaise veüe.* pag. 173.

#### SECONDE PARTIE.

*Qu'il est ordinaire à Dieu de se seruir des choses les plus foibles pour en faire les plus grandes merueilles.* pag. 176.

# T A B L E.

## PARTIE TROISIÈME.

*Que pour bien iuger des différentes conditions, il les faut esprouver: & que la plupart des hommes abusent des richesses de l'esprit, comme des biens de fortune.* pag. 179.

## QUATRIÈME PARTIE.

*Que les estoiles sont plus brillantes auprès du Soleil, que les meilleurs esprits de nos libertins, n'ont d'éclat auprès des Saints Peres de l'Eglise: & que ces grands personnages, par la consideration de l'intérêt le plus aduantageux, ont suivi le meilleur party.*

## CINQUIÈME PARTIE.

*Qu'entre les hommes il y a trois sortes d'esprits: dont les premiers & les derniers sont tousjours d'accord. Les impies sont du moyen ordre, partant incapables d'obeir n'y de commander,* pag. 185.

## PARTIE SIXIÈME.

*Que la Foy à ses beautés & ses charmes, & que l'impie ne peut cognoistre l'estat paisible de*

# T A B L E.

*l'ame du Juste.* pag. 189.

## PARTIE SEPTIESME.

*Que Dieu à plus cheri, les pecheurs convertis que  
les autres : & que la raison enfin nous doit con-  
signer entre les mains de la foy.* pag. 193.



*Extraict du Priuilege du Roy.*

**L**E Roy par les Lettres de Priuilege données Chaillot le neufuiesme iour de Iuillet 1638. signées VIGNERON, & scellées du grand sceau, à permis à ..... de faire imprimer, vendre & distribuer, par tel Libraire que bon luy semblera, vn Liure intitulé, *Le Philosophe Chrestien*. Faisant deffences à tous Imprimeurs, Libraires & autres, de quelque qualité & condition qu'ils soient, d'imprimer ledit Liure, en vendre ny distribuer par rout le Royaume, pays & terres de son obeïssance, sans le consentement dudit exposant, ou de celuy qui aura droit deluy, pendant le temps de six ans: sur peine aux contreuenans de confiscation des exemplaires, & de deux mil liures d'amande, despens dominages & interests: Nonobstant Clameur de Haro, Charte Normande, prise à partie, & lettres à ce contraires. Comme il est plus amplement porté par l'original des presentes.

*L'auteur du present Liure à cedé le Priuilege cy-dessus à FRANÇOIS TARGA, Marchand Libraire à Paris, pour en iouïr par ledit Targa, ainsi qu'il est porté par l'Original, dont l'extraict est cy dessus.*

Acheué d'imprimer pour la premiere fois le 12. Novembre 1638.

*Les exemplaires ont esté fournis à la Bibliotheque du Roy.*





L E

# PHILOSOPHE CHRETIEN.

## SECTION PREMIERE.

*La raison naturelle s'accommode facilement  
avec les plus hauts mysteres de la Foy.*



A difficulté qu'il y a de répondre sur le champ à des propositions de consequence, procede de ce qu'il ne suffit pas de concevoir la force des raisons qui nous sont objectées, mais de ce qu'au mesme instant de cette conception, il faut en produire de plus puissantes pour les convaincre. Et comme les lumieres de l'Esprit veulent estre entieres, & n'estre point confuses pour faire leur Impression, ie vous marqueray icy le plus succinctement qu'il me sera possible, les raisons qui doiuent satisfaire les doutes de vostre amy, & passeray legerement sur chacun des poincts de la con-

A

ference que nous eûmes hier. Je feray à la mode des Cosmographes qui nous figurent les Prouinces entieres par vn traitt de plume, & renferment l'vniuers en vn fort petit espace. Et quoy qu'il ne soit pas iuste d'exiger de la raison naturelle plus qu'elle ne peut, & de l'obliger de nous esleuer au dessus de ses forces, si est-ce que par elle-mesme, il est facile de vous faire voir qu'elle a plus de force & plus de vigueur pour l'establissement des plus hauts mysteres de nostre Religion, qu'elle n'en a pour les combattre, & pour les esbranler.

## SECTION DE V X I E S M E.

*Que l'homme, & tout ce qu'il y a de creatures viuantes ont esté créés, & que le monde a eu commencement.*



ETTE opinion qui a voulu establir l'eternité du monde, n'est pas nouvelle: mais aussi n'est elle pas bien entendue par la plus part de ceux qui la mettent en auant. Il ne faut pas confondre ce qui anime avec ce qui est animé, celuy-cy vous l'appellez Monde, & l'autre, Dieu, Nature, Esprit Vniuersel, Eternité, Sapience, ou de tel nom qu'il vous plaist. Vous demeurez d'accord que l'assemblage des pieces differentes qui entrent en la composition des corps sublunaires, n'est qu'une paste corruptible de laquelle toutes chose

sont pestries & formées : & ne sçaurions nier que si nostre pere ne nous auoit mis au monde , nous n'y serions pas entrez de nous-mesmes. Nostre Pere neantmoins n'auoit pas les principes de l'estre meilleurs & plus solides que nous, & ne s'estant pû engendrer soy-mesme, a eu besoin de nostre ayeul pour luy prestre ce secours ; & parlant ainsi successi- uement de tous les hommes, & de toutes les creatu- res viuantes qui nous ont deuancé ; Il se donne- ra vn progrès à l'infiny, ce qui est absurde & con- damné vnanimement de tous les Philoso- phes, & partant nous serons contraincts d'arriuer à vn premier homme, lequel n'aura point esté pro- duit par vne copulation charnelle, mais créé par vn Ourier excellent, que nous appellons Dieu. Que si l'vniuers est de toute éternité, & conserue en soy quelque disposition à durer tousiours, il faut ou que ce soit de la part d'une cause estrangere & exterieure, & partant comme la cause deuance l'effect, & princi- palement où il y a progrès, estenduë de matiere, & de quantité, elle aura deuancé l'estre du monde : Il n'est donc point eternal: ou d'une cause interne, qui comme vne espee de semence, par vne admirable vertu, a produit & estendu hors de soy par vne ac- tion ineffable cette grande masse visible, & par la mesme raison il s'ensuit encores qu'elle a eu com- mencement: ou que cela arriue de la part de ce qui est en luy de plus grossier & corruptible, que nous voyons par vne vicissitude continuelle dans vn roule- ment perpetuel, paruenir enfin iusques à vn certain periode & degré de consistance, auquel il se main-

tient quelque temps, iusques à ce qu'il vienne à décheoir, & par sa cheute nous marquer les différents estages de sa destruction, ce qui est absurde; puis qu'il implique contradiction que le corruptible puisse estre cause de l'incorruptible. Il reste donc qu'il soit eternal de la part des principes qui constituent l'vniuers, lesquels pour estre profondement cachés, seruent comme de mouëlle vigoureuse à ses gros ossements: & partant si ces principes sont causes del'eternité en l'vniuers, tous les subiects qui se trouueront aussi animez de ces mesmes principes seront aussi eternels. Or est-il quel'homme, l'animal, & tous les mixtes qui se forment journellement dans le sein de la terre, ont en la constitution de leur estre les mesmes principes que le total; & partant si les principes sont causes d'eternité en la constitution del'vniuers, ils doiuent aussi causer l'eternité en la structure & durée de ces plus nobles ouurages, & de tous les sujets qui se trouuent estre formés de mesme sang & de mesme paste que le grand monde. Or est-il qu'ils ne sont point eternels, & que vos yeux sont tesmoins irreprochables de leur commencement & de leur fin, & partant le monde ne peut estre eternal, de la part de ses principes. Dóc puis que le monde n'est point eternal, soit de la part de la cause interne, ou externe, soit de la part de ce qui est en luy de corruptible ou des principes qui le constituent: Il s'ensuit qu'il a eu commencement: En fin s'il estoit eternal, il seroit autheur de soy-mesme, & par consequent se seroit formé vn estre plus noble & plus parfait que le sien, & ne se lairoit pas corrépre, pourrir, & tomber par pieces, comme il fait tous les jours. Bref, nous ne con-

noïssons rien en ce monde qui se soit formé de ses propres mains : & par conséquent tout ce qui est en ce monde sensible, retournera à ce souverain principe qui luy a communiqué le premier estre en vn certain instant, auquel il est vray de dire, puis qu'il a commencé, qu'il n'estoit pas encore; & partant le monde, c'est à dire, tout ce qui est formé, & qui paroist à nos yeux a eu commencement, donc le monde n'est point eternal. Que s'ils'est trouué des Philosophes qui ayent maintenu l'opinion contraire, ils ont entendu parler du monde inuisible & eternal qui a produit le monde sensible, & idans lequel les Idées de ce monde elementaire ont esté de toute eternité.

## DE LA DIFFERENCE QV'IL y a entre Dieu, la Nature, & le monde.

### SECTION III.

#### PREMIERE PARTIE.

*Que l'ignorance est la mère de l'idolatrie, & que c'est elle-mesme encore qui a fait croire aux impies du temps, que Dieu, la Nature, & le Monde, estoient la mesme chose.*



ES choses qui sont les plus voisines de nos sens, & qui s'approchent le plus près de nous pour se familiariser à nostre connoissance, nous donnent assez de tesmoignages qu'elles sont, mais non pas de ce qu'elles sont.

le feu est chaud, si quelqu'un le nyc, qu'il y mette le doigt, & ne nous en demande pas davantage; nous ne luy dirons pas ce que c'est. Est-il rien de plus certain que nous auons memoire & imagination, qu'on nous montre vn tableau, ou quoy que ce soit, de curieux, qui n'ayt point encores paru à nostre veuë, nostre imagination le coppie en vn instant, & donne à garder ceste nouvelle figure à la memoire qui la conserue parmy vn million d'autres petites images, sans presse, sans douleur, sans bruit, sans confusion. Vn an apres nous la represente à l'entendement, quand il luy en demande compte, aussi belle que le premier iour, sans estre enuieillie, ny enfumée: chacun le sçait, il ne faut point de preuue d'une chose si constante. Demandez ce que c'est qu'imagination, memoire, & entendement, en quelle partie du cerueau elle se forme, comment, quels en sont les ressorts, d'abord nous laschons vne grande suite de paroles qui font bruir, & begayons quelque temps: mais à mesure que nous nous engageons à discourir & approfondir la chose, nous perdons pied, & confessons en fin que nous le sentons, mais que nous ne pouuons dire ce que c'est. Il en est de mesme de la diuinite, il ne faut qu'ouurir les yeux, & faire vne legere reueuë sur la symmetrie de ce grand bastiment, ou considerer exactement la moindre des pieces de l'vniuers. Nous sentons, voyons, & touchons Dieu, qui nous parle en toute maniere, & ne pouuons dire ce qu'il est. Ceste cognoissance commune à tous les peuples, & à chacun des hommes en particulier, leur a fait confesser qu'il y auoit vn Dieu. Mais la vanité naturelle nous persua-

dant que nous estions assez habilles pour juger, & dire ce que c'estoit, a fait asseurer aux vns que c'estoit la terre, puis qu'elle auoit soin de nous tenir tousiours pendus à sa mammelle, & qu'elle nous fournissoit de toutes parts dequoy nous diuertir, charmer nos ennuis, & satisfaire plainement vn chacun de nos sens. D'autres la mer, dont la figure est si prodigieuse, & les mouuemens de cholere si effroyables, qu'elle remplit d'horreur & de crainte les esprits les plus resolu. D'autres le Soleil pere du iour & de la lumiere, & qui par ses benignes influences, & la vie qu'il procure à chaque chose, selon quelques Philosophes, fait la moitié de nous-mesmes. D'autres, dont la veuë a esté plus resserrée, se sont arrestez aux fleues, aux ruisseaux, aux bestes, aux simples, pour les Deifier. A d'autres les moindres rencontres ontourny de matiere pour forger des Idoles dont ils remplissoient leurs Temples, leurs maisons, leurs foyers. D'autres se formoient des Dieux de toute pierre, & apres auoir donné quelque coup de ciseau sur vne matiere qui leur seruoit auparauant de marche-pied, n'osoient plus y porter la main qu'en tremblant. En effect l'ignorance est la mere del'Idolatrie, & celle qui a enfanté toutes ces fausses diuinitéz : nostre siecle & nostre climat esclaire du flambeau de la verité a fait esuanouir tous ces petits feux folets, mais n'a pas empêché que ce Monstre d'ignorance n'ait encore produit des fausses lumieres dans l'esprit de quelques vns, qui touchés du libertinage, repudient toute loy pour iuste qu'elle soit, & se persuadent en estre dispensez, en disant qu'ils la reprouuent, & qu'ils ne s'y soub-

mettent pas; comme si la loy auoit besoin de l'adueu du criminel pour l'appliquer à la gese; & aux suppliques qu'il s'est preparé par son mesfait. Ils demeurent d'accord que toutes ces petites diuinités ne sont pas tollerables, que ces Idolatres n'estoient pas bons Philosophes. Que s'ils eussent este plus raisonnables, ils n'eussent dressé des Autels qu'à la Nature; & que ce grand monde est la seule diuinité digne de nostre encens & de nos sacrifices; mais ils ne s'apperçoient pas de leur faute, & que le peu de clarté qu'ils ont du monde, de Dieu, & de la Nature, les jette dans vn cahos & vne confusion si estrange, qu'ils se heurtent à tous momens, & n'ont aucune notion distincte de l'vn ny de l'autre. Ils disent que le monde est la Nature, & que ce qui perit & ne perit pas, est la mesme chose. Vne contradiction perpetuelle est leur plus belle maniere de philosopher: Il est vray qu'il est fort hazardeux de marcher tout seul en vn sentier si difficile & si peu frequenté, qu'il seroit bien plus seur de se laisser conduire à la foy; que peu de gens ont entrepris de dechiffrer ce langage, & d'en crayonner la difference, Mais encores ne sera-il pas mal à propos de leur en marquer grossierement ce que la raison & la lumiere naturelle nous en peuuent pourtraire, quoy que confusément, & dans son obscurité accoustumée.

## SECONDE



## SECONDE PARTIE.

*Le monde, est tout ce qui paroist de sensible. La Nature qui l'anime, est ce beau jour, duquel Dieu est le Pere, & le veritable Soleil.*



L est certain que la notion la plus assurée que nous puissions auoir du seau & cachet Royal, est d'en voir l'Image imprimée sur la cire attachée au bas de ses Arrets & souverains mandemens. Le monde & cette grande masse visible parée de lumiere, ornée de tant de flambeaux, remplie d'une admirable variété d'ouvrages précieux, porte sur le front la diuine marque de celuy qui les a formez, & nous enseigne par vne image si auguste à cognoistre les traits diuins de ce beau visage sur lequel ils ont esté copiés. Partant la maniere de raisonner la plus certaine, sera celle qui tirera ses conclusions & conséquences infaillibles de pourtrait à l'original, & de la Nature à Dieu mesmes. La terre, l'eau, l'air, le Ciel, le Soleil, les astres, ce qu'ils contiennent, & tout ce qui paroist à nos yeux dans ce superbe Palais, est appelé Monde, lequel n'estant qu'une matiere proprement agencée, & curieusement trauaillée, n'est que le vestement & la robbe d'une chose plus précieuse, & inconnue à nos sens, que nous appellons Nature. Or comme celle-cy est l'ame de ce qui paroist, la base & le soubstien de tout le visible; Dieu est l'ame

de la Nature, & sur les bras duquel elle repose seurement : elle est le voile de la diuinité, celle qui separe Dieu d'avec le monde : & quoy qu'elle soit la premiere lumiere inuisible à nostre esgard, elle est neantmoins la premiere ombre à l'esgard de la diuinité. C'est le milieu qui vnit les deux extremittez par des liens imperceptibles. Et tant s'en faut qu'il nous faille eschapper, & pretendre de paruenir immediatement de la chose visible à la diuinité, nous ne pouuons nous y acheminer que par ce milieu, qui est d'une connoissance si profonde & occulte, que nous ne sçaurions nous en promettre aucune lumiere distincte; aussi est elle l'original de l'image de Dieu, dont le monde entier n'est qu'une coppie bien grossiere. Que si pour le comprendre & nous en forger une parfaite idée, nous sommes si steriles & si-mauuais artisans : oserons-nous porter plus auant nostre pensée, & enuysager de loing la Toute-puissance dans le profond abyssine de ses grandeurs ineffables, qu'avec crainte, frayeur & tremblement ? Le Maistre de l'Academie apres auoir bien sué, pour nous dire le sentiment qu'il a de la Nature dit que c'est la volonté de Dieu : d'autres sa voix, & sa parole d'autres l'esprit vniuersel, l'ame du monde, l'image viuante de la diuinité. Nous dirons qu'elle est la semence precieuse & incomprehensible, en laquelle toutes les Idées du monde sensible sont comprises; ou plustost une vapeur de la vertu diuine, qui se respand dans l'uniuers, comme l'odeur d'un corps aromatique qui va embaumant & conseruant dans l'actiuité de sa Sphere, & selon les differents degres de constitution & de durée, propor-

tionnés aux diuerſes régions où elle ſ'eſcoule, l'eſtre, la ſubſtance, le progrès, le commencement & la fin de chaque choſe qui paroît ſur ce theatre ſenſible. C'eſt cette nuit précieuſe d'Orphée, qui a engendré tant de feux & de lumières, du ſein de laquelle eſt ſorty le iour, l'ornement, la grace, & l'embellifſement de chaque choſe. Toutes nos penſées marqueront bien pluſtoſt le deſaut de noſtre cognoiſſance, que la perfection de ſon eſtre: & pour dire tant de bien de cette Image viuante, ne vous perſuadés pas que ce ſoit aux deſpens de la diuinité; car elle eſt infiniment au deſſus, & il y a moins de comparaifon de l'vne à l'autre, que del'homme viuant à ſon pourtrait, & à ſa peinture morte & muette. En eſſect elle n'eſt que le iour, dont Dieu eſt le Soleil qui luit dans l'obſcurité des choſes créées, & comme le flambeau qu'on apporte dans vn lieu obſcur, reſpand ſa clarté aux enuironſ, & eſclaire ce qui auparauant eſtoit en tenebres. ſans qu'on puiſſe dire que la partie del'air qui'eſt'eſclairé ſoit le flambeau, ou partie d'iceluy; non plus que le iour n'eſt pas le Soleil, puis que ſans aucune diminution de cette ſource de lumière, cette partie de l'air peut eſtre eſclairée, ou nel'eſtre pas. Dieu tout de meſme a produit la Nature, comme vn beau iour qui a représenté à nos yeux, le teinct, la grace, & les couleurs des choſes qui eſtoient auparauant en cloſes dans le ſein de tenebres, mais qui ſe conſeruoient bien plus belles & plus eſclatantes dans l'Idée de la diuinité: & de meſmes que la lumière du flambeau qui ſe reſpand en vn grand lieu, peut en vn instant eſtre renfermée en vn fort petit eſpace, ſans qu'elle ſouffre diminution. Celuy

quia créé le monde & produit tant d'ouurages si rares, nous a fait vn present, sans s'incommoder, & n'en deuiendra pas plus riche par la perte que nous en ferons. Que si nous suiuous encore la mesme comparaison; Comme en l'espace que nous auons supposé, il n'y a aucune partie esclairée qui ne contienne vn rayon de lumiere, & qu'en y opposant vn miroir, il ne represente aussi tost l'image entiere du flambeau. De mesmes en ce grand iour de la Nature; Il n'y a pas vn petit corps qui n'en soit esclairé, & qui dans vne curieuse & exacte recherche, ne rapporte fidellement à nostre cognoissance, comme vne glace excellente tous les traicts dece diuin Soleil. Ainsi donc la Nature est le iour de ceste diuine clarté, c'est l'ombre de cet estre infiny, & la premiere lumiere à l'esgard des choses créées, c'est vne vertu diuine. Or comme le iour n'est pas le Soleil, ny l'ombre le corps, ny la Vertu l'estre, & l'essence de la chose. Tout de mesme cest esprit Vniuersel, cette vapeur de la Vertu diuine; Ce cahos ou principe materiel qui au premier instant de sa creation tenoit toutes les choses qui paroissent auourd'huy à nos yeux enclouées, & enfermées dans l'obscurité de son meillage; en vn mot la Nature n'est pas la diuinité, quoy qu'elle soit fort proche de Dieu, & qu'elle compose vn cercle dont le premier poinct qui le commence, & le dernier qui l'acheue, aboutissent tous deux à ce principe souuerain. Il nous faut aduouer que c'est vne extreme vanité, d'entreprendre de parler, & de discourir de cette essence diuine; elle est hors de nostre portée, & quelque pensée que nous en conceuions, est toute confuse & defectueuse. Et si

de la Nature nous n'en connoissons que les ombres, que sera-ce de la Diuinité? aussi n'en approcherons-nous point par nostre raisonnement, *posteriora me auidebis*, nous n'en verrons jamais que le train & la liurée, si la foy ne rompt ce voile, & ne nous plonge & noyé par vn excés d'amour dans le sein de cet abyfine delicieux & incomprehensible.

## SECTION IV.

## Du mystere de la Trinité.

## PREMIERE PARTIE.

*Que l'ordre de la Creation & les trois grands estages de la Nature, nous donnent vne grande lumiere du Mystere de la Trinité.*



**P**VIS que nous nous trouuons engagez si auant, il faut passer plus outre dans le Mystere de la Creation; qui par l'ordre des choses nous fera connoistre comme Dieu s'est approché de nous, & marquera quand & quand les degres par lesquels il faut retourner à luy. Ce qui nous seruira non seulement pour l'intelligente de la secrette operation de la Nature, lors que par le commandement de Dieu apres sa Creation, elle s'est mise en besongne, & a desployé au dehors les fruëts innombrables de sa fecondité, mais aussi pour arriuer

en chemin faisant à nostre dessein. Car ainsi que de l'vnité de la Nature, qui est l'Image de Dieu. Nous concluons hardiment l'vnité de son original ; par la mesme raison le nombre ternaire & mystique, qu'elle nous fait voir en son progrès nous reuele & descouure apparemment le sacré Mystere de la Trinité. Auparauant qu'elle fust obligée de mettre la main au superbe bastiment de l'vniuers, elle reposoit dans le sein de la diuinité avec tant de lumiere & d'ornement, qu'à la considerer en cest estat, elle se trouue à couuert de la pointe de nos plus subtiles pensées : mais comme dans le moment que Dieu s'estoit prescript, ils'aduança d'un pas auguste au terme de la Creation, elle demeura derriere & deuint l'ombre de ce beau corps, qui nous en crayonna hardiment la figure, les traces, les loix, les mouuements & les volonte. Estant donc toute gonfle, à terme, & proche de son accouchement, la Prouidence diuine luy seruit de Sage-femme, & tira de son sein ce grand Vniuers, dont le chef brille de tant de clartez, & le cœur par son mouuement perpetuel distribue la chaleur & la vie aux parties les plus esloignées & les plus dures, qui seruent à ce Tout, comme de piloris, & d'ossemens; de la plus subtile & plus pure substance fut formé ce premier Globe des intelligences; ce beau Ciel où l'oracle de la parole diuine vist tant de merueilles, & qui embrasse en son large sein le reste de l'Vniuers. Pour parer cette demeure de tout ce qu'elle auoit de plus riche, elle s'espuisa & respendit prodigalement toutes les Vertus dont elle estoit engrossée ; à la chargeant moins qu'elle en feroit part aux deux au-

tres, ce qu'elle accomplit au mesme instant; car toute chaude & fertile qu'elle estoit, du surcroist de sa substance la plus grossiere & la moins noble, elle forma le plus pur du monde celeste, le Soleil, les astres, & tous ces beaux feux de la nuit, & le Ciel mesme qu'elle enueloppa d'une escorce aërienne, cristalline, & transparente, comme d'une toille bien fine capable de couvrir ceste belle nudité: & qui n'empesche pas pourtant qu'elle n'exhale continuellement hors de soy les bonnes senteurs, les agreables influences de cette precieuse liqueur, qui se conserue dans ce beau vase de cristal. Cette semence estoit encores si vigoureuse & enflammée qu'elle ne pouuoit se contenir en son espace, sans nous donner des marques de sa fécondité. Se deschargeant donc du surplus de sa matiere la moins precieuse, elle anima & produisit à l'instant hors de soy, la region de l'air, la mer, les fleuues, la terre, & tout ce monde sublunaire: de telle sorte neantmoins, que ce qui estoit de plus espois & moindre consideration dans le celeste, a seruy d'ame & d'esprit à ce grand corps solide, pour le remuer, le mouuoir, l'eschauffer, & luy communiquer toutes les qualitez requises, pour germer & produire à son tour ce qui estoit necessaire pour la nourriture de ses enfans. Cestroy Globes diuisez en soy, chacun par differents degrez de noblesse & de production composent ce grand Vniuers. De maniere que cette Nature, comme vne noble & tres-fertile semence a desployé au dehors toutes les dimentions, grandeurs, qualitez, proportions, & Vertus qui paroissent en toutes choses; reuestuës toutesfois, tant en la structure & composition des maistresses pieces de l'V-

niuers, que de chacun sujet en particulier, de trois différentes enuoppes, subtiles & bien deliées que les Philosophes ont appellé principes, appuyées sur cette seule & vnique essence. Les vns les ont appellez matiere, forme, priuation: d'autres comme Hermes, supérieur, inférieur, & lion verd: d'autres, agent, patient, & moyen vnissant. D'autres soulfre, sel & mercure. D'autres l'eau, l'air, & la terre, car le feu ne differe gueres de la qualité première, que nous auons remarqué en la nature toute pure & toute simple, auant la production des choses. Bref, tout ce qu'il y a de sages dans le monde n'en ont estably que trois: d'autant que cette Image viuante de la Diuinité ne leur en representoit pas dauantage: Ce qu'ils ont appris sensuellement par l'exacte recherche, & parfaicte dissection qu'ils ont fait des corps, qui n'a iamais peu passer au delà de ces barrières que la Nature a puissamment fortifiées & establies entre-elle & nous. C'est sous cet habit qu'elle s'est respanduë par tout avec tant de iustice & d'equité, qu'il n'y a pas vne petite creature dans ce grand monde, qui ne conserue en son sein quelque parcelle de cette noble substance, & qui par ce moyen ne puisse se vanter d'estre de mesme sang, & mesme race que le Soleil & les Astres. C'est ce qui a fait dire à ces grands genies de la Nature que le haut estoit comme le bas, que tout estoit en toutes choses: puis que la plus petite, & la plus vile n'a pas moins de richesse en puissance; que la plus superbe & la plus esleuée. En effect, ils ne different que par ce que les Vertus de celle cy sont estalées & apparentes, & de l'autre au contraire resserrées & occultes. En fin les ordres, les esta-

ges




ges differents de cette grande Monarchie, la rarefaction & condensation, le plus & le moins marquent les differences de noblesse ou de roture en chaque chose: car ce qui est terrestre dans le monde sublunaire, se trouue celeste en la seconde Sphere; & en la troisieme & derniere d'un estage encores plus releué, & en la Diuinite Dieu mesmes. Le Superieur comprend tousiours l'interieur; mais d'une maniere plus noble & plus esclatante qu'il n'est en sa propre region. L'interieur pareillement la chose superieure à sa façon; c'est à dire, couuerte & accablée de tant de matiere, qu'elle n'est plus reconnoissable de l'estat, auquel elle estoit en sa Sphere. C'est de ceste maniere que Dieu est en la moindre des choses que nous voyons, touchons, & sentons, comme en la plus auguste. Il est vray que pour s'esleuer de la plus basse à la plus haute, il y a du chemin à faire à proportion des degrez de son esloignement: car il faut tousiours se deuellir, & se decomposer iusques au premier estage, lequel en est tout proche. Au contraire, à mesure que la Diuinité descend à nous, elle va tousiours se grossissant, & chargeant d'habillemens & de matiere; mais à son esgard elle n'en est pas plus en presse: ce fardeau ne la charge point, elle n'en est ny moins parée, ny moins puissante: car en la plus petite des choses, elle a de quoy susciter des enfans à Abraham? en un mot de quoy former un autre monde. L'ame de l'homme qui marche comme de pair avec les intelligences se trouue d'un degré plus haut que cette Nature, dont nous venons de parler; &

par conséquent de beaucoup plus aduantagee. C'est par ces degrez que le Verbe Diuin s'est preparé sa descente, pour s'incarner dans le Ventre d'une Vierge, dont nous parleroncy-apres: sans qu'il fut obligé de se reuestir de la Nature Angelique; C'est aussi par les memes eschelons que le materiel du Verbe incarné deuint spirituel: & le corps charnel & grossier, celeste & glorieux; en se despoüillant & s'espurant de l'espoisseur de la matiere, & de la pesanteur du fardeau dont nos chetiues espauls sont miserablement accablées. Enfin c'est de cette source que ces grands personnages de l'antiquité ont puisé les belles lumieres qu'ils nous ont laissées de la Medecine vniuerselle, de la magie blanche, & de tous les secrets de la Nature, qu'ils nous ont crayonné assés obscurément, & n'ont osé reueler que sous la figure, & le voile de leurs fables, le recit n'en desplairoit pas peut-estre à vostre curiosité, mais il faut auancer & suivre la pointe de nostre dessein.

## SECONDE PARTIE.

*Il n'y a point de si petit corps dans la Nature  
qui dans l'unité de son sujet n'ait trois prin-  
cipes distincts, qui correspondent au pourtrait  
sur lequel ils ont esté copiés.*

 E n'estoit pas assez que la Nature, cette belle Image de l'archetype, l'ombre précieuse sous laquelle la diuinité se met à couuert de nos plus subtiles pensées, nous figura l'Image de la Trinité en l'ordre & estalage de ces trois grandes pieces de l'Vniuers, dont les diuerses regions ont esté aussi subdiuisées en trois, comme au monde sublunaire, l'air, l'eau & la terre, & chacune de ces Spheres en moyenne, supérieure & inférieure, & nous desconnoist ainsi les traicts de son original par le sacré ternaire graué sur l'unité de son essence, qui formilloit neantmoins d'un nombre infiny de vertus, de semences particulieres. Il falloit encores que la terre preparée & disposée pour ramasser recueillir & conseruer en sa matrice toutes les semences esparées & diffuses dans le sein de l'vniuers, diuisent sur le mesme patron en trois regnes, toutes les creatures qui sont attachées & pendues à ses mammelles, que nous appellons

animal, vegetal & mineral. Et de toutes les creatures en-  
rollées & soubmises à chacun de ses ordres, où la Na-  
ture a porté son pinceau, n'en a-elle pas formé à plaisir  
autant de petites figures circulaires qu'elle copioit sur  
son original. Il n'y a point de si petit corps en la Natu-  
re, qu'à le considerer exactement, il ne vous rapporte au  
naïf l'idée d'un petit Globe, qui dans son vnité conser-  
ue trois subsistances couuertes & reuestuës de matiere si  
bien limée & polie, que le tout ne forme qu'un sujet:  
dont l'vnité, ie veux dire cette premiere essence diffuse  
par tout, & en chacune des parties de l'Vniuers, deposti-  
taire des Idées, Vertus & Facultez de chaque indiuidu,  
est le centre: les trois principes specifiques, par l'organe  
desquels cette essence auparauant capable de tout, s'af-  
subjettit & se renferme sous vn certain genre de pro-  
portions, diuisions, grandeurs, qualitez & vertus qu'el-  
le n'oultre-passe jamais, & qu'il n'est pas au pouuoir de  
l'art & du feu de forcer, ny de violer; sont les trois co-  
lonnes de la diuinité qui en soustiennent l'edifice: La  
circonference, c'est à dire, le binaire, & tout ce qui pa-  
roist de grossier & de corruptible en la chose; est la ma-  
tiere dont les sujets se trouuent reuestus quand ils sor-  
tent du Cahos pour paroistre sur le theatre de ce monde.

## TROISIÈME PARTIE.

*Que l'homme est le plus précieux des ouvrages de Dieu: qu'il est cette bouëtte de Pandore qui renferme l'extraict de ce qu'il y a de plus riche dans les Cieux.*




LES grands ouvrages meritent bien qu'on les copie, & qu'on conserue en petit les excellens desseins de celuy qui les a formés. Quoy que cette premiere essence par le nombre infiny de ses tableaux, nous eust peint, & crayonné en maintes manieres l'image de la Diuinité. Ce n'estoit encores rien de faict, si elle n'eust mis la main à l'œuvre, & emprunté de chaque suiet ce qu'il y auoit de plus rare & de plus riche pour donner vn Roy à la terre, vn enfant au Ciel, vn compagnon aux Anges, & vn heritier à la gloire de Dieu. Elle ne pouuoit toute seule acheuer ce dessein, toutes ses vertus estoient steriles en ce rencontre, & n'estoit pas en sa puissance de le paracheuer: si Dieu par vn excès d'amour & de grace n'eust esté de la partie, & n'eust luy-mesme par l'infusion de l'ame, donné à l'homme vn surcroist de lumiere, & vne peinture bien plus viue de la diuinité que n'auoit pas le reste des choses créées. En effect cette masse des elements, ce monde sublunaire estoit comme vn aueugle nay, seul despourueu de clarté, pendant que le celeste se glo-

chons de plus près à la cognoissance de son original.  
Je veux dire de la Diuinité.

---

## QUATRIESME PARTIE.

*Que le raisonnement ou le syllogisme est l'Image  
& la figure de l'ame: & partant que nous  
pouuons certainement inferer qu'elle est trine  
en l'unité de son essence.*

 A notion la plus parfaicte que nous puissions recueillir de la noblesse de l'ame, tant qu'elle sera renfermée en la prison du corps, & ses lumieres en presse, & estouffées sous l'obscurité & la pesanteur de la matiere, est le raisonnement que cette petite Diuinité, produit, enfante, & met au iour, comme vne autre Minerve, qui porte en son visage toutes les marques & les traits de son pere: qui n'est autre chose, que la faculté que nostre ame a de parcourir sur toutes les idées qu'elle a ramassées des differents sujets, pour former vne consequence certaine par la suite & liaison de la chose cognüe à l'incognüe, ou de celle dont on demeure d'accord, à la certitude de la chose qui est en question & en doute entre les contendentes. Car si ie voulois vous prouuer que vostre Valet est capable de raison: ie vous mettrois en auant que tout homme est capable de raison: cette

discours les plus accomplis & les plus parfaites oraisons, semblent par de grands circuits s'insinuer dans nos cœurs, & par des artifices frauduleux charmer nostre esprit, & persuader bien souuent le contraire de la verité. Le tout neantmoins n'est qu'un syllogisme. C'est par luy que les estats sont regis & gouvernez: c'est par luy qu'il s'est trouué de la difference entre les premiers hommes: que les loix ont esté dictées pour leur conseruation & leur conduite, & qu'aux plus vertueux a esté deferée la charge du commandement: C'est par luy que la Republique des sciéces s'est establie, & qu'elle s'entretient. La Philosophie, la Medecine, les Mathematiques, la Theologie, & la demonstration luy doiuent l'Empire qu'ils se sont acquis sur les hommes. Que si apres auoir considéré cette belle figure de l'ame nous voulons passer plus auant en la contemplation de la maniere d'agir en la communauté qu'elle a contracté, tant avec les sens qu'avec les organes, & parties du corps pendant le cours de leur société, nous y verrons un parallele & rapport perpetuel à son original. Si nous examinons le lieu secret, & le coffre fort où elle fait amas de ses thresors, pour les conuertir en son usage, & en faire des liberalitez quand bon luy semble: nous n'y trouuerons que trois caches, imagination, memoire, & entendement, qui ne forment qu'un seul esprit; dans l'vnité duquel ces trois ne composent qu'un cercle. Pour instrument & machines, avec lesquelles elle attaque les plus grands corps en la Nature; Elle mesure le fonds des abysses, elle vnit & conjoint les

extremitez les plus éloignés; diffinitio, diuision, & demonstration, qui produisent le cercle du raisonnement. Et le bien que nostre esprit se propose naturellement pour son object, & que tous ces sages Payens ont creu estre l'image de la Diuinité, aussi bien que del'vnité: n'a il pas esté par eux diuisé en trois membres, appellés vile, honneste & delectable; & qui ne forment neantmoins qu'une seule Idée.

## CINQVIESME PARTIE.

*Que ces trois termes estre, cognoistre, & aymer, sont distincts & communs à l'ame de l'homme, & à la Diuinité.*

**Q**UE si nous voulons considerer l'ame de l'homme toute nuë: nous trouuerons que l'estre, cognoistre, & aymer, sont trois termes, qui ont leur source & leur principe en l'vnité de l'ame; dont le premier deuanche les deux autres, & le second, le troisieme par priorité d'ordre & de Nature, mais non pas de priorité de temps. Et quoy qu'on puisse dire en l'ordre de la generation de l'homme, que l'estre de son ame precede vn long temps l'effect de sa cognoissance, & la cognoissance celuy de l'amour: Cela ne regarde point le faict de l'ame, mais seulement la disposition de la matiere qu'elle anime, & des organes



par le moyen desquels elle explique les effets de son operation; Non plus qu'en la mesme generation, à l'esgard des parties materielles; Quoy que le cœur, le foye, le poulmon, & le cerueau soient formez les premiers: si est-ce que dans la semence, la vertu qui doit avec le temps produire successiuellement les autres parties moins nobles; n'est distinguée de celle qui a mis en acte, & en tuidence ces nobles & premieres parties animales, que par priorité de termes, & non de temps. Ainsi donc l'ame toute simple, dans le mesme moment de sa creation, reçoit en l'vnité de son essence ces trois termes distincts: sans que l'un se puisse vanter de preceder l'autre, par priorité de temps, mais d'ordre & de Nature seulement. Et bien qu'à nostre esgard, l'une soit tousiours en acte, & les deux autres en puissance quelquefois: si est-ce qu'en leur source, elles subsistent reellement & distinctement, sans aucune priorité de temps. L'ame de l'Empereur des petites maisons, ou de l'homme le plus idior, n'a pas moins de faculté de cognoistre & d'aymer, que celle de Platon ou d'Aristote. Cette Image nous represente bien naïuement le pourtrait de l'archetype, où les trois personnes de la Diuinité subsistent dans l'vnité de l'essence diuine, & en laquelle de priorité de termes seulement, le Pere deuance le Fils, & le Fils le Saint Esprit, mais non pas de priorité de temps: puisque l'infiny ne peut admettre de temps ny de mesure. Que si nous considerons le total de l'homme, le sensuel meslé avec le raisonnable, nous n'y trouuerons encores que ces trois termes, estre, cognoistre,

& aymer: Car la haine bien entenduë, la fuite & l'aduersité de ce qui desplaist à nos sens, ou à nostre esprit, est vne espece d'amour à nostre esgard. L'estre, est le fondement en nous, & le principe de la cognoissance, la connoissance produit & enfante l'amour, lequel agit & opere tousiours circulairement; C'est à dire, qu'il retourne & réfléchit tout court au mesme point, duquel il est party. En effet l'amour nous trahit d'une plaisante maniere, & aduantageuse pour nous. D'abord il nous fait sortir de nous-mesmes, & employe toutes nos facultez & puissances pour embrasser ce qui est hors de nous. à le voir faire, Il semble qu'il n'y vueille iamais retourner, mais suiuez-le de près, examinez-le bien; Vous trouuerez que c'est vn auaricieux, & que toutes ces ciuilitiez & simagrées sont autant d'artifices pour s'enrichir & retourner chez soy: C'est à dire, à son principe, chargé de butin & de despoüilles. Apres tout quelque bien que nous voulions à autrui, quelque prodigalité que l'amour face de nostre cœur & de nos pensées: c'est enfin pour l'amour de nous. Qu'il face & descriue le cercle si grand qu'il luy plaira, il retournera tousiours au mesme point duquel il est party. Cette Dame piquée de vostre esprit, charmée de vostre entretien, rauie de vostre bonne grace & de vos seruices; quelque aduantage que vous en receuiez, ne traueille que pour elle, & n'auz obligation de la faueur qu'elle vous fait, qu'au bien & aduantage qu'elle se procure. L'amour enfin par vne subtile trame fait comme la mouche à miel, qui va le iour baissant & caressant toutes les fleurs, mais

qui ne decouche point: & qui apres mille larcins s'en retourne toute joyeuse en sa petite loge. Il faut aduoüer que c'est vn puissant Prince, quel bruit ne fait-il point quand il se remüe, son train est si superbe, & sa suite si grande qu'il n'y a pas vne de nos passions qui ne se remüe, & ne se gendarme pour luy obeir & luy plaire. Toutes nos facultez approuuent ses sentimens; & quelque rauage qu'il puisse faire, l'estre & la cognoissance luy ont donné tout pouuoir: Qu'il nous engage dans les perils, qu'il allume la guerre par tout, qu'il mette l'Vniuers en discorde & dissention, qu'il remüe & renuerse tout, il n'en reçoit point de reproches. C'est nostre fils aisné: ses imperfections, & ses defauts ont pour nous des charmes & des agréments. Il est vray que nos manquemens procedent de la part de la matiere, & que nostre ame deceuë de l'estat de sa parfaicte cognoissance, prend souuent le faux pour le vray, & le mal pour le bien: mais quelque erreur qui nous puisse seduire, Il est certain que nostre amour ne le suit & embrasse, que sous l'espece & l'image du bien; qui nous fait voir que les traits de son visage rapportent fidellement au modelle de l'amour diuin, sur lequel ils ont esté pourtraits: lequel si nous considerons bien, nous trouuerons que c'est luy qui a fait jouër tous les grands ressorts en la creation, gouuernement & conduite du monde: ce que nous dirons en la partie suiuant.

## SIXIESME PARTIE.

*Comme en l'ame de l'homme ce que nous appel-  
lons estre, & cognoissance resignent entre les  
mains de l'amour tout pouuoir. De mesme il  
semble qu'aux personnes Diuines l'amour  
par vn priuilege special ait fait tous les grands  
coups d'estat en la creation, conduite & con-  
sommation du monde.*

**L'**ESTRE en la diuinité, est le Pere, qui a  
enfanté & produit la cognoissance ou la Sa-  
pience qui est le Fils : & parce que cette  
cognoissance n'auoit point d'autre ob-  
ject ny d'autre terme que celuy duquel elle estoit par-  
tie; y retournant avec impetuosité, a engendré ce beau  
Feu, cét Amour Diuin, ce Sainct Esprit, avec tant de  
pouuoir & de credit, qu'à le voir faire il sembleroit  
que les deux autres personnes se reposeroient  
toufiours, n'estoit que les actions diuines par vn  
concours necessaire, procedent continuellement de  
trois personnes. N'est-ce pas luy qui sollicite le Pere de  
tirer le monde du neant, & de mettre au iour tant de  
creatures qui jouissent maintenant du plaisir & de la  
douceur de l'Eltre. En la creation, le Pere donne la  
charge & commission au Fils; en effect il crée par la

Sapience. Mais si tost que cete saincte parole, de rien eust mis en euidence les materiaux necessaires pour cet ouurage: l'amour ne se met-il pas en besongne? N'est-ce pas luy qui ordonne & dispose de tout? N'accorde-il pas le froid & le chaud, le sec & l'humide, & ne les fait-il pas viure sans dissension, & sans querelle en chaque sujet? Ne prepare-il pas la demeure des Anges? Ne tend-il pas ces belles Tapisseries dans le Ciel? *Verbo Domini Celi firmati sunt, & Spiritu oris eius omnis virtus eorum*? Et n'enrichit-il pas la terre de verdure, de fruiets, de diamants, de metaux, d'animaux, & de tout ce qu'il y a de precieux? *Spiritus Domini ferebatur super aquas*? C'estoit luy, qui polissoit le cahos, & trauailloit sur cette matiere inorme, que nous auons appellé Nature, ou premiere essence. Et si nous le considerons agir en la formation de l'homme, lors que Dieu de son soufflé luy inspira l'Esprit de vie. Est-ce pas l'Esprit qui engendre l'Esprit, sans neantmoins qu'il soit partie de luy-mesme, non plus que le iour n'est point partie du Soleil? Et lors qu'il a esté question de trauailler à son reestablissement, apres la premiere cheute: n'est-ce pas luy qui en a pris le soin? qui a conjuré le Pere & le Fils de nous estre fauorables, les a forcez de contribuer à nostre salut, & obligé le Pere de donner son diuin mandement, & le Fils sa presence & sa personne pour nostre redemption. Dans la plenitude des temps, & le terme del'accomplissement du mystere de l'Incarnation? Est-ce pas luy qui a trauaillé tout le premier; qui a formé & préparé

le domicile de la diuinité; & qui l'a conceu dans le Ventre de la Vierge? N'est-ce pas luy mesme qui luy a seruy de Sage-femme, de Nourrice, de Precepteur, en sa plus tendre jeunesse? Qui luy a fait prendre la resolution & le courage de monter à la Croix, pour nous eleuer tous apres luy par vne mesme sente en l'heureuse Montaigne de Sion. Et lors que Dieu pour mettre la derniere main à son ouurage viendra iuger par son Fils les viuants & les morts, se tiendra-il sans rien faire? Sera ce pas luy qui allumera le feu par tous les coins de l'Vniuers, embrasera, & consommera toute cette grande machine, & qui mettra le feu au bucher eternel, qui doit punir tous les criminels, qui pendant le pelerinage de cette vie se sont declarez ses mortels ennemis? Et au contraire eschauffera d'un feu Diuin & ineffable les ames bien-heureuses. Et les vnissant à l'humanité precieuse du Verbe, les embrasera & comprendra dans le cercle de gloire, qu'il terminera pour iamais en la personne du Pere. Et pour reuenir au point d'où nous sommes partis? cet Amour de Dieu qui estoit sorty de luy-mesme, pour s'abaisser à nous & frequenter parmy les creatures: A-il eu d'autre but que son plaisir particulier, & d'autre dessein que de desrober quelque chose à la mort, que de faire vn larcin des Ames, & se charger des despoüilles & du butin du peché, pour retourner après à son giste, & le conuertir en fin miraculeusement en sa propre nourriture.

SEPTIESME

## SEPTIESME PARTIE.

*Il n'est pas iusques à l'ordre & vicissitude continue de la generation des choses qui ne se mesle de nous discourir du Mystere de la Trinité.*



PRES la remarque que nous venons de faire des plus beaux traits de cette Image, pouuons-nous douter maintenant du sacré mystere de la Trinité en la Diuinité? & si pour acheuer nous voulôs encorés examiner l'homme en ce qu'il a de commun avec les animaux, & avec les plantes en la generation & propagation de son espee; Pourrons-nous iamais remarquer plus de trois termes, dont le premier enfante & se multiplie au second, & le troisieme retourne au premier, pour finir & terminer ce cercle. L'homme premier terme, engendre la semence. Voyes la multiplication: celle-cy produit vn autre homme, ainssi successiuelement retourne tousiours au premier terme duquel il est party. La plante produit la semence, en laquelle elle croist & se multiplie, & la semence la plante. Le cahos est sorty de l'vnité en sa creation? Voyés cette grande & excessiue multiplication: il retournera enfin à son centre, & au meisme poinct d'où il est

E,

party. La poule engendre l'œuf, & de l'œuf se forme vne poule. N'esperez pas trouuer vne autre lumiere en la Nature: Elle ne peut vous marquer autre chose, que l'idée & l'Image de son Maistre. Et quoy que ce soit vne mesme vertu naturelle qui coule de la plante à la semence, & retourne de la semence à la plante: Il y a neantmoins différence de subsistances & des personnes, quoy que l'essence soit vnique. Doncques puis que l'homme Image la plus parfaicte de la Diuinité, que toutes les creatures, que tout l'Vniuers & la Nature mesmes ont esté formés sur ce Diuin original, & qu'ils portent graués dans leur sein trois subsistances en l'vnité de leur essence; Nous pouuons certainement conclurre de la Trinité des personnes, dans l'vnité de l'essence Diuine. Enfin ie vous en dirois dauantage, si ie ne vous auois promis d'estre succinct, & si par vn trop long discours ie n'auois desia violé la parole que ie vous ay donnée.



## SECTION CINQVIESME.

## De la Religion Chrestienne.

## PREMIERE PARTIE.

*La creature doit honorer en son Createur. Donc il faut vne Religion: mais de toutes celles qui sont en vſage parmy les hommes, il n'y a que la Chreſtienne, qui ſeule porte la marque & le caractere de la Diuinité.*

**L**est bien certain que l'homme doué de raison, ſe conſiderant en ce ſuperbe edifice le plus aduantage de toutes les creatures: pour peu de reflexion qu'il face en ſoy-mesme recognoiſt bien qu'il n'eſt pas l'auteur de ſon eſtre, & que ce priuilege particulier qu'il a de raiſonner, & de cognoiſtre, eſt vn appennage qui luy a eſté donné d'un ſouuerain Maiſtre. Ceſte penſée le porte auſſi toſt à la veneration de celuy qu'ils'eſt propoſé pour auteur de ce bien, qu'il appelle ſon Dieu, ou du nom le plus honorable qu'il peut. Ce culte s'appelle Religion, & eſt ſi commun parmy toutes les nations, qu'il ne s'eſt iamais trouué peuple ſans Religion: qui monſtre euidentement, qu'il eſt naturel de croire en Dieu, puis que

ce Cultre est vniuersel & commun à tous les hommes. De le cognoistre c'est ce qui n'est pas de nostre portée; de la moindre des fleurs d'un parterre nous en considerons la figure, les couleurs, la forme, la beauté l'odeur & tout ce qu'un chacun de nos sens en peut prendre; bref, ce qui est extérieur, portez vostre esprit & vostre cognoissance plus auant, elle s'arreste tout court, & ne peut aller au delà: & neantmoins nous voulons tenir le controlle de tout ce que Dieu entreprend de faire surnaturellement, & au delà de la portée de nos sens & de nostre raison, si comme infiny & incomprehensible qu'il est en ses œuures, il entreprend de faire un coup de Maître esleué au dessus de nostre esprit, nous ne laissons d'y apporter aussi tost la mesure de cette mesme raison. Et parce que l'un ne s'adapte pas bien à l'autre, nous ayons beaucoup mieux condamner la Diuinité que soupçonner de nostre foiblesse, & douter de nostre peu de force. Mais quelque bonne opinion que nous ayons de nous-mesmes; il faut, enfin que le Valet honore son Maître, & la creature son Createur. Donc il faut vne Religion. Et puis que nostre dessein est de nous contenir tant que nous pourrons dans les barrières de nostre raisonnement; il importe de tirer son aduis, & son consentement, & luy faire dire quelle est la meilleure, & celle que plus apparemment nous sommes obligez d'embrasser & de suiure. Toutes les Religions des anciens, ces infames cultes des faux Dieux, & toutes ces Idoles vous desplaisent, & s'escartent trop de la

Diuinité, pour leur donner vostre approbation. Celle des Indîes & peuples Barbares d'aujourd'huy sont encotropridicules; la Mahometane trop brutale, & trop sensuelle pour la pouuoir souffrir; & accommoder avec les sentimens qu'on doit auoir d'une pure Diuinité; Il n'est donc plus que la Chrestienne, laquelle quoy qu'on veuille dire de son austerité, nous sommes contrains d'aduouër qu'elle est assez douce & humaine, qu'elle s'accommode avec nous, ne fait point d'outrage à nos sens, & porte sur le front le sceau & la marque d'une pure Diuinité; Elle defend & interdit l'usage du vice, & nous sollicite de pratiquer toutes les vertus. Elle nous apprend par un excès de charité loüable, qu'il faut cacher & supporter les defauts de nos compagnons, partager nostre bien avec les plus pauvres & plus necessiteux, pardonner à nos ennemis, & aimer nostre frere, nostre prochain, comme nous-mesme. Renoncer à tous ses inrerests pour espouser le seruice de son Dieu; Abandonner ses plaisirs pour les sacrifier à l'vtilité publique? N'est-ce pas une Vertu au delà de celles que nous appellons heroïques? Ne sent-elle pas bien le lieu d'où elle vient? Elle espure nostre esprit, nous fait mespriser les choses du monde, comme perissables & que vous esprouués tous les iours par leur frequentation, deuenir à la longue ennuyeuses & pleines de degousts: Engage toutes nos affections dans le Ciel, & ne les laisse abaisser en terre, que pour les employer à la gloire de Dieu. En quelque estat & quelque condition que nous soyons, s'accommode facilement avec.

nous, & ne gésne pas vn de nos sens au delà des mesures qu'vne vertu bien réglée, leur pèut & leur doit prescrire. Il ne fust pas encore d'honorer nostre Maistre, selon les mouuements capricieux de nostre fantasie: nous deuons aussi remarquer que l'hommage, que le vassal rend à son Seigneur, est vne loy prescrite par la volonté de son supérieur: & qu'il ne nous est pas permis de demander au Prince qui nous a surmôté en guerre, ou à force ouuerte, raison de la loy, à laquelle par grace & par misericorde nous ayant laissé l'usage de la vie & des biens, il luy plaist de nous assuiettir: bien moins à celuy qui nous a créé. Et comme nostre obeissance se doit former à sa discretion, & non pas à la nostre: nous auons mauuaise grace de controller la loy de Dieu nostre souuerain Seigneur, puis que nostre humilité est son heritage, & que l'honneur & le deuoir que nous luy rendons, est son bien duquel il a droit de disposer comme bon luy semble. C'est vn sacrifice que nous luy deuons, lequel pour luy estre agreable, doit estre selon sa volonté. Il n'importe en quelle monnoye nous le payons, pourueu que ce soit celle qu'il approuue, qui porte sa marque & son diuin caractère.

## PARTIE DEUXIESME.

*Que l'humilité est le fondement de la Religion Chrestienne, & le seul moyen pour s'approcher de la cognoissance, de Dieu.*

**N**OUS deuons obseruer aussi, que comme Dieu est extrêmement haut, rien ne luy peut plaire qu'une extrême humilité, & qu'il n'y a rien pour nous de si pernicieux & si dommageable que l'orgueil & la vanité. Dieu qui a fait toutes choses, & qui pour recompense de son travail, exige de nous une humble recognoissance, ne peut souffrir que nostre vanité entreprenne de partager l'empire avec luy; & comme rien ne luy est si desagréable que l'orgueil; la loy qu'il nous donne en la Religion Chrestienne, y est directement opposée. A cet effect les loix qu'il nous a tracées, estans toutes au delà du cours ordinaire de nostre raison, font cabrer quelquefois les Sages du monde; C'est à dire ceux qui par une bonne naissance se trouuant aduantagez de quelque lumiere naturelle au dessus de leurs compagnons, querellent à l'instant mesme, & reprouuent nostre Religion, parce qu'elle ne s'assujettit pas à leur connoissance, & ne se renferme pas dans les bornes & l'estendue de leur raisonnement. Ils ne considerent pas que Dieu est une essence extrêmement pure & simple, au delà de tout ce qui se peut imaginer; Et partant que

pour approcher le plus de sa cognoissance, il faut que ce soit par vn effort d'entendement parfaictemēt espuré & simple. Car comme Dieu pour se communiquer à nous, a grossi & corporifié les objets pour les proportionner à nos sens grossiers & materiels, & se rendre par ce moyen aucunement comprehensible à nostre façon de raisonner; pour nous approcher de luy, Il faut au contraire, se descomposer & desbarasser le plus que nous pouuons de la matiere: & par vne puissante reflexion rentrant & se ramassant au plus profond de nous-mesmes, despoüiller nostre ame de toutes passions, la descharger des habillemens, & du fardeau importun des choses mondaines; la mettre toute nuë, & la laisser dans la solitude paisible des saintes Meditations, & des pieuses & secretes conferences qu'elle est capable de practiquer en cet estat avec la Diuinité. Cet exercice frequent, ressemble à l'aigle qui presente ses petits au Soleil pour les recognoistre: Il espure toutes nos pensées, & rejette comme bastardes celles qui ressentent le reland, & qui tiennent encore quelque chose de la Nature de la terre & de la corruption; & par vne parfaicte mortification de nos sens, qui ne seruoient auparauant qu'à nous troubler & nous embrouïller par vne agitation continuelle, & nous engager dauantage en la foule & en la presse des choses mortelles, nous fait cognoistre enfin ce que nous sommes, & nous donne des lumieres parfaites de la dignité & grandeur de nostre Maistre. Ce desuelopement de matiere ou abaissement s'appelle humilité; qui

qui est le degré le plus haut, sur lequel tous les sçavants, soit Payens ou autres, ont pû monter pour s'approcher le plus près de la Diuinité. Cette façon de reculer en arriere est la démarche de l'humilité, en laquelle consiste le repos de l'homme, celuy de sa conscience, la tranquillité de l'esprit, la connoissance de Dieu, & de son procedé avec nous. Si nous considérons l'ordre de la creation, nous trouuerôs que le Createur d'un principe extremement simple a tousiours de plus en plus grossi & multiplié les objects en leur composition iusques à la creation de l'homme, auquel Dieu a conferé un surcroist de lumiere. Et comme celuy-cy a recogneu que Dieu se respendant hors de soy-mesme auoit produit le monde: Il a voulu faire le semblable, & se laissant porter au vol de ses imaginations, s'est vanté de produire un monde intellectuel, dans lequel il preside d'une puissance si absoluë, qu'il n'approuue & ne tollere pas mesmes les sages conseils de la Diuinité, s'ils ne se soubmettent à l'empire de sa raison. Et cependant il ne s'apperçoit pas, que sortant hors de chez soy, plus il s'esloigne & s'escarte par l'orgueil, & la vanité, plus il espoissit & grossit le defect de sa lumiere naturelle. Et cômme une goutte de semence qui contient en soy tous les esprits, toutes les dimensions & proportions du corps qui se formet en la matrice, à mesure qu'elle s'auâce, se grossit & se multiplie en son progrès, & en l'ordre de la generation, plus aussi elle s'esloigne de son principe & de sa premiere simplicité. Nostre esprit voulant à l'ayde de nos raisons naturelles s'esleuer & se grossir, s'embarasse

dauantage en la composition & multiplicité des choses materielles, s'esloigne plus de soy-mesme, & consequemment de son principe qui est Dieu. Il ne faut donc pas s'estonner si le fondement principal de nostre Religion est en l'humilité, laquelle bien entendue nous rend plus proches de Dieu, comme l'orgueil nous en escarte le plus; & partant le dessein de Dieu, par les mysteres de nostre Religion estant, de se communiquer à nous, & nous approcher de luy, deuoit par necessité estre opposé à l'orgueil & à la vanité de nostre raison naturelle, d'autant que le Diuin & le naturel ont deux progrès tous contraires. Cetuy-cy va tousiours en auant à l'imitation des semences naturelles qui vont sans cesse grossissant iusques au point de leur parfaite consistence, & ne reculent iamais. & l'autre va retournant & circulant en soy-mesme, comme l'vnique centre de Verité & de perfection. Il s'ensuit donc que la Religion estant vn moyen pour vnir la creature avec le Createur, & ramener le total au principe duquel il estoit emané, que la veritable Religion deuoit estre fondée sur l'humilité & l'abaissement de nostre esprit. Cette vertu nous faisant renoncer à nous-mesmes, nous ouure la porte à de merueilleuses notions, qui appuyées sur le baston de la foy, nous font d'abord cheminer en tenebres pour quelque temps, iusques à ce qu'esclairés enfin du flambeau de l'amour diuin, dont ces grands personnages, lumieres de l'Eglise ont esté enflammés; Nous venons peu à peu gouter dans vne parfaite joye les fructs d'vne diuine cognoissance.



## PARTIE TROISIÈME.

*Que la Bible a son esprit, duquel il faut estre  
animé pour l'intelligence de la  
Sainte Escriture.*

**Q**UE si par vn mouuement de curiosité ou de diuertissement il vous prend enuie de mettre le nez dans la Bible, & n'y trouuez pas d'abord les satisfactions que vous desirez: Je vous diray qu'il ne s'en faut pas estonner, toutes choses ont esprit & vie, & quand elles en sont débourueës elles nous paroissent cōme mortes. Vous qui estes nourri dans la Cour, & dans la douceur des cōpagnies du monde les plus agreables, & les plus ciuiles: menez avec vous vn gentil-homme de la campagne, lequel oute sa vien'a gousté que les plaisirs rustiques & mal saisonnez, & luy donnez l'entrée en la ruelle d'une Dame, accompagnée des plus gentilles de la Cour, il denourera tout interdit, & n'y trouuera pas le plaisir qu'il rencontre à la suite d'une beste sauuage. Cela vient de ce qu'il n'a pas l'esprit de Cour, lequel est necessaire pour iuger de la delicatessse des plaisirs & voluptez qu'il produit. Il en est de mesme de toutes choses, & particulièrement de la S. Escriture, & des Saints Peres. Si vous attirez sur vous l'esprit de Religion, & ne l'obtenez

de Dieu par vos prieres. Vous n'y trouuerez iamais aucune sorte de gouft, ny de faueur. *Sensum enim tuum, ô Domine, quis sciet, nisi tu dederis Spiritum Sanctum tuum ab altissimis.* Mais depuis que par des sentiments pieux vous venez à penetrer l'escorce des paroles diuines, vous ressentez en vous de merueilleuses impressions par la communication de l'esprit qui les anime, & qui vous donne des satisfactions que vous pouuez bien mieux sentir, que non pas expliquer. Il s'ensuit de ce discours que la raison & lumiere naturelle de l'homme bien employés, ne contredit point à la Religion Chrestienne: & qu'elle combat elle-mesme pour la maintenir & la defendre. contre toutes sortes d'attaques.

---

## SECTION SIXIESME.

### De l'Incarnation:

*Qu'il ne repugne point à la raison, qu'en la plénitude des temps Dieu se soit incarné au Ventre de la sainte Vierge.*



VOUS lisons de Iacob, qu'il vit en songe vne eschelle qui touchoit de la terre au Ciel, par le moyen de laquelle les Anges montoient & descendoient du Ciel en terre, pour entretenir ce sembloit, & faciliter le commerce

entre Dieu & les hommes: Mais cette eschelle estoit appuyée en terre, pour nous apprendre que l'humilité, & la plus basse marche, est la plus seure, & la plus ferme à vne ame, qui par de saintes & Religieuses pensées, se veut esleuer & s'vnir à son Dieu & son Createur. Et quoy qu'il n'y ait que la foy & vn profond abaissment, qui établisse en nous les fondemens certains de ce que nous sçauons del'Incarnation: Dieu ne s'estât point obligé de nous descouurir les Mysteres de sa Diuine procession, soit en la creation du monde, soit en la conseruation: pas mesme en la cognoissance parfaite de la moindre des choses créées; Si est-ce que sur vos principes, & par vostre maniere de philosopher on la peut accorder facilement avec vostre raison. Vous dites que Dieu conserue, anime & viuifie toutes choses, mais aussi demeurez-vous d'accord, que pour estre en toutes choses, toutes choses ne sont pas Dieu, non plus que ce qui est animé, n'est pas ce qui anime. La difference qu'il y a en cette similitude, est que ce qui est animé a vne substance réelle qui le fait estre sans la chose qui l'anime: mais la maniere dont Dieu viuifie & • & soustient toute la Nature, est bien differente: par ce que absolument elle ne peut subsister, sans luy. Et quoy que celle-cy soit bornée, qu'elle ait ses agréments renfermez en de certaines limites & proportions mesurés. & agreables: Vous ne voulez pas inferer que cet Esprit diuin & infiny ne puisse quelquesfois outrepasser ces bornes quand il luy plaist, se manifester & se faire voir plus à decouuert qu'à bon luy semble. Donc

comme il a informé, & s'est incorporé en toutes choses sans estre corps, il a pû lors que bon luy a semblé se former vn domicile, & par l'operation diuine de son S. Esprit, s'incarner dans le Ventre d'une Vierge, par l'vniõ de l'ame humaine & precieuse qu'il auoit destiné pour cét effect; & animer ce fruit Virginal, avec tant d'auantage, qu'au lieu qu'en toutes choses cette Diuinité est profondement cachée à nostre entendement, aussi bien qu'à nos sens: En ce rencontre il a pû faire esclater les rayons de sa lumiere si auant, qu'elle s'est diffusée & respandue iusques à cette matiere charnelle & corruptible. De sorte que cette humanité toute rayonnante de splendeur diuine & de gloire, aura pû lors cõmuniquer au dehors par des actions merueilleuses les assurances certaines & demonstrations infailibles de la Diuinité. De sorte qu'au lieu que nous disõs, que Dieu est en l'or, comme en toutes choses: mais que l'or n'est pas Dieu, d'autant que l'aureté en la matiere n'est qu'un simple rayon de la Diuinité, déterminé à vne seule vertu & puissance; En l'humanité du Verbe nous parlõs autrement: parce que toute la Diuinité de la Sapience s'est entieremēt communiquée à cét indiuidu & suppost. De sorte qu'il est vray de dire que Dieu estoit en Iesus Christ, qu'il estoit Iesus-Christ & que Iesus-Christ estoit Dieu: Parce qu'il pouuoit les mesmes choses que Dieu. Ils'en suit dõc qu'il n'y a point de repugnãce, que Dieu se soit incarné au Ventre d'une Vierge: mais il y auoit necessité que ces mysteres s'accõplissent pour nostre salut (Ce que nous prouuerons presentement) Et partant nous pouuons

certainement conclure que Dieu s'est incarné en la  
 personne du Sauueur du monde.

## SECTION SEPTIESME.

### Du Mystere de la Croix.

#### PREMIERE PARTIE.

*Que l'homme eust esté immortel s'il fust demeuré dans le Paradis terrestre: & pourquoy il est deuenu mortel, en ayant esté chassé.*



**N** O V S auons cy dessus remarqué que le premier homme eut pour Pere son Createur, duquel comme d'un excellent Artiste, les ouurages qui en partent. immédiatement, sont d'une rareté, & d'une excellence admirable: De sorte qu'il est facile de presumer que la terre la plus pure, & la plus precieuse fut employée à cet ouurage: Comme l'air le plus subtil, l'eau la plus espurée, le feu le plus exquis, bref, tout ce qui estoit de plus riche en la Nature: & lors fut animé d'un souffle Diuin, & placé au lieu le plus auantageux pour la conseruation de son estre, qu'on appelle Paradis terrestre, ou iardin de delices. L'empire luy fut donné sur toutes les Creatures (dont il nous reste encores de si belles

marques) avec l'affranchissement des maladies & infirmités corporelles: & ne luy manquoit plus en cet estat, pour estre semblable à Dieu, que l'exemption de la loy, à laquelle il fut soubmis. Cette entrée si superbe estoit bien glorieuse pour luy & pour nous; mais la contrauention & la desobeissance par vn exil honteux & infame banissement l'ont mis en tel estat, que nous pouuons quasi dire de luy, ce que le peuple Romain disoit d'vn de leurs plus grands Empereurs: Qu'il eust esté à desirer qu'il ne fust iamais entré en la charge de l'Empire, ou qu'il n'en fust iamais sorty: tant nous auons receu de disgrace & de confusion à la suite de son crime. Et parce que peu de gens se sont penés à l'intelligence de ce mystere, ie vous diray ce que quelques Philosophes en ont pensé. Celieu estoit composé des plus parfaicts elements si iustement mesurés, & dans vn poids si proportionné, que n'y ayant aucun contraste ny different en ce meslange, non plus qu'en la matiere del'or: Il ne se pouuoit faire d'alteration en la partie materielle de l'homme: Et partant l'ame qui animoit ce beau corps ne s'en pouuoit separer, la corruption ne faisant aucune ouuerture ny passage à la desunion de l'ame d'avec ce corps, si accomply & si parfait. L'homme premier nay avec tous ses descendans estoit pour y demeurer tousiours: si ceste partie raisonnante qui le deuoit contenir en l'obeissance, rauie de sa propre beauté, & enuieuse de la splendeur diuine, par vne outrecuidance damnable & pernicieuse, n'eut entrepris de porter la main sur le fruiet defendu, par l'vsage duquel

quel il se promettoit estre rendu semblable à son Createur. A l'instant ils furent chassés de ce lieu pur & incapable de corruption, & entrèrent dans le monde que Dieu n'auoit préparé que pour les bestes. Ils deuinrent par cette desobeissance leurs compagnons, & perdirent cette puissance absoluë que Dieu leur auoit donnée sur les creatures viuantes. La terre mesme fut maudite pour le crime de son Roy, & ne donna plus ses fruiëts qu'à regret, & ingratement, quoy que cultiuée & arroulée de la sueur & du sang de ces pauures criminels. Ils furent lors, contraincts pour la necessité de se conseruer, de porter à leur bouche les fruiëts grossiers & corruptibles qu'elle produit. De sorte que ce sang pur & delicat, qui estoit dans leurs veines, venant à contracter vne disproportion en ces qualitez par la contagion de ces foibles aliments, a souffert alteration, & introduit la diuision dans son œconomie, de sorte que sa Nature peu à peu s'est affoiblie, & entierement decheuë de ce pur & noble estat auquel elle auoit esté formée. Enfin les aliments par leur naturelle concoction estans deuenus en l'homme chair & sang, & partie de luy-mesmes, engendrerent le conflict & l'inegalité des elements, de laquelle s'ensuiuit la corruption & la mort: c'est à dire, la resolution & separation de l'ame & du corps.

## PARTIE DEUXIESME.

*Qu'il n'y auoit que Dieu qui pût restablir le genre humain: & qu'au mystere de la Passion, la Diuinité a tousiours esté impassible.*



L'HOMME condamné à la mort, le corps à la terre, & l'ame par la priuation de la grace separée de son Soleil en tenebres perpetuelles, ne pouuoit esperer, ny meriter de soy aucun reſtabliſſement; ſi la Diuinité par vn excès d'amour, N'eut elle meſme entrepris de ſanctifier l'holocauste & l'humanité qui luy deuoit eſtre offerte. Or comme l'homme auoit offenſé en eſtat de purté, il falloit qu'il ſatiſfit & payaſt en ce meſme eſtat, ou la reparation n'eut pas eſté egalle à la faute: ce qui neantmoins eſtoit requis pour noſtre iuſtification. N'eſtant donc plus en eſtat de le faire de ſon cheſ: Dieu s'eſt ingéré de le faire pour nous, & de ſatiſfaire à noſtre deub: parce que ce traitt d'immortelle beauré que ce ſouuerain peintre auoit ſi curieuſement formé en cét ouurage, ayant eſté miſerablement effacé par noſtre crime, ne pouuoit iamais eſtre reſtably que par la main du meſme Ouurier. Ce qui a eſté accompli en l'vnion hypostatique de la Diuinité à l'humanité, par le moyen de laquelle celle cy s'eſt trouuée en eſtat noble & releué, tel qu'il eſtoit neceſſaire pour ſatiſfaire à celle-là. L'humanité



estant sur le penchant de sa ruine, s'approfondissoit de plus en plus, & n'estoit pas au pouuoir de ses forces de s'eleuer au poinct qu'il falloit pour l'appurement de son crime, si le Fils de Dieu ne l'eut pris sur ses espauls, pour l'eleuer iusques au throsne de son Pere, & la rendant par ce saint artifice plus esclatante qu'elle n'auoit iamais esté: ne l'eut mise en estat d'obtenir pour tous ses freres, la remission du peché que le premier homme auoit contracté en sa personne pour tous les humains. Il ne faut pas s'estonner si le Fils, le Verbe, la Sapience de Dieu prend la commission de restablir le genre humain: puis qu'à elle-mesmes encores auoit esté donné la charge & le pouuoir de le créer, & luy preparer pour sa demeure, cette grande masse des elemens, & des Cieux. Donc comme le crime commis par le premier homme estoit infiny, s'attachant à vne personne infinie, & que decheu de l'estat de grace il estoit tombé dans si vn grád défaut de puissance, & dans vne obscurité si estrange qu'il ne pouuoit plus recouurer sa premiere lumiere, si par la mesme grace il ne la receuoit d'en haut: & comme le caillous de soy ne peut jetter aucune estincelle de feu, ny de clarté, s'il n'est heurté par le fer; Si ce Soleil de Iustice ne se fust abaissé en terre, si cet acier trenchant & Diuin n'eust rudement frappé contre la durté de nostre poitrine & de nostre humanité, jamais ce feu ne se seroit resueillé de soy-mesme, & jamais n'eut eu la vertu ny le pouuoir d'allumer cette holocauste, qui bruslant d'un amour Diuin deuoit embrazer & consumer le peché qui auoit desia jetté de si profondes & per-

nicieuses racines en nostre ame, qu'elle n'estoit plus reconnoissable. Il falloit donc que l'humanité fust diuinifiée pour l'accomplissement de ce Mystere, quoy qu'en cet estat par la communication ineffable de la Diuinité, elle fut entierement espurée du crime commis par le premier homme. De sorte qu'il est vray de dire, que l'humanité qu'auoit espousé la Diuinité en Iesus-Christ, destinée pour l'expiation du peché du premier homme, & de ses descendans, n'auoit pas besoin pour elle de sacrifice ny d'oblation, mais seulement pour ses freres qui sont les Chrestiens; Ainsi donc cette mesme humanité qui en estat d'innocence & de pureté auoit attenté au fruit de l'arbre defendu, au mesme estat de pureté est estenduë sur l'arbre de la Croix, & par ce chastiment equiualant à la premiere faute, expie le crime par elle commis, satisfait à la iustice de Dieu, & le reconcilie avec les hommes. Quoy que ce mystere soit extremement releué au dessus de nostre raison, elle ne laisse pas neantmoins d'appercevoir par sa lumiere naturelle, qu'en bõne iustice, l'humanite a deu satisfaire au mesme estat qu'elle auoit offensé, ce qu'elle ne pouuoit accomplir de ses propres forces. Comme aussi que la Diuinité jointe à l'humanite a tousiours esté impassible, & n'a seruy que pour eleuer nostre humanité au point de ceste satisfaction. Or comme l'humanité du Fils de Dieu n'estoit pas capable de s'eleuer toute seule sans le secours de la Diuinité: Il n'est pas non plus en nostre puissance de nous eleuer à Dieu, & pretendre part

à sa gloire si nous ne nous vnissions à cette Nature Diuine humanisée en Iesus-Christ par l'operation de la foy, & la Communion des Sacrements. La Foy nous propose, & fait cognoistre l'object qu'il faut aimer, & qu'il faut suiure; la cognoissance engendre l'amour, & cet amour par l'vsage precieux des Sacrements produit en nous vn feu secret qui avec le temps va deuorant en nostre ame les impuretez des choses mondaines & perissables, qui sont autant de voiles & d'enueloppes qui empeschent les yeux de l'esprit, de voir dans vne viue Foy ce que la bouche ne peut raconter, ny la raison mesme clairement & distinctement apperceuoir au trauers l'espoisseur de tant de faux nuages.

## SECTION HVICTIESME.

## De l'Eucharistie.

## PARTIE PREMIERE.

*Que le Saint Sacrement nous estoit figuré par l'Arche d' Alliance, & qu'il n'est pas permis indiff'remment à toutes personnes d'y porter la main pour la secourir.*



E sçay bien que celuy qui voulut prester ses espaules & son secours pour soustenir l'Arche, qui pour la rudesse & difficulté du chemin sembloit pancher & chanceler fut embrazé & seuerement chastié de sa temerité, & de son

outrecuidance. Il doutoit que la main de Dieu en laquelle reposoit cette conduite, fust trop courte ou trop foible pour la secourir à point nommé, & que quelques moments pouuoient eschapper à la prouidence Diuine, dans lesquels sommeillant, cette Arche tomberoit au mesme peril que les choses caduques. Elle n'estoit en effect que la figure precieuse de cette Arche Diuine, de cette caisse merueilleuse, laquelle pour n'estre couuerte & vestue qu'à la legere, de qualite, quantite, couleur, & autres menus accidents, resserre neantmoins & renferme en soy ce joyau precieux, cette pierre luyfante, qui esclaire de son beau feu la purete de nos consciences, & qui par sa Toute-puissance. communique l'estre à la Nature, & respand dans l'Vniuers ce beau iour dont nous auons parle cy dessus. Aussi deuoit-elle estre attaquée aussi bien que cette premiere Arche, & mesme esbranlée par les vents impetueux de l'heresie & de l'impieté; mais ie ne suis pas assez presomptueux, pour croire que mes foibles espales la puissent estayer, ny assez ignorant pour douter de la Toute-puissance de Dieu, ou craindre que ce qui repose en sa main souveraine soit en peril, quelque effort que puisse faire pour cet effect le blaspheme des hommes, la malice, & l'impieté du siecle. C'est à l'ignorance des hommes que ie parle; c'est leur foiblesse & leur cheute que ie pretens secourir charitablement. Je continuëray donc, à vous montrer que la raison naturelle n'est point violée en ce Mysterieux Sacrement, quoy qu'il soit infiniment esleué au dessus de ses forces. Il me semble qu'il n'y a que

deux poinçts à verifier en ce rencontre. L'un que ce Sacrement nous est necessaire. L'autre qu'il ne repugne point à la Toute-puissance de Dieu, soit de sa part, ou de la part de la matiere.

## PARTIE DE VXiESME

*De mesme que l'humanité ne pouuoit de soy pretendre aucune part à la gloire de Dieu, sans l'union de la Diuinité. Il est pareillement impossible que l'homme s'unisse à Dieu que par le moyen de l'humanité de Iesus-Christ, & la participation reelle de sa chair & de son sang.*

**N**OVS sommes maintenant d'accord que l'Incarnation du Verbe estoit necessaire, & que l'humanité de l'homme ne se pouuoit eleuer de soy au poinçt de la satisfaction telle que Dieu la demandoit avec Iustice, & que nous luy deuions, si luy-mesme ne se fust ingeré de payer pour nous. Quoy que la porte du Ciel nous ait esté ouuerte, que le voile du Temple ait esté laceré, & qu'il n'y ait plus d'ombre, ny d'obstacle entre l'œil de nostre Foy, & ce beau Soleil de Iustice; Si est-ce que par la recidiue du peché nous tombons en la mesme extremité que le premier homme; toute la difference est que celuy-cy enuoloppe en son crime tous ses descendants. Comme

Iesus-Christ tous les hommes en sa iustification ; & les offenses que nous commettons nous sont personnelles: De sorte que le Verbe n'auroit pas moins de besoin de descendre pour vn de nos crimes, comme pour celuy du premier homme, s'il n'y auoit remedié, se rendant nostre Mediateur par le Mystere de la Passion, & l'institution du S. Sacrement qu'il nous a laissé pour souuerain remede à nos infirmittez, pour consolateur en nos afflictions, & nous reconcilier avec son Pere en nos vrgentes necessitez. Or comme l'humanité du Verbe deuoit estre secourüe de la Diuinité pour l'accomplissement de la loy, & se rendre agreable à son Pere; la nostre refractaire à ses saintes loix, & en estat criminel & de desobeissance, ne se peut releuer pareillement, si elle n'est secourüe de la mesme Diuinité, qui se communique à nous par l'usage des Sacrements, & par son humanité glorieuse qui influë à la nostre en la Communion de l'Eucharistie, les rayons de sa grace, lors que nous sommes en estat de la recevoir dignement: ce que nous sommes obligez de faire actuellement, lors que nous en auons la liberté & la puissance, ou du moins par la foy & communion secrette, qui se peut faire continuellement, & se practiquer entre l'ame deuote & le Saint Sacrement: *Priuationem Sacramentorum non damnat, sed contemptus.* Et nostre Foy ardente a ce priuilege toutesfois & quantes qu'elle s'enflamme dans nostre cœur de nous faire participer au Sacrement de la penitence, & de la sainte Communion & purifier nos crimes en cas de necessité, & que par esloignement

nement ou autre rencontre nous nous trouuassions despourueus dufecours des Prestres & des Ministres. Si la Passion de nostre Maistre eust suffy pour tous les crimes que nous pouuions commettre apres ce Mystere, les Sacraments n'auroiét point esté necessaires & on auroit reproché à la Iustice Diuine, qu'elle auroit seuerément puny & chastié vn peché, pour lacher apres la bride à toutes sortes de crimes, de blasphemés & d'impietez. Qu'a-il fait donc par ce Mystere? il a rompu la glace, nous a frayé le chemin, & conuié de le suivre par le sentier, & la voye de la Croix, & des tribulations. Il nous appelle ses freres: pourquoy? parce que par luy nous deuenons les enfans de son Pere: Et comme son humanité sans l'vnion de la Diuinité ne pouuoit pretendre aucune part à la gloire du Ciel; sans la mesme Diuinité qui se communique maintenant à nous, par le moyen de son humanité glorieuse au Sainct Sacrament, Nous n'esçaurions estre purgés, laués, sanctifiés, ny deuenir ses freres & les enfans du tres-haut. Nostre humanité n'est pas de meilleure maison que la sienne. Et tant s'en faut, la nostre sort toute vermoulüe & mangée du peché dès le Ventre de la mere; & la sienne au contraire, parut au iour aussi nette & aussi pure que la chasteté. Que si en cét estat elle ne peut cheminer ny monter sur le moindre eschelon de la gloire, qu'appuyée sur la Diuinité; nostre pensée auroit-elle bien l'effronterie de pretendre de se presenter deuant le throsne de Dieu autrement qu'vnie à l'humanité de son Fils & esleuee sur les ailes de ce Sainct Sacrament. A mo<sup>ad</sup>-

uis l'Eglise de Dieu ne fut iamais si puissamment établie, ny plus seurement renfermée dans l'enceinte de son vnité, que lors que Dieu par son testament de mort & dernière volonté, tefmoigna aux Apostres le bien qu'il leur vouloit, puisque par l'institution de ce saint Sacrement il se respandit en eux, & dans leur poitrine, & que par le mesme Mystere il les conuertit aucunement en sa substance, & en sa personne; & de tant d'hostes & de conuies qui composoient ce festin; de tant de testes & de membres, ne composa qu'un seul corps, dont il alloit incontinent apres porter la teste dans le Ciel; la presenter à son Pere pour la rēdre plus brillante que le soleil: & aussi cōmunicable que la Diuinité. En fin comme l'Eglise trióphante ne sera qu'un seul corps parfaitement vny à l'humanité du Fils de Dieu, de mesme que celui-cy est vny à son Pere, & comme entre son humanité & Dieu le Pere, il ne pouuoit y auoir d'autre Mediateur que le Verbe, c'est à dire, la Diuinité mesme: Entre nostre humanité & la Diuinité il ne peut y auoir d'autre Mediateur que l'humanité de Iesus Christ: & partant comme celle-cy ne se pouuoit relouer toute seule sans l'assistance de la Diuinité, la nostre tout de mesmes ne le peut sans le secours de son humanité sanctifiée. Donc il estoit necessaire pour nostre salut & sanctification que nostre humanité participast à l'humanité de Iesus-Christ glorifiée pour s'esleuer au ciel, & y prendre la part qu'il a promise à nostre iustification.



## PARTIE TROISIÈME.

*Qu'il n'y a aucune repugnance en la Transsubstantiation: soit de la part de Dieu, soit de la part de la Nature: & partant qu'elle est necessaire*

**LE** reste de sçauoir s'il est faisable, ayant monstré qu'il nous est necessaire. S'il y auoit de la repugnance; il faudroit que ce fust de la part de Dieu, ou de la matiere refusant d'obeir aux volontez de son Maistre. Pour le premier outre que cette verité est sortie de sa bouche, & la dit en termes exprés & significatifs, il n'y a personne qui vueille choquer sa Toute-puissance. principalement en ce rencontre; & qui ne demeure d'accord quel'humanité du Verbe glorifiée, ne soit respandue dans le profond abyfme de la Diuinité. Car Iesus-Christ, en tant que Dieu, est par tout, aussi bien que le Pere, & le Saint Esprit: En vn mot elle est diuinifiée; c'est à dire, quelle prend part à tous les attributs diuins dont elle est capable, elle se jouë dans le sein de la diuinité. Elle peut estre par miracle en tout & par tout, generalement & en chacune partie de l'Vniuers, comme l'ame au subiect qu'elle anime; n'a point de restriction, ny de closture; elle peut estre en mille lieux, & dauantage en mesme temps par presence, puissance,

H ij

& action; & peut informer en vn moment vn nombre infiny de petits pains, & par la meſme raiſon. Toutes es parties de l'Hoſtie apres la conſecration, par ſa preſence réelle & ſubſtantielle, ſans s'incommoder ny eſtre plus en preſſe dans vn Ciboire que dans le Ciel. De ſorte que de la part de Dieu il ne repugne point que ce Myſtere ne ſ'accompliſſe, apres le pouuoir qu'il en a donné, attaché aux formalitez eſſentielles de la choſe. De la part de la matiere nous y trouuerons encore moins de contradiction: elle eſt bien plus obeiſſante & ployable aux volontés & ſouuerains mandemens de ſon Maïſtre, que nous ne ſommes pas. De toutes les choſes créés: Il n'y a que noſtre, volonté qui faſſe de la mutine; & reſuſe l'obeiſſance à ſes ſainctes Loix. Elle ſe perſuade qu'elle ne ſeroit pas libre, & n'auroit pas droit de choiſir, ſi elle n'embrassoit le pire, au preiudice des deſenſes qui nous ſont faiçtes de la part de Dieu. Elle n'eſprouue iamais bien ſa force qu'à rompre, ſa meſure, qu'à tirer de faux alignemens; & ſon empire qu'à tyrannifier. Elle tient touſiours la teſte panchée, ne la porte iamais droicte? En vn mot, elle eſt touſiours attachée à la terre. Les Philoſophes qui ont examiné la matiere & la ſubſtance des choſes, ont dit que c'eſtoit vn poinçt qui fluoit à l'infiny, ſi le cours n'en eſtoit arreſté par les differentes formes, ſous leſquelles elle ſe diuertit continuellement, & ſe jouë comme vn Comedié & vn Farceur, qui ne fait que leuer la Tapifferie pour retourner encore plus plaiſant & plus faceticux qu'auparauant ſur le theatre. En effect elle n'eſt qu'yne qui ſe

jouë le plus souuent dans la region de l'air, & ne laisse pas apres de se diuertir en terre sous des habillemens sensibles, pesants & grossiers. La substance de l'animal se conserue aussi bien dans vne petite larme de semence, que dans tout le corps entier. La quantité, l'extensio, la hauteur, la profondeur & l'espoisseur, comme nous auons cy deuant dict, ne sont que les vertus apparentes de la puissance de la semence qui auparauant estoient cachées occultes & renfermées en ce petit corps. On nous demande que deuiendra la substance du pain, En cas que l'humanité de Iesus Christ en prene la place, qui pourra soustenir & appuyer le faix des accidents, de la quantité, de la qualité, de la blancheur, du goust, de l'estenduë, de la figure, & autres? Commes'il estoit impossible qu'elle se changeast, puis qu'assez facilement elle se conuertit en la Nature de l'air. Il semble que ces gens n'ayent iamais eu les yeux ouuerts, ny considéré le commerce qui se pratique entre les grands corps de la Nature. Ils ne voyent pas à toute heure que l'eau deuiet air, Comme au contraire l'air se change en eau, & l'eau se conuertit en terre: & ainsi se promonent circulairement, sans pour cela que la substance de l'eau se trouue incommodée en la Sphere de l'air, ny la substance de l'air en la region de l'eau. Que si ce progrès est journalier, il n'y a donc point de repugnance en la matiere, que la substance d'une chose deuienne la substance d'une autre, & que celle du pain qui a esté auparauant ærienne, puis aqueuse & apres terrestre, retourne sans presse, & sans incommodité à la mesme re-

gion d'où elle est premierement partie. Donc ce circuit estant commun à toutes choses materielles, corruptibles & perissables, il 'ensuit que la substance du pain se peut separer au mesme instant de l'operation de ce Mystere, & reprendre sa premiere place. Nous voyons tous les iours à la moindre chaleur, la substance de l'eau se changer en celle de l'air, & au moindre fraiz la substance de l'air se coaguler & paroistre sous la substance & les accidens de l'eau. Ce Diuin Artisan qui a ainsi ordonné de toutes choses, a-il racourcy sa main & sa puissance pour ne la pouuoir estendre, & faire ce que la chaleur du Soleil, & le feu de nostre foyer font continuellement à nostre veüe. Mais pour comprendre cecy plus clairement, il faut sçauoir que l'air est le vehicule des influences celestes, & de la quintessence dans laquelle sont enclos les sacrés thresors des semences des choses qui se forment en ce monde sublunaire. La premiere consistence de l'air pour se determiner à la specification de quelque semence que ce soit, & selon la matiere où elle se trouue, est l'eau, C'est à dire, qu'il s'espoissit, se coagule, se corporifie & deuient eau: Et parce que les semences ne se pourroient conseruer, & ne seroient pas de durée, si elles n'estoient reuestuës d'une esforce plus dure, & d'une robbe plus espoisse pour les defendre du froid & de la chaleur, & des autres inconueniens où elle est assubiectie; cet air coagulé se mesle avec la terre plus subtile, & puis se couure d'une autre terre encor plus grossiere, pour cōseruer sous bones & seures gardes le tresor qui luy est cōfié. Mais cette sub-

stance au parauant qu'elle fut entortillée & en brassieres, lors qu'ellen'estoit encore qu'aériene, elle ne laissoit pas de subsister, & d'estre aussi à l'aïse en cette grâde estédue, qu'elle est maintenât dans le sein de la terre. En effet la substâce du pain que nous mangeos cette année, & qui est maintenant grossiere, terrestre & nourrissante, estoit aerienne l'année precedete, & retournera peut-estre encores vne fois en la nature de pain, par le circuit continuél des generations & corruptiôs des choses. Dans nostre estomach, elle se conuertit en chile, en sang, en chair en os, en pituite, en phlegme, en sueur, qui s'euapore enfin & s'exhale, & se conuertit de nouueau en air, retourne derechef en son premier giste, & se promenant ainsi circulairement & par de differents estages, arriue enfin au mesme lieu duquel elle estoit partie; pour paroistre encore vne ou diuerses fois, s'il vient à point sous le mesme genre, ou sous vn autre, sans que pour cela elle cesse d'estre substance. C'est la veritable Metempsychose & transmigration des ames vegetales qui se promouuent ainsi d'un corps en vn autre, qui voyagent, & qui courent diuersités de regions & de regnes. L'air qui descend pour se communiquer à la plante, se renfermer & se conuertir en partie de sa substance, acquiert la liberté de nouueau, quand elle vient à se corrompre, & se resoudre naturellement & sans force, par sa mort naturelle. Car il se fait vn partage volontaire de cette substance, dont vne partie demeure en terre. L'autre qui est la plus grâde, s'eleue en la region de l'air, où elle s'espure, se nettoye, & se modifie pour paroistre encore s'il

vient à point & sous les mesmes vestemens; ou en tout cas se couvre & se pare d'autres habillemens pour s'introduire derechef parmy nous, & jouer vn autre personnage que le premier. A l'esgard de la quantité qui est le soutien & l'appuy des autres accidens qui se peuvent rencontrer en l'Hostie, par la puissance Diuine, elle acquiert la Vertu en la force de subsister par elle mesme. Et partant il n'y a point de repugnance en la transsubstantiation qui se fait au Mystere du Sainct Sacrement de la part de la matiere; puisque de soy elle est obeissante & tousiours preste de deferer aux cōmandemens du souuerain. Il n'y en a point non plus de la part de Dieu, puis qu'il est tout-puissant. Adjoustez encore que la Communion de ce precieux Sacrement nous est absolument necessaire, d'effect ou de Foy pour nostre iustification. Il s'ensuit donc que l'institution de ce Sainct Sacrement, & la participation qu'il nous donne par son moyen, à la chair, au sang, & à l'humanité de Iesus-Christ, estoit importante à nostre salut, & necessaire de necessité absolue à l'ame Chrestienne pour s'eleuer à la gloire de Dieu, & l'vnir au Verbe, dans le sein de la Diuinité.

## SECTION

## SECTION NEVIESME.

## De la Resurrection.

## PARTIE PREMIERE.

*Que la Religion suppose vne loy : que celuy qui y contreuient , & celuy qui l'observe ne doiuent pas estre traitéz de la mesme sorte : & partant qu'il doit y auoir vne autre vie , puisque en celle-cy les gens de bien sont opprimés , & les meschans au contraire gorgés de toute sortes de biens.*

**E**L est certain qu'entre toutes les creatures vivantes, il n'y a que l'homme seul qui ait vne Religion, qui est à proprement dire, vne Loy secretement contractée entre l'ame & le Createur, par laquelle sans aucuns principes, science ou notions precedentes, l'ame de l'homme quoy que nay dans les deserts, & abandonné seul iusques en âge de connoissance sans aucune instruction, se trouue touchée du sentiment d'une Diuinité : ce qui estant vniuersel tesmoigne que cette cognoissance est independante des sens ; Qu'elle est attachée à la partie intellectuëlle de l'homme, comme la lumiere au corps du Soleil. Les sçauans appellent science, toute cognoissance establie sur des principes Vniuersels, certains & infaillibles ; Mais il n'est rien de

plus Vniuersel & certain entre les hommes que le sentiment d'une Diuinité, ce que ie n'entreprends pas de vous prouuer, puisque par les Histoires & les escripts de tous les Philosophes. Vous le sçaués aussi bien que nous; Il s'ensuit donc qu'il n'y a point de science plus assurée, que celle qui nous apprend qu'il y a vn Dieu. Mais la connoissance de cet object produict en nous au mesme instant vne humble veneration, qui s'appelle religion, laquelle n'est autre chose qu'une Loy escripte en nos ames, par laquelle Dieu exige de nous vne reconnaissance dans les ordres qu'il nous marque de ses saintes Volontés. Or est-il, que nous auons cy-dessus verifié, que de toutes les Religions, il n'y a que la Chrestienne qui parte immédiatement de Dieu. Et partant comme satisfaisant par nous, & de nôtre part aux commandements qu'elle porte; Nous meritions recompence de la iustice diuine: & par le mespris d'icellé, tombans dans la contrauention des loix qu'elle nous prescript, nous meritions aussi le chastiment dont elle nous menace. Il est bien certain par toute sorte de droit que celuy qui obeit à la Loy, & celuy qui y contreuient, ne doiuent pas estre traittés d'une mesme sorte, Et partant il faut de necessité qu'il y ait chastiment & recompence. Or est-il que Dieu est source de tout bien & de toute iustice, il s'ensuit donc qu'il ne refusera pas le salaire qui nous est promis par ses saintes Loix, non plus que la punition dont elles menacent l'horreur de nos crimes. Nous voyons neantmoins pour l'ordinaire que les richesses, les prosperitez mondaines, les dignitez & les faueurs de



la fortune sont la part & l'heritage des meschans en ce monde, & les plus iustes & plus gens de bien en ont le moins. Nous voyons aussi mourir le meschant gorgé de biens, & au milieu de son affluence; & le iuste dans le liét de ses tribulations; il s'ensuit donc que le chastiment, & la recompense de la iustice Diuine sont reserues en vn autre siecle, & partant il y aura vn autre regne, & vn autre monde que celuy dans lequel nous viuons, ou nous serons appellés pour y receueillir les fruits de nostre moisson, & nostre ame sera encore vne fois iointe à ce mesme corps pour iouir d'vne nouuelle vie dans vn estat plus parfait que le nostre, puisque ce sera vn coup de la main de Dieu.

## PARTIE DEUXIESME.

*Que la matiere qui entre en la composition de l'homme peut estre vitrifiée & rendue aussi transparente, & durable que le cristat: Il n'y a donc point de repugnance de sa part que l'homme ne puisse ressusciter.*

**Q**UE si nos sens sont tesmoins que la Nature prend plaisir tous les iours de composer avec de l'air & de l'eau meſſangée avec vn peu de terre, des corps si espurés, qu'il n'est plus au pouuoir des elements ny de la corruption mesme d'entreprendre de les destruire, & ne peuvent estre

parfaitement dissoults que par le feu d'une volonté Diuine, tels que sont les metaux, les diamants, & les Astres qui se forment iournellement dans le Ciel, de la terre. Si toutes choses dis-iesont composées de mesmes principes que ces corps pretieux, Et si l'art & l'experience nous enseigne que de toute chose terrestre il est facile d'en faire du verre: Et ne repugne point au sens, que la matiere qui entre en la structure & composition de nostre corps, ne puisse estre vitrifiée & rendue aussi claire & transparente que le cristal: Pourquoy donc douterons nous d'une nouuelle regeneration, puisque le corps de soy a une disposition à l'incorruptibilité. De dire qu'il est conuertty en cendres par la pourriture de la terre, cela ne contredit pas si nous nous voulons rapporter aux plus sçauans & experimentés Naturalistes, qui nous apprennent que la figure, les couleurs, les dimensions & iustes proportions des corps se conseruent dans leurs sels, c'est à dire leurs cendres; dequoy Vignere & Bacon ont fait des experiences sur des fleurs dont les sels, en vaisseau artistement fait, exposés à une douce chaleur, representoient entierement la fleur de laquelle ils auoient esté extraits par artifice. Que si nostre corps retient en soy des dispositions si merueilleuses, quoy qu'il n'ait esté destiné du Très-haut, que comme vn estuy & vn vaisseau pour recevoir & conseruer ce tresor precieux, ce souffle diuin qui est parti de la bouche de l'eternel? pourquoy cette Ame glorieuse n'aura elle pas des qualités bien plus éminentes, & consequemment éternelles; pour ne la pas cognoistre ny sentir,

pour ne la pouuoir renfermer dans vos mesures, ny dans vos balances, pour ne la pouuoir assujettir a pas vn de nos sens, C'est tres-mal inferer, de dire qu'elle ne peut subsister reellement separée d'auec son corps. L'air mesme que nous mettons au rang des choses corporelles, se sçait bien soustraire à la iurisdiction de vos sens, & l'œil dont vous faites tant de cas, n'a vn empire bien estably que sur les objets grossiers & accablés de matiere, encore faut-il qu'ils soient renfermez dans vne certaine estenduë à luy proportionnée: portés l'objet vn peu plus loing que sa mesure, il ne sçait plus, si c'est vn oiseau ou vne pierre. Je diray plus, pour peu de vestement que vous ostiés aux objets materiels, ils se débent à vos yeux, & à la cognoissance de vos sens. L'eau que nous voyons, goustons, touchons & sentons, si vous la depouillez de sa robbe grossiere & apparente, par le secours d'vne chaleur mediocre; elle se resoult en vapeur, & setrouue enfin que peu à peu elle s'est échappée à vos yeux, aussi bien qu'au reste de vos sens: parce qu'elle ne nous estoit communicable que sous cette chemise blanche, espoisse & cōdensée qu'elle auoit auparauāt; l'a elle deuestüe, l'odorat ne la sent plus, la main ne la peut toucher, l'œil l'appercevoir, le goust en iuger, ny l'oreille en cognoistre; Neantmoins elle ne laisse pas de subsister aussi reellement apres sa rarefaction, qu'elle faisoit auparauant en sa condensation. Et comme en cet estat grossier, elle est soubmise à la discution de nos sens, qui discourent de ces propriétés & qualités, comme bon leur semble? Quand elle est rarefiée & hors de

leur iurisdiction, nostre intelligence ne laisse pas encore de discourir de sa substance & de ses vertus comme elle faisoit auparavant; la rarefaction, n'estant qu'un accident qui n'altère point la Nature de la chose, en sorte que nostre entendement ne cognoist, & ne ratiocine pas seulement des choses sensuelles: Mais aussi de celles qui pour n'estre pas sensibles, ne laissent pas d'estre réelles. Il ne faut donc pas s'arrester à la foible & debile cognoissance des sens pour y vouloir assujettir tout estre, & toute cognoissance; ny reprouuer & condamner tout ce qui est hors de leur empire, telles que sont les choses spirituelles, & particulièrement l'ame de l'homme, laquelle ayant merité ou demerité en la compagnie du corps, y sera revnie pour recevoir ensemble le chastiment ou la recompence: Priuilege qui entre toutes les creatures ne peut estre accordé qu'à l'homme seul, au moyen des prerogatiues que nous auons cy-dessus remarquée, luy estre particulieres.



## PARTIE TROISIEME.

*Qu'en la Resurrection le vice & la vertu s'esleueront contre nous, & nous accableront de reproches, de nous estre portés en toutes choses, contre leurs sages conseils.*



E fera lors que le vice & la vertu s'esleueront contre nous, pour nous conuaincre, & nous accabler de reproches: Ils se vanta-  
ront tous deux d'auoir icy combatu à l'enuie pour la gloire de nostre souuerain Maistre, & pour nostre aduantage, & que nostre endurcissement a esté la seule cause de nostre perte. Celle cy fidelle compagne de la Religion, nous représentera qu'elle ne s'est iamais faisie d'une belle ame, qu'à l'instant mesmes, elle ne l'ait remplie & comblée de joye, & de satisfactions interieures, pour arres certains & assurez de cette souueraine felicity, de laquelle elle nous marquoit toutes les aduenues, & que son visage graue & seuer n'est pas vne excuse legitime du diuorce que nous auons fait avec elle. Qu'elle n'a pas laissé pour ce mespris de nous rechercher avec tant de presse & d'importunité, que par force nous l'auons chassée de chez nous: Et l'ayant enfin bannie de nostre maison, & des plus belles compagnies, elle a esté contrainte de se renfermer dans les cloistres, & se retirer dans la solitude, & dans les deserts.

Le vice partisan de l'impieté dont nous auons fait nostre idole pendant nostre vie, duquel nous nous sommes rendus les esclaves, ne nous sera pas plus fauorable? Il nous reprochera nostre lascheté, & nostre peu de sentiment; Qu'il n'a pas tenu à luy que nous n'ayons suiuy le party de la Vertu; qu'il est vray qu'il nous a sollicité par quelques charmes exterieurs de le receuoir chés nous, & luy donner retraite; mais qu'à l'instant il a leué le masque, nous a descouuert toutes ses disformités, qu'il a par sa presence continuellement troublé la tranquillité de nostre ame? Qu'il a sans cesse égratigné & vlceré nostre conscience, & par vn fiel dont il a empoisonné les plus delicieux mets de nostre vie, nous a fait gouter par aduance les fruiçts de la fin malheureuse, où il nous conduisoit; Que si nous-nous sommes attachés à le suivre avec tant de fidelité; que c'est à nostre opiniastrété, & à nostre endurcissement qu'il s'en faut prendre, plustost qu'à ses flateuses œillades: Qu'il ne nous a pas celé ses defauts; que de soy il est si laid & contrefaict, qu'il estoit obligé pour se cacher d'vser de fard & d'artifice: Apres tout que ses plaisirs n'estoient que passagers, ses agréemens superficiels, & son humeur si volage, qu'il n'a iamais vieilly plus d'un iour dans vne ame, qu'il ne l'ait rongée & ensanglantée de ses propres mains, pour obtenir de nous le congé qu'il nous demandoir, & la liberté de sa retraite. Voila le miserable estat, dans lequel nous resterons, despourueuz desecours & de consolation, abandonnez à la cholere & au chastiment d'un Dieu iuste, & irrité.

## SECTION

## SECTION DIXIESME.

## De l'Immortalité de l'Ame.

## PARTIE PREMIERE.

*La malice des Tyrans a fait tous ses efforts pour se persuader que nostre Ame estoit mortelle, & se mettre par ce moyen aucunement à couuert du chastiment de Dieu.*

**S**I les crimes & l'impieté des hommes, n'auroient produit par aduance les peines que la Loy Diuine establit pour leurs chastimens, iamaïs ceste questiō n'auroit esté agitée entre les Philosophes, & n'auroit point esté necessaire de se mettre en peine de prouuer par raison, le veu dire par l'induction des sens, l'estre & la qualité d'une substance qui ne leur est point subiette. Mais comme les Tyrans, & les plus perfides d'entre les hommes ont recogneu qu'il n'y auoit pour eux aucune satisfaction dans les plaisirs de cette vie, s'ils estoient continuellement trauersez de la crainte de l'aduenir; Ils ont mandié en l'eschole des Philosophes des raisons pour se liberer de cet arrest de condamnation, que la Nature a imprimé sur chaque crime; & dont il nous fait lecture, & nous entretient à son arriué. Reconnoissans donc que tous d'un com-

mun consentement demeueroient d'accord de l'Immortalité de l'ame: Ils ont cherché le secours des Parasites, Escornifleurs, Impies, & Libertins, qui pour se rendre necessaires aux passions de ceux qui les pouuoient deffrayer; d'vne mine estudiée ont dit qu'il n'estoit pas croyable qu'elle eust plus de priuilege que l'ame d'un cheual. Et partant qu'il estoit permis de douter de son Immortalité. Est-ce pas raisonner d'une belle sorte? Et apres cela ils veulent passer pour grands Philosophes. Ce seroit bien assés de vous renvoyer à la Section precedente pour terminer ce different. Mais parce que vous estes vn peu mal-aisé à esconduire, & que vous n'estes pas fâché qu'en vne dette de cette nature, on vous paye plus qu'on ne vous doit, & plus encore que vous ne demandés, Je vous adiousteray quelques raisons le plus succinctement qu'il me sera possible pour vous donner vne entiere satisfaction. Le consentement de tous les Philosophes, la croyance de tous les Estats & Empires de la terre, & l'approbation vniuerselle de tous les peuples, à mon aduis est vne preuue bien forte, & bien concluante pour nous. Que si vous ou quelque autre, aués seul en vostre esprit plus de raisonnement que tous ces grands Philosophes Egyptiens, Arabes, Grecs, Latins & autres, plus d'ordre que toutes les Republiques, & plus de lumiere que toutes les nations; Vous me ferez plaisir de m'en faire part, & m'oblige en ce cas de les faire encore valoir contre vous à l'auantage de nostre cause.



## SECONDE PARTIE.

*Le desir de l'immortalité que Dieu a inseparablement attaché à l'ame de l'homme est une preuve indubitable de l'estat glorieux & immuable qui luy est promis.*



ES raisons sont belles & apparentes, ce dites-vous, Mais vous souhaitteries volontiers qu'on forçât & contraignit vostre esprit à n'auoir point d'autre pensée, & ne pouuoir former aucun doute sur cette question. Je vous dis donc, que tout noble agent, qui produit vne chose réelle, & luy imprime quant & quant vn desir naturel, & vn appetit violent d'arriuer à vn but & object déterminé; doit luy fournir aussi l'object proportionné à la puissance de son desir, capable de le remplir, & le satisfaire suffisamment. Donc comme la chose produicte est réelle; l'object, & le moyen d'y paruenir le doiuent estre pareillement. Si vous vous en rapportés à la Nature, elle vous dira qu'elle le pratique ainsi en toutes choses. La pierre qui est vne chose réelle animée de l'appetit & desir de son centre, qui est son object & sa fin, estant separée de sa Sphere, est en inquietude perpetuelle, iusques à ce qu'elle y soit rejoincte. Nous ne pouons retenir le feu enfermé & enclos icy bas, parce qu'il est touché de son object réel, par vn desir si ardent,

K ij

& vne inclination si pressante , qu'il fait violence à tout ce qui s'oppose à son intention. Les plantes, quoy que renfermées dans le sein de leur mere, forcent la dureté de la terre , & poussent leurs petites pointes, leurs tiges, & leurs fleurs au dehors , par ce que l'air est leur desir, l'object de leur vie & de leur respiration. Or est-il, que Dieu est vn Agent tres-parfaict, & infiniment esleué au dessus de la Nature: Donc puis qu'il a imprimé en l'ame, qui est vne chose réelle, pour but, & pour object l'immortalité, & que toutes choses arriuent à la fin pour laquelle elles sont créées; Il s'ensuit que l'immortalité réelle ou vn estar immuable est l'object auquel elle doit enfin arriuer , pour appaiser par son aymable ioüissance, l'ardeur du desir qui la brusle , & l'enflamme continuellement, & par consequent l'ame de l'homme est immortelle.

Mais quel extrauagant se pourroit'imaginer qu'un excellent Artiste pourueu de sens & de raison, s'aduist de faire vn quadran sur vn pied-de-tail, fixe & arresté pour tousiours dans le fonds d'une caue, où le Soleil ne donneroit iamais, & où il ne pourroit venir d'autre clarté, ny d'autre iour, que celui de la chandelle. Puis que son principal dessein n'est autre que de luy faire marquer les heures & les minutes au cours ordinaire du Soleil. Qui sera donc celui qui nous dira que Dieu ait embrasé l'ame de l'homme du desir de l'immortalité , & qu'il l'ait signalé & séparé par cette marque d'avec toutes les autres creatures pour n'estre pas immortelle.

P O V R la seconde proposition, par laquelle nous disons que l'ame est naturellement touchée & pressée

del'immortalité. Il ne faut que se toucher & se sentir : Il n'y a point d'hommes il n'est frenetique, ou troublé de sens & de raison par l'excés de quelque douleur, qui n'apprehende la mort: Donc par la regle des opposés, il n'y a personne qui ne desire de viure tousiours. Le veritable Chrestien, est celuy seul qui à l'imitation de saint Paul, souhaite la fin de sa vie, par la mesme raison encore del'immortalité; D'autant que l'amour de son Maître, & le pressentiment qu'il a de la jouissance de son Dieu, brulle son ame de cet ardent desir, qui se rend d'autant plus cuisant & plus violent, qu'il a plus de lumiere que pas vn autre de son estre, & de l'estat veritable de l'immortalité. Chacun traueille à cette fin? Si vous vous vous en rapportés aux anciens Philosophes Orateurs, & aux Poëtes (les Theologiens de leurs siecles) par le moyen de leur plume, ils ne vous promettent pas moins que l'immortalité: Mais pour desbauchée que puisse estre nostre ame dans le commerce des passions, s'en desdit-elle iamais? Demandés à l'ambitieux pourquoy il outrage la raison, & viole toute sorte de droict? il vous respondra que c'est pour remplir les Annales d'un nom de deux ou trois syllabes? L'avarice mesme qui ne sent que le relant & la terre, cōme les sepulchres, toute courbée de vieillesse & penchante qu'elle est, accumule tousiours, & ne se persuade pas encore d'en pouuoir assés amasser pour sa prouision. Peu de gens s'apperçoient & cognoissent la raison de ces sortes de mouuements, & ne sçauent pas que ce desir naist de nostre ame, comme vn rayon de lumiere, qui par

vn surcroist de clarté se communique aux sens extérieurs, & se respand mesmes insques aux parties les plus materielles, en traissant quelque chose quant & soy de cette flamme immortelle, par le tesmoignage qu'elle nous donnent, ou de se vouloir tousiours conseruer aux despens mesmes les vns des autres; Quand pour exemple il est necessaire de couper vn bras ou vne jambe, pour sauuer le reste du corps: ou du moins de se vouloir perpetuer tant qu'elles peuuent en leurs descendants. Bref, le sentiment de Dieu & de Religion vniuersel à routes les nations est vne preuue indubitable dece desir naturel de l'ame.

Donc pour nous recueillir, nous disons que toutes & quantefois que de deux termes relatifs formés par vn agent, auquel il ny a aucun defect de puissance, l'un s'achemine à l'autre par vn coullément perpetuel, & ne s'arreste point qu'il n'y soit paruenue: Comme l'amant à la chose aymée; Quand l'un subsiste réellement, l'autre de necessité, doit aussi auoir vne subsistenceréelle, avec toutes les conditions necessaires pour l'accomplissement de leur fin. Or est il que Dieu est vn agent tres par fait, tres. puissant, & qu'il a embrasé l'ame de l'homme du desir de l'immortalité; donc l'éternité réelle; C'est à dire vn estat immuable exempt des alterations & mouuements violents, auxquels l'ame est sujettedans la prison du corps, est le terme auquel elle s'achemine, & doit aboutir certainement? Et partant l'ame de l'homme est immortelle.

En effect ce seroit vne extreme impieté, de se per-

suader que Dieu qui a marqué toutes choses d'un desir particulier, comme d'un coin different pour les recognoistre, & qui les conduit toutes seurement par la main iusques à leur but, eut renuersé l'ordre de sa sapience en ce rencontre, pour donner à l'ame de l'homme le plus noble de ses ouurages, ce pressant desir d'immortalité, si elle n'estoit immortelle: Mais comme cette impieté ne peut treuuer de place dans le cœur le plus perfide, & le plus irreligieux pourueu qu'il soit raisonnable; Aussi ne se peut il treuuer d'homme pour peu qu'il ait de sens qui doute de l'immortalité de son estre.

## PARTIE TROISIEME.

*L'ame de l'homme est vne substance Spirituelle;  
incapable de corruption, & partant  
immortelle.*

**JE** vous dis plus, toute substance spirituelle est incorruptible, d'autant que la corruption & la mort, n'ont aucun droit ny empire sur les choses simples, mais seulement sur les composées; la mort n'estant qu'une dissolution & separation des parties dissemblables. Or est-il que la Nature d'une chose simple ne peut admettre en soy aucune diuision ny separation de parties differentes, puis qu'elle n'en a point; Et partant n'est point sujet à la mort. Or il est certain

que l'homme est vne substance spirituelle, & partant elle est immortelle: Qu'elle soit spirituelle, il est aisé de le verifier. Toute substance est ou materielle ou spirituelle: mais l'ame de l'homme n'est point materielle, & partant spirituelle. Que l'ame de l'homme soit immaterielle, ie vous le prouue par deux raisons.

La premiere est que tout ce qui est materiel, quelque appetit affamé qu'il puisse conceuoir de son objet, il s'appaise & s'esteint facilement dans la iouissance de la chose materielle qui l'auoit embrasé. L'experience que nous auons de toutes choses nous l'explique assez clairement, & par effet il se trouue tousiours vne certaine proportion & voye d'accord entre les relatifs; La chose qui desire, & la chose désirée, qui s'accomplit en l'vnion par le remplage de la capacité materielle de l'esprit enflammé. Par exemple, la faim de nostre estomach se tempere & s'appaise du tout, par l'usage du boire & du manger; le goust par le passage & coulement des viandes, l'appetit sensuel & brutal s'ammortit en la iouissance, & ainsi successiuent de tous les sens materiels. Or est il que le desir de l'ame, quoy qu'elle s'abandonne aux volontés du corps & passions des sens materiels, iusqu'à cōsentir elle mesmes à l'oubly volontaire de toutes ses aduantages, & affecter la ruine par l'abandonnement qu'elle fait de Dieu, & par l'esloignement de son principe: ne peut neantmoins se gorger & remplir d'aucune chose materielle telle qu'elle soit. Tout ce qu'il y a d'or en la terre, & d'ambition sous la Couronne des souuerains ne peut appaiser son infatiable

fatiable desir : Et quoy que tous les sens materiels qui luy sont sousmis , se peinent & se trauaillent pour cét effect , qu'ils soient plainement satisfaits , & mesmes ennuiés, lassés & degoustés de trop de iouissance, elle ne laisse pas de brusler encore d'auantage au milieu de son affluence: la satieté n'arriue iamais iusques à l'ame. Dans sa desbauche & abandonnement elle gourmande l'appetit sensuel , & querelle ses rassaux, qui sont les sens inferieurs, d'estre si tost remplis & satisfaits. En effet, les sens de l'homme comme materiels sont autant de petites bouettes ou vaisseaux qui ne peuuent rien contenir audela de leur grandeur & mesure prescrite: L'ame au contraire est d'une capacité qui correspond à sa Nature, C'est à dire qu'elle n'a ny bornes ny mesures. Tout ce que ce large Vniuers comprend, est forcé & violé par la pointe de ses desirs ; En vn moment elle descend au profond des abismes: En l'autre elle s'eleue iusqu'au Trosne de la Diuinité, elle desborde continuellement comme vn grand fleuue, & surmonte les digues de la nature: Il n'y a point de science qui la puisse remplir , & n'a point d'arrest & de repos qu'en la Diuinité. Je dis donc, tout ce qui est materiel est renfermé dans de certaines mesures, comme la terre, leau, l'air, le Ciel, & l'Vniuers mesmes à les siennes, qui l'envelopent & le determinent: Or est-il que l'ame de l'homme n'en à point, & qu'il n'y à que Dieu seul qui en borne l'estenduë, & luy serue d'envelope: Et partant l'ame n'est point materielle, donc elle est spirituelle.

P O V R seconde raison , ie vous mets en auant,

**L**

que les idées de Platon, les essences des choses, les notions Metaphisiques & transcendantes, les estres de Logique & de raison, c'est adire intellectuels ne subsistent point matériellement, quoy quereellement: Car l'estre que nostre esprit a abstraict & recueilly de toutes les choses, pour en former vne nature distincte, & qui peut indifferemment s'attribuer à la nature Angelique, Comme à l'animale, vegetale, & minerale est vne production de l'ame qui subsiste exempte de corruption & de matiere. Or est-il que le materiel ne peut produire ny engendrer l'immatériel, ny aucune chose, donner ce qu'elle n'a pas? il s'ensuit donc que l'ame de l'homme, qui produict & enfante ces estres de raison incorruptibles & immatériels, de necessité doit estre incorruptible & immatérielle, & partant elle est spirituelle. Or est-il que toute substance spirituelle est incorruptible & immortelle, parce qu'elle est simple, & n'a en soy comme nous auons dit aucuns principes de diuision, ny de corruption? Il s'ensuit donc que l'ame de l'homme est immortelle, & par consequent affranchie des loix de la corruption & de la mort.



## QUATRIESME PARTIE.

*Que l'amour de Dieu particulier à l'ame de l'homme, entre toutes les creatures, doit rendre Dieu mortel comme nous, ou l'ame doit estre immortelle.*

**L'**Amour de Dieu que nous ressentons en nous mesmes, à mon aduis est la seule chose qui nous doit faire perdre la mauuaise opinion que nous donnent ceux qui declament contre la misere de nostre condition, puisque nous ne sçaurions aimer Dieu, que nous n'en soyons premierement aimez; Ce qu'il est facile de prouuer, car l'amour de Dieu en l'homme est sans contredict, la source de tout bien, & partant il est en nous la premiere cause de cét amour diuin. Et comme nostre œil ne peut voir le Soleil, sans l'aide du Soleil mesme; Ainsi nous ne sçaurions aimer Dieu, si Dieu mesme n'est la cause & le principe de nostre amour: Il est donc vray que Dieu veut que nous l'aimions. Cette maxime est encores veritable entre les Philosophes, que celuy qui faict & produict vne chose pour vne fin; s'il est assez puissant luy doit aussi fournir tous les moyens, & faciliter toutes les voyes necessaires pour y paruenir. Car si vous voulés enuoyer vostre lacquais à vostre amy pour quelque affaire importante, vous deués quand & quand l'instruire, luy en-

seigner le lieu, ou il est, le chemin qu'il doit tenir, & fournir encor tout ce qui est nécessaire pour son desfray. Or est-il que Dieu veut que nous l'aimions; ce que l'homme de bien ressent & esprouue estre nay avec luy: le meschant & le perfide n'en peuuent aussi douter; car quelque crime qu'ils commettent en cachette, ils ne laissent pas de sentir leur conscience en murmurer au dedans, qui les remplit de crainte & de terreur aux moindres perils de la mort. En effect, celuy qui se pend & se desesperé du déplaisir qu'il à d'auoir trahy son maistre, ne donne pas moins de certitude du principe de son amour, quel'autre criminel qui se iette a ses pieds, & luy demande misericorde. Ce desesperoir, cette crainte, est vn effect de cet amour naturel, interne secret & caché, qui se mutine, & ne peut souffrir de violence; & quelque interest de plaisir, ou de volupté presente qui s'efforce de l'appaiser, il ne laisse pas de produire des remords qui excitent de continuelles conuulsions en nostre ame, tant il est vif, sensible & mal endurant.

DONC puis que Dieu est en nostre ame, cause & principe d'amour, comme en toutes choses il est principe de l'estre, & qu'il en est aussi le mediateur, parce qu'il les conduit toutes à leur fin, & à la perfection de leur estre; il s'ensuit que Dieu qui est vn agent tres-puissant & tres-parfait, est obligé pareillement de nous conduire à la fin qu'il nous propose; Nous garantir la iouissance & vnion parfaite de son amour, avec le sauf-conduit & seureté du passage; Nous en faciliter les aduenues; & nous marquer tous les degres nécessaires pour

y paruenir. Ce qu'il a soigneusement executé de sa part : C'est la raison pour laquelle il falloit que son saint Esprit nous traça luy-mesme par les diuins preceptes de la Religion Chrestienne, la guide des chemins, la voye de salut, & tous les moyens necessaires pour nous conduire & faire aborder heureusement au port de sa grace.

Or est-il que l'amour a cela de propre, qu'il conuertit en sa nature les choses qu'il fait siennes; Donc puisque Dieu qui est tout amour se laisse blesser au nostre, & qu'il y respond mesme par des flèches mutuelles; Il faudra que Dieu deuienne mortel, ce qui est absurd: Ou bien comme la plus grande lumiere attire à soy & consume la moindre, quel'amour Diuin, comme vn grand Ocean engloutisse le nostre, & le conuertisse en soy-mesme: ainsi nous jouyrans en Dieu de Dieu mesmes, & par consequent nous serons eternels; Et puis qu'il n'y a point de milieu entre ces deux propositions, il s'ensuit donc que l'ame de l'homme, seule entre toutes les creatures, touchée de l'amour de Dieu, sera seule immortelle, & qu'elle a Dieu pour but, pour object, & pour recompense, en cas que sa liberte ne la trahisse point, & qu'elle demeure dans la sainte obeissance des sacrés mandemens de la loy.

## CINQVIESME PARTIE.

*Ceux qui cognoissent le mieux les forces de la raison, sçavent bien qu'elles sont si foibles en toutes choses qu'il ne s'y faut pas fier.*



R comme nous auons monsté que Dieu dispose de son bien, & de l'honneur que nous luy deuons ainsi que bon luy semble, & dans la maniere qu'il luy plaist? Que tous cultes indifferemment ne luy sont pas agreables; & que la Religion n'estant autre chose qu'un sacrifice, & mortification de nos volontés, qu'il n'y a que nostre obeissance & nostre humilité qui luy peuuent plaire; Il ne faut pas s'estonner des differentes loix, qu'il a pleu à Dieu de nous donner en temps & lieu, auxquelles il a attaché nostre iustification ou nostre condamnation: Il n'est point obligé de nous en rendre compte, & puis que nostre raison nous fournit assés de lumiere & de secours pour nous acheminer en la cognoissance de ces Mysteres; Il est certain que nous serons criminels & reprouvés deuant le throsne de la Diuine Iustice d'en auoir abusé, ou nous en estre seruy plustost pour nous auengler que pour nous esclaircir. Employés equitablement & avec Iustice vostre esprit autant à cognoistre qu'à contester; & vous trouuerez par vne forte speculation, qu'il y a bien plus

deraison de croire que de douter. En croyant vous suivés le sentier d'une vertu heroïque, dont la fin ne peut estre mauuaïse. Faisant le contraire, vous vous soubmettés à l'indignation de Dieu, dont la iuste crainte est vne furie presente qui traaverse toutes vos joyes, & qui dans la rencontre des accidens perilleux, ou des moindres maladies vous remplit l'ame d'horreur, de desespoir & de confusion. Ceux qui par leurs profondes meditations ont le mieux cogneu & fondé les forces de la raison humaine, sçauent bien qu'il ne s'y faut pas fier; & qu'il est bien plus expedient faisant diuorce avec elle, de se reposer entierement sur les aïlles de la Foy, comme l'Aigle Diuin, comme l'oiseau sacré qui nous approche le plus pres de la Diuinité. La raison au contraire, ressemble au Corbeau, qui s'amuse à la charongne: Elle roule & tourne sans cesse autour des objects materiels, sans les pouuoir desuelopper, ny les cognoistre que superficiellement; Pourquoy voulons donc nous confier entierement à elle, dans vne cognoissance si importante, & si releuée? Les plus grands hommes de l'antiquité, ceux mesmes qui ont esté enseuelis dans les profondes tenebres du Paganisme, en sont demeurés d'accord, & ont dit hardiment qu'un homme ne pouuoit iamais estre grand personnage, sans l'assistance & le secours d'une lumiere & inspiration surnaturelle, *sine afflatu diuino nemo vnquam vir magnus*. Or est-il, que cette lumiere diuine, dont ils n'ont entreueu que de foibles rayons, ne se peut acheminer plainement à nous, que par le moyen d'une Foy Chrestienne, & d'un ardent amour.

Et partant il y a bien plus d'apparence, voire mesme de science à croire, qu'à raisonner. Cette sage humilité nous vnit à Dieu bien plus seurement, qu'une insolente gloire, qui se peine de leuer sa pesante masse iusques au Ciel, & dont les vains efforts ressemblent enfin aux ampoules qui se forment sur l'eau; Elles se grossissent le plus qu'elles peuuent, & lors qu'elles paroissent les plus enflées, elles creuent, & ne produisent que du vent. *Quis enim hominum scire poterit consilium dei, & quis cogitare poterit quid velit Deus?*

## SECTION ONZIESME.

### De la Prouidence.

#### PARTIE PREMIERE.

*Que les moyens dont la Prouidence Diuine se sert pour acheminer toutes choses à son but, sont directement opposés à la conduite & Prouidence des hommes.*



E toutes les choses qui tombent souz la connoissance de l'homme, il n'y en a pas vne de si claire & si euidente que la Prouidence de Dieu: Soit que vous esleuiés les yeux au Ciel, soit que vous les abbaissiés en terre, ou que d'une meditation plus concertée & plus aiguë vous les portiés au dedans de vous-mesmes, pour y obseruer cet ordre merueilleux,

ueilleux, quilie & enchainne le mortel, & l'incorruptible, le raisonnable & le sensuel, les parties grossieres & pesantes aux ressorts del'esprit qui meut en vn clin d'œil les plus esloignées: Vous estes surpris d'estonnement & d'admiration, & reconnoissés facilement que cette police si bié réglée procede de la conduite d'un Magistrat, qui ne se trompe point en ses conseils. Cette Prouidence n'est autre chose qu'un ordre certain & infaillible, par lequel Dieu pour sa gloire conduit toutes choses à leur fin, par des moyes qui nous sont incogneus. Pour estre assurez de la fin où tendent les choses naturelles, nostre esprit n'anticiperié sur les moyens dôt cette sagesse infinie se sert pour les y acheminer. Celuy qui par la course ordinaire nous donne le iour, qui marque les années, les saisons, les mois, & les heures, nous a-il jamais discouru de cette vertu secrette, par laquelle il se porte avec tant de rapidité de l'un à l'autre hemisphere; & celle qui luy sert de miroir, qui prend le soing de nous servir de flambeau sombre & sourd pour ne point violer le respect qu'elle doit à nostre repos, & à l'obscurité de la nuit, se trompe-elle en la diuersité des figures, dont elle se pare chaque mois? manque-elle en son cours, en son declin, en ses mouuements? y a-il rien de mieus réglé que la voye & le chemin des planettes, le cours & la cadence des Astres? Ce grand vuide de l'air qui attire par le feu secret de cette Diuine Prouidence les vapeurs, & les exhalaisons continuelles; Manque-il à les espoissir & les renuoyer en pluyes douces qui humectent & rafraischissent la terre? Et parce qu'engrossées des influences celestes; elles

retombent plus riches qu'elles ne s'estoient esleuées, la joye qu'elles ont de retourner en leur patrie, leur tire des larmes precieuses, qui rendent nos moissons fertiles, qui parent le sein des fleurs, qui engraisent les fruiçts, semēt la fœcondité par tout où elles se respandent, & enrichissent toute la Nature? Si vous interrogez les oiseaux, qui leur a donné l'industrie & l'ingenieux artifice qu'ils nous font voir en la structure de leurs nids, composés de pieces & de materiaux si bien choisis, & si adroictement tissus, ils vous respondront que c'est cette Prouidence. Si vous-vous arrestés à remarquer les ordres merueilleux qui s'observent en la Republique des Abeilles, l'adresse qu'elles ont en leurs pillages, elle est si subtile & si industrieuse que si vous ne les prenés sur le faict, elles vous desrobent ce qu'il y a de plus riche en vostre parterre, sans que vous le puissiez recognoistre, ny leur reprocher le larcin qu'elles vous font. La plus petite des creatures vivantes confond par ces merueilles la sâpièce mondaine & nous fait bien cognoistre. qu'il n'y a rien pour petit qu'il puisse estre qui eschappe à l'œil de nostre Prouidence Diuine. La terre s'oublie-elle de nous mettre la nappa, & la couvrir de toutes sortes de mets? La nuit ne succede-elle pas au iour & le repos au travail? L'automne qui a espuisé les forces & les moiuelles de la terre, traîne-il pas l'hyuer apres soy pour l'enrichir & engraisser de nouveau par les neiges, les pluyes & les frimats? Et le Printemps, comme vn prodigue manque-il d'estaller à vos yeux, les thresors que l'avarice de la saison precedente auoit amassé, & renfermé dans son coffre fort. L'Esté



refuse-ili jamais de cuire, d'apprester les viandes, & de vous succrer les fruiets, qui autrement n'eussent eu pour vostre goust que de l'aspreté & de l'aigreur. Les femmes deuiennent-elles infœcondes? les animaux destinés à l'usage de vostre nourriture, sont-ils accusés de sterilité? & ces profonds thresors qui reposent dans les entrailles de la terre, & que l'ambition & l'auarice des hommes ne peuuent espuiser, ne forcent-ils par l'ame la plus ingratte à la recognoissance de cet ordre Diuin, & de cette Prouidence suprême qui se plaist à nous obliger? Ce tableau que ie viens de descourir à vos yeux a beaucoup de raretés, & bien que nous soyons assurés de la fin réglée à laquelle se determinent toutes les choses naturelles, nostre science neantmoins ne peut mordre sur la cognoissance des moyens par lesquels elles sont meües, poussées & conduites avec tant de regle & de certitude; mais si par vn effort extraordinaire nous essayons d'examiner les voyes par lesquelles cette sapience increée s'est resoluë de s'acheminer pour releuer nostre dommage, & reparer toutes nos pertes, nous sommes forcés de nous escrier, O profondeur! O abyssme incomprehensible de bonté & de puissance? que vos desseins sont esloignés de la Prouidence des hommes, & que nostre conduite a peu de rapport à l'ordre que vous prescriuët vos sages conseils! Puisque vostre dessein estoit de nous ouurir la porte à la grace, & de concilier nos crimes avec vostre misericorde; Il ne falloit qu'un mot de vostre part; au lieu d'une creiche miserable, vous eussiez rencontré des superbes Palais, des departemens à choisir,

parés & enrichis de ce que l'or & la soye ont de plus précieux. Letrain, les valets, les courtisans, l'obeissance des hommes, & la déférence de toutes les creatures auroient bien-veigné vostre naissance, & on n'auroit point souffert que vostre Majesté Diuine eut esté exposée aux iniures du peuple le plus ingrat de la terre. Mais Dieu se rit de nos pensées; Nous faisons comme les enfans qui pour nous obliger nous presentent vne noix, ou vne pomme; il nous remercie de toutes nos offres, Il n'est point enuieux de nos biens, & de nos richesses, rien icy bas ne luy fait enuie que nostre cœur & nostre humilité: Il n'est point descendu armé de foudres & de tonnerres; Il a laissé dans le Ciel toutes les marques exterieures d'Empire & de souueraineté, & souz vn habit de Pelerin & de passager vient modestement heurter à la porte de nos consciences, & nous dire en secret qu'il a resolu de grands choses avec son Pere auant de partir: qu'il va trauailler tout le premier au retablissement du genre humain, & qu'il veut faire vne assemblée, & renfermer dans vne Cité tous les gens de bien qui voudrôt obeir à la volonté de son Pere; qu'il en sera le chef & qu'il l'esleuera dans le Ciel, les fera participants de la gloire de Dieu, & les rendra si Augustes & si Majestueux que les Anges mesmes leur seront soubmis. Mais sur tout qu'on ne s'estonne pas du procedé; Il sera tout particulier; si la sagesse ordinaire des hommes s'en scandalise, tant pis pour eux; si dans l'ordre de la nature ils sont si peu clairs-voyans, ils le seront bien moins dās la conduite de la grace. Elle est autant esleuée au dessus

du gouuernement des choses mortelles, que Dieu l'est au dessus de la nature. C'est vne façon d'agir toute particuliere; Il renuerse en apparence ce qu'il veut redresser en effect; à la mode de ceux qui pour esleuer vn fardeau, le tournent, le bouleuerfent, s'abaissent iusques en terre, & semblent vouloir faire le contraire de leur dessein. Celuy que nous voyons deloing surpris par la rencontre d'un fossé qui luy coupe chemin, s'arreste tout court, porte les yeux deçà, delà, il recule en'arriere comme s'il en auoit peur, il retourne sur ses pas, & qui ne scauroit point son intencion, se persuaderoit qu'il va chercher vn autre chemin, ou que cette rencontre luy a fait changer de resolution: mais il nous surprend tout à coup, quand nous le voyons tourner visage, & d'une démarche plus resoluë prendre la course, & franthit legerement ce qui d'abord luy auoit fait lascher le pied. Toutes les actions de Dieu sont pour nous autant de surprises. L'escorce des fructs dont il rassasie les siens, ont bien quelque sorte d'amertume, mais le suc & le dedans en est extrêmement doux & sauoureux. Et si nous considerons exactement la duresté qui se rencontre en la police Chrestienne, nous trouuerons qu'elle nous est aduantageuse, & que les afflictions si communes aux gens de bien, sont les moyens necessaires dont la Prouidence diuine se sert pour nostre bien, & l'accomplissement de ses saintes intentions.

## PARTIE DEUXIÈME.

*Que Dieu s'est formé le dessein d'une sainte Cité, que les tribulations sont les artisans & manœuvres, qui travaillent à ses gages, & que les gens de bien sont les pierres, & les matériaux dont il veut former les plus superbes Palais qu'il y desseigne.*

**L**A conduite de Dieu nous est incognüe, ses conseils nous sont cachés ; Nous sçauons bien que dès le commencement du monde, il s'est formé le dessein d'une sainte Cité, pour laquelle il a desia remply le Ciel d'estonnement, & la terre de merueilles ; mais ses allignemens sont incomprehensibles ; nostre veüe a de la peine de les appercevoir. Il fait de si grands ouuertures & des profondeurs si estranges pour les fondemens des Palais & superbes bastimens qu'il y desseigne, que nous n'esçaurions en comprendre la cimetrie. Cette grande plage que vous voyés, cette large estendue de pays y sera cointe ; cette montagne qui vous paroist si haute & si orgueilleuse couuerte de brossailles, & des bocages qui seruent de repaire à vn si grand nombre de bestes farouches, qui vont ruinant & gastant ce plat pays ; & molestans ces pauvres Cabanes de bergers sera rasée & destruiete. On

demandera quelque iour ce qu'elle est deuenue, & ceux qui en voudront parler se mesprendront en la remarque du lieu où elle estoit autres fois. Ces boccages inaccessibles, ces petits bois qui luy seruent de perruque & d'ornement, qui nous causent maintenât tant de mal seront mis au feu, & reduits en cendres. Ces eaux qui tombent de cette montagne comme des torrents furieux, qui inondent la planure de nos champs, & font des rauages par leur impetuosité, cesseront de nous trauailler, ces sillons herissés qu'ils ont graué sur le front de nos terres par leur rapidité & leur brusc passage seront applanis, & ce rocher que vous voyés porter la teste si haut, & iusques dans le sein des nuës, qui par son obstacle corrompt la beauté de nostre veü: qui trouble nostre repos, & la seüreté du commerce par la retraitte fauorable qu'il preste à vne grande quantité de brigands, dont ses fausses cauités sont toutes remplies, sera renuersé; & si l'artifice & l'industrie des mines n'en peut venir à bout, le foudre, le tonnerre, & le feu du Ciel, seront employés pour l'abysser, le confondre, & le perdre. Ne t'estonne pas aussi de ces fournaïses continuellement allumées, où tu vois ietter tant de pierres innocentes, elles seront par ce violent artifice conuerties en plastre, & feront vn iour partie de ces superbes bastimens. Cette terre que tu dis auoir esté autresfois si fertile, & estre maintenant desgraissee par le flux continuel des eaux ameres qui coulent du pied de ce grand rocher, s'espüre tous les iours, & se rend par ce moyen assés precieuse pour y seruir de ciment, ou de sable necessaire. Ces beaux arbres que tu en-

tens gemir sous la coignée du Bucheron, & qui sont découverts de toutes parts par les playes qu'ils reçoivent, serviront de poutres aux plus belles salles & riches departemens de ce grand Palais. Marche donc hardiment, laisse couler ces eaux qui font tant de ravage quand on leur résiste: N'enuie pas le sourcil & la hauteur de ce rocher, ny de cette montagne. Je veux dire l'Atheïsme & l'impieté dont les crimes énormes, & les sacrilèges fréquents, en nostre siècle s'élèvent contre le Ciel, & le forcent aujourdhuy de combler la terre de maledictions. Ils seront applanis, leur memoire sera déplorable, & leur fin si tragique, que les cœurs les plus durs donneront des larmes à leurs miseres. Au contraire, ces Cabanes rustiques & mal couvertes, où plustost les ames humbles & fideles qui par la necessité du voyage se trouuent embarquées dans le mesme vaisseau que les autres, & souffriront les douleurs de la tēpeste qu'elles n'ont point esmeuë, seront annoblies & leur humilité & bassesse erigées endignités, tiltres & marques de noblesse, qui les releueront autant par dessus les autres, qu'elles ont esté auilies & mesprisées dans le cours de cette vie. Que si tu sens quelquefois la faux de ce grand entrepreneur entrer en ta moisson, renuerse l'esperance de ton Fermier, passer iusques dans l'enclos de ton Jardin, ruiner la beauté de ton parterre, sçache qu'il en a besoin, & que ton heritage fera partie vn iour de ce beau Jardin de plaissance, qu'il dessaigne pour l'embellissement de cette Cité: s'il porte le ciseau d'un costé, le coute, & le chocq d'un autre: s'il renuerse les arbres fructiers, s'il coupe, s'il  
taille,

taille, s'il ruine tes premiers desseins, s'il met la charruë tout au milieu, s'il n'espargne ny les fleurs, ny les compartimens, ny les allées, ny les figures, & tant d'agrecables alignemens, c'est qu'il s'y est obligé pour l'estenduë de son parc. Cet Ouvrier porte la bêche & le cousteau par tout, Nous ne voyons que confusion, que terre remuée, qu'arbres abbatus, le bassin d'une fontaine déplacé, les tuyaux rompus; En fin il ne paroist que desordre, & vne triste figure qui blesse les yeux & la pensée de celuy qui s'arreste à considerer l'estat present de ces ouvrages, s'il ne penetre l'intention & la pensée de nostre Entrepreneur qui veut former des Thuilleries au mesme lieu qui ne seruoit auparauant que de le deporter, & n'estoit destiné qu'aux menues necessitez de la cuisine. Donnés vous un peu de patience, reuenés dans quelque temps, vous ne plaindres plus ce desordre, vous n'accuserés plus ce procedé, & n'aurez pas moins de ioye & de plaisir en ce nouuel aspect que vous auies auparauant de douleur de voir ce lieu là tout en ruine, & dans vne desolation effroyable. A voir la surface de la terre toute embrasée, pleine de desordre & de confusion, la campagne desolée, le plat pays abandonné, les Temples profanés, les Vierges violées, la peste, la guerre, la famine, le meurtre, le sang, & le carnage, fourrager toute la terre: les meschans, les impies, les scelerats, & les athées, dans l'affluence des biens, & les hauts degrés de la fortune, les gens de bien dans la tyrannie, l'esclauage & l'oppression; Il sembleroit que Dieu se seroit endormy, & qu'il auroit cependant abandon-

N

nélesrefines & la conduite de fa Prouidence à quelque furieux, n'estoit que nous sommes assurez que ces moyens d'agir & de proceder nous sont les plus auantageux & qu'il ne se fait rien en tout cela que pour le bien de sa famille. C'est ce parc, c'est cet enclos dont il se rend luy-mesme le Iardinier; reuenés dans vn an, ou dans letemps qu'il s'est prescript pour paracheuer son dessein, & vous y trouuerés vn si bel ordre, vn calme si merueilleux, vne paix si profonde que vous serés rauy d'estonnement & de merueilles. Si la prudence humaine pouuoit penetrer dans ces sages conseils, elle en admireroit la conduite & les moyens par lesquels toutes ces choses que vous voyés pesle-mesle seront à la fin heureusement débaracées, rangées, & toutes placées auantageusement. Cet hōme de bien que vous voyés maintenant opprimé, chargé d'outrages, d'infirmités & de disgraces, le jouët & le mespris de ses ennemis, sera esleué si dignement, & reuestu de tant de majesté & de pompe, que la bouche la plus eloquente demeurera sterile & infœconde pour exprimer au vray l'estat de son honneur & de sa joye. Ces tribulations, ces afflictions, sont autant d'ouuriers & de manœuvres qui trauaillent aux gages de ce souverain Architecte. Ce passage de gens de guerre, cette rude attaque, ce siege de ville, cette persecution de soldats passera incontinent. Cette iniure, cette disgrace se terminera par elle mesme, ou par la fin de vos malheurs. Ce joug si dur & si feuerre que la fortune impose sur vous, & sur vostre famille passera commela poudre qu'entraîne vn tourbillon,



de vent. Le feu de ces tribulations espurera cette matiere precieuse qui est en nous, de laquelle ce grand Ouurier fait estat de former les plus belles corniches, les plus superbes lambris, & les plus rares pieces de son Palais. Ces habits que vous voyés si ridicules sur les espauls des Religieux seront annoblis & changés en la pourpre la plus esclatante. Cette gresse qui vous menasse, cet orage qui vous espouuante, cette espoisse nuée de douleurs & de desplaisirs qui se promene sur vostre teste, qui couure vostre hemisphere, passera incontinent, le calme la suit de prés, elle traîne le beau temps & la bonace à sa suite. Ayés encore vn peu de patience & de courage, vous en serés deliuré. Elle s'affoiblit en vous assaillant elle s'attenüe en dégorgeant sur vous son venin & sa cholere, & si vous la laissés faire, sa haine & sa persecution espuisferont tous les traits dont elle vous menace, & luy donneront la mort qu'elle vous auoit preparée. Mais aussi n'est-il pas raisonnable de faire trop les delicats, ny de faire à tous moments des assemblées de Medecins, ny tant de consultations pour l'esgratigneure d'vne espingle, & vn petit mal au bout du doigt. Se trouue-il des Princes & des Monarques qui soient à couuert des espines dont vous apprehendez si fort les picqueures. Les soins de la paix & de la guerre sont-ce pas pour eux autant de tribulations continuées? Ne veillent-ils pas pendant que vous dormez sur le duuet, & que vous vous reposez à l'aïse dans vne chambre bien tapissée. Vous faictes quelquefois bien du bruit pour peu de chose: On vous a dérobé vn chou dans vo-

stre jardin, les soldats qui ont logé dans vos metairies ont parlé plus haut que vos valets. Estes vous pas bien à plaindre? Vous auez vn procès à solliciter, vne querelle sur les bras, vne fieure à combattre, tant mieux, vostre vertu trouue del'employ, & vous met en estat de meriter toutes & quantes fois qu'en leuant les yeux au Ciel vous benissez le Seigneur, & luy tesmoignez receuoir de sa main les espreuues qu'il fait de vostre courage, & de vostre amour.

---

## PARTIE TROISIEME.

*Que la tribulation est vn Rosier duquel l'amour  
de Dieu arrache toutes les espines, &  
ne nous presente que les Rosès.*



LES vertus morales & Chrestiennes sont les richesses, les heritages & precieux immeubles de l'homme de bien. Celuy qui en a le plus est le plus riche, & le plus abondant en biens; comme parmy le commun du peuple, celuy qui a plus de terres, de reuenus & de chartes est estimé le plus opulent. Il faut aussi demeurer d'accord que la vertu, de mesme que le diamant, n'a point de lustre que lors qu'elle est mise en œuvre: & partant celle qui trouuera les plus grandes difficultés à combat-

tre, & pourra surmonter les plus violentes attaques, passera pour la plus parfaite, la plus digne, & la plus esleué. Celuy ne reçoit point d'injure, auquel on ne fait rien par force; & qui ne souffre rien que ce qu'il veut, n'a pas subject de se plaindre. Que nous peut-il arriuer de plus auantageux que l'accomplissement de nostre volonté, & de nos desirs? Combien se trouuent-il de jeunes gens, qui pour l'honneur de seruir vne Dame mettent l'espee à la main, s'exposent aux dangers & hazards, & se rendent si mauuais mesnagers de leur vie, pour la seule gloire de seruir & de plaire à ce qu'ils aiment. Que si vne passion dont les racines sont si tendres & si foiblettes, est capable de produire des effects si merueilleux, que deuons-nous attendre de l'amour de Dieu, si iuste, si legitime, & si raisonnable? pour n'estre pas vn feu de paille, & ne lancer point tout à coup tant de clartés, & d'estincelles; a-il moins d'ardeur, & d'embrasement? le cœur d'un homme de bien n'est pas fait de ces matieres qui prennēt feu en vn instāt & s'esteignent presque au mesme moment de leur premiere splendeur; cōme font les amours passagers, & les passions sensuelles qui s'éteignent & s'arrousent de l'affection des choses perissables, de mesme que le mouchoir plongé dans l'eau de vie, qui prend feu aussi tost, mais qui ne penetre point plus auant que la surface du linge qu'elle enflamme. L'amour Diuin au contraire est vne huile incombustible, qui passe iusqu'à la racine du cœur qui en est touché, & qui l'embraze d'un feu clair, pur, tousiours luisant, & qui ne se consomme point. Quel-

ques sçauans ont tenu que l'artifice & l'excellence de l'esprit humain pouuoit paruenir à la perfection d'une quintessence qu'ils appellent eau surceleste, ou huile vierge, capable de s'enflammer d'un feu perpetuel, pourueu qu'elle soit artistement embrazée, & renfermée dans un vaisseau clos & sigillé hermetiquement; parce que la pureté de ce feu, & la crasse, & immondice de l'air que nous respirons, ne peuuent long temps compatir ensemble; Ce qu'ils prouuent assés heurcusement, & par raisons & par histoires. Mais nous pouuons dire bié plus certainement, que l'amour de Dieu est cette rosée celeste & Diuine, dont ils parlent si souuent. C'est une eauignée de nature brullante, capable de s'embrazer & conceuoir une flamme eternelle, pourueu qu'elle soit à couuert des vents de l'ambition: des agitations perilleuses, de cette bonne opinion de nous mesmes, & qu'elle ne souffre plus à l'aduenir de commerce avec cet air mondain, & empesté qui se mesle & s'attache aux choses les plus pures. Il suffit que nostre cœur leur ait fermé la porte, & condamné pour iamais toutes les aduenues pour ne plus alterer & la beauté & la pureté de sa flamme. C'est un feu innocent qui consommera toutes les espines que le commun des hommes apperçoit aux tribulations dont ils apprehendent la touche, lesquelles si vous considerés entre les mains du Sage, il s'en joue, il s'en diuertit; si ce n'est assés de les empoigner à pleines mains, & par l'endroit où elles paroissent les plus piequantes, il les met dans son sein, proches de sa chair, & se les rend si familiares, qu'il nous fait enuie de son bon-

heur, & de son procédé. Nous ne trouuons pas estrange de voir tous les iours sur vn theatre & dans vne place publique, des gens mercenaires attachés à vn petit gain, porter des serpents à l'entour du bras, & dans le sein. Il se trouue mesmes des ieunes filles en Italie, & de bon lieu, qui pour le seul plaisir d'vn peu de rafraischissement nourrissent des serpents d'vne grosseur prodigieuse, qu'elles portent à toute heure au lieu de bracelets, s'en parent la gorge, & en font vn collier de perles: les flattent, les caressent, & les font mesme coucher dans leur lit, comme la chose qu'elles aiment le plus; ce qui neantmoins nous dône del'horreur, & dont nous auons peine de supporter l'imagination, Pourquoy donc trouuerons-nous estrange de voir vn hôme de bien constant, & vertueux faire des choses qui nous rauissent d'estonnement, s'exposer aux mauuais traitemens de la fortune, se rire des afflictions mondaines, s'appriuoiser les douleurs, se familiariser avec les injures, les mespris, & les ignominies; supporter de bonne grace la perte de ses biens, & celle de ses enfans; recevoir les maladies, les infirmités d'vn œil gay, & d'vne ame resoluë; payer d'vn seruice, d'vne compassion, d'vn secours fraternel & charitable, les haines & les mauuais offices de ses ennemis. La raison en est prompte. Pouuôs-nous rien faire de bien que nostre Maistre ne nous ait monsté l'exemple d'en faire dauantage? Celuy-là marche hardiment qui va pas a pas & suit les vestiges d'vn autre qui le deuance, & luy prescrit le chemin. Le valet a mauuaïse grace de se plaindre dans vne hostellerie du pain & du vin qu'on luy

## PARTIE QUATRIESME.

*Que les afflictions sont necessaires à l'homme de bien, & qu'une vie tranquille & assaisonnée de toutes sortes de felicitez mondaines est une marque de reprobation.*



Bien considerer la Nature des afflictions, elles ont cela d'abord qu'elles degoustent l'ame des plaisirs sensuels, & sans aucun respect, descouurent l'infamie & mettent à nud les parties honteuses des voluptés mondaines. Ces charmes passés, ces agréments & diuertissements se rendent fades & insipides, Ils deuiennent à charge, & leur chatouillement inutile & importun. La douleur presente porte l'esponge sur la surface des choses qui la rauissoient auparauant, & n'y recognoist plus rien apres que de difforme & desfiguré. A quoy luy sert tant d'or amoncelé, tant de maisons si superbes, des charges & dignités si releuées, des meubles si precieux, vn liét gemissant sous la pesanteur de son prix, tant de valets & de suite, tant d'adorations & de flatteries, vne fièvre, vne pierre dans le rein, vne goutte, vne douleur picquante a noircy leur beauté naturelle, a tiré le rideau, & tendu vn voile obscur & espois sur toutes ces riches peintures. L'homme se desabuze ainsi

O

dece qui l'auoit trompé autresfois; & ce qui dans vne longue jouissance luy auoit par le passé rendu l'esprit stupide & incapable de toute autre lumiere que celle qu'il receuoit de ces fausses clartés, vient peu à peu à se decouurir, & se démasquer en cét estat, & luy est aller deuant les yeux leur foiblesse, & leur peu de merite. De cette cognoissance s'engendre le mespris qui succede par cetterencontre à la bonne estime que nous en auions auparauant conçue. Nous ne les embrassons plus d'une estainte si ferme, & nostre ame qui tenoit auparauant toutes ses puissances & facultés employées à ce faux culte, & ne s'en estoit reserué pas vne qui ne fust entièrement idolatre de ces feintes diuinités, commence à se destacher vn peu de cette seruitude: & à mesure qu'elle s'esloigne de plus en plus de ces autels, remarque l'aveuglement de ceux qui y demeurent attachés, & plaint le malheureux employ de leurs sacrifices. Plus il les regarde attentiuement & plus il s'estône que tant d'honnestes gens se laissent abuser à l'esclat de ces faux brillants, qui ne sont que de verre commun, & non pas des pierreries telles qu'il se persuadoit auparauant. L'ame donc qui en cét estat commence à desnoier les liens qui la tenoient en brasiere sans aucun mouuement ny reflexion d'esprit, s'interroge & respond à soy-mesme. Quoy! tant de promesses pour si peu d'effect; vne seruitude & vne obeissance si dure pour estre si mal recognües, tant de devoirs tyranniques à vne deité si impuissante, & si ingrate! tant de soins, pour se rendre les ministres de cette idole, tant

de combats pour entrer en la plus intime participation de ses secrets, tans d'apprehensions d'en estre rebutés; tant de fausses alarmes & de craintes, tant de feux, d'encens, & de victimes n'ont pu nous defendre d'une colique, nous garentir d'un flux de sang: Nous mettre à couuert d'une fièvre, d'une cangraine. Bref, ils ne peuvent resister aux moindres de leurs ennemis, ny empêcher que ces nouveaux venus, à leur veüe ne fourragent leurs mysteres, ne troublent leurs sacrifices, ne renuersent leurs autels, & sans respect de leur Diuinité, ne couurent leur visage d'iniures, d'opprobres, de honte, & d'ignominie, & ne les iette enfin dans le mespris de ceux-mesmes qui auparauant en estoient les adorateurs. Il faut changer de maistre, & puis que leur fausseté nous est maintenant descouuerte, Il n'est pas raisonnable de persister plus long temps en cet erreur. Nostre crime a quelque sorte d'excuse, quand l'ignorance nous y a engagé, & qu'elle-mesmes nous a mis les armes en main pour le commettre; mais aussi n'est-il plus tollerable, quand elle mesme se recognoist, s'en repent, & nous abandonne seuls dans la volonté de mal faire. Cette pensée melancolique recueille & ramasse tous les rayons du raisonnement qui auparauant vagoyent indifferemment & sans arrest: & considerant lors les objects avec plus d'estude & d'attention, remarque à loisir leurs défauts & leurs imperfections, nous entretient plainement du peu d'aduantage qu'on en reçoit, des frequentes disgraces dont ils sont menacés & batus à toute heure, & par ces degrés elleue nostre pensée d'un estage plus



hault, & nous parle à plus près en cette sorte. Quoy donc ! nous sommes assurez maintenant que ce qui flatte nos ambitions n'est qu'un fantôme : que ce qui tient nos yeux suspendus, aussi bien que nos esperances, n'est qu'une fumée, & une vapeur legere agitée de tous vents; que ces voluptés autresfois si precieuses, n'ont qu'une fausse & vaine apparence de plaisir: & tu souffriras mon ame de languir plus long temps dans leur servitude? Non, non, il ne faut plus marchander, elles sont indignes de ton employ, & de t'assubiettir deormais; Il se faut esleuer plus hault, chercher une occupation digne de ta naissance. Le mespris du monde, la pensée de l'eternité, & l'amour de Dieu, doiuent estre deormais le veritable subiect de tes soings & de tes affections. Si tu es en santé quels aduantages ne receuras-tu point dans ces hautes meditations, qui te dérobent à la terre pour te placer dans le Ciel; qui t'arrachent de la compagnie des hommes pour t'introduire dans le commerce des Anges; qui te soustraient à toy-mesmes pour te liurer entre les mains de Dieu. Si tu deuiens malade, quel secours, quel soulagement ne receuras-tu point de voir à ton cheuet le souverain Medecin des ames. Ta conscience ne sera point accablée de mille remords; le souuenir de tes offenses, la honte de tes crimes ne t'inquietera point, ils te sont remis: la force de ton amour les a rayés du liure de compte, & en a effacé la memoire dans l'esprit de ton Iuge. La crainte de l'aduenir, l'horreur d'un chastiment eternal, ne te trauailleront point, les veilles & les soings, si inutilement employés, pour amonceler tant de tresors,

qu'on ne considere plus en cét estat que par la seule crainte de les perdre, & la douleur de s'en separer, ne troubleront point ton repos. Au contraire, ta conscience libre en cerencontre, respirera si à l'aïse, qu'elle ne remplira ta bouche que de benedictions. Si tu as des enfans, tu leur laisses pour tuteur celuy mesme qui te console dans l'extremité de ta maladie. Tu sçais qu'il est le pere charitable de la veufue, de l'orphelin, & de tous les affligés, qu'il le sera de ta famille. S'il faut quitter le monde, tu es prest à partir, ta volonté est conforme à celle de ton maistre, tu soubseris sans repugnance à ses Diuins mandemens. Qu'est-ce donc que tu peux craindre à l'aduenir sous vne aïsse si puissante, & à l'abry de ce souuerain Protecteur? Qu'il pleuue des foudres & des tonnerres, c'est luy qui les a faicts; Ils respectent leur Maistre, & tout ce qui porte sa liurée. Si la cruauté de tes ennemis triomphe de toy & de ta fortune, elle succombera sous l'effort de ta patience, tu auras plus de vertu pour mespriser leurs iniures, qu'ils n'auront d'opiniastreté à te persecuter. Tu as vne bonne retraite, si les vertus morales qui gardent les dehors de ta forteresse, font mine de lâcher le pied pour la violence des assaillants, elles seront à l'instant soustenuës par les vertus Chrestiennes, qu'aucune force ne peut violer, ny abatre. Ouvre ta porte hardiment, fais leur teste, ils n'auront pas le front de te soustenir en cette démarche: fais leur voir les armes de ton salut, fais leur briller dans les yeux la lueur de cet acier triomphant, qui a brizé les portes de l'enfer, qui a desolé l'empire de la mort, & fracassé ces rochers orgueilleux du vice & de

l'impieté. Tu les defarmeras & les mettras facilement hors de defense. Rien ne peut offenser celuy qui se trouue à couuert d'un si ferme bouclier, & rien ne peut resister au glaive trenchant de cette parole Diuine, qui nous apprend qu'il n'y a rien de si utile à l'homme que la tribulation, & rien de si pernicieux qu'une tranquillité de vie, accompagnée de nonchalance, assaisonné de plaisirs, flestrie & corrompue par de molles & lasches voluptés. Bref c'est une merueille que Dieu heurte à la porte d'un riche, & qu'il luy parle de son deuoir. Ce n'est pas que sa bonté ne donne assez de grace aux uns & aux autres pour se recognoistre, & ne point user à leur defaduantage des biens que leur procure sa misericorde. Mais l'humaine nature est si foible, qu'elle n'en peut supporter le faix, sans plier, & s'accabler miserablement sous leurs poids. Dieu nous les donne, non pour nous embarrasser, mais pour nous en seruir honnestement, dans le cours, & les necessitez de cette vie; & comme dans un grand train & une suite de bagage, nous voyons quelques fois une miserable charette arrestée dans un bournier, par le poids excessif de sa charge, pendant que les autres se hastent d'arriuer au giste pour se delasser, & essuyer les incommoditez du voyage: Les hommes que nous voyons enuyrés de la flatterie de leurs esclaves, charmés du vent fauorable de leur ambition, esbloüis de l'esclat de leurs richesses, & chargés d'un si grand nombre de hardes & meubles superflus demeureront accablés sous leur faix, pendant que l'ame du iuste continuë legerement son chemin, & arriue heureusement à son port, sans se laisser

surprendre à la nuit 'ou aux tenebres , 'ny à l'obscurité malheureuse qui succedeaux beaux iours de nostrevie; & cependant qu'elle approche de sa retraite, le Soleil se baïsse, le iour vient à faillir, & l'obscurité d'une espoisse nuit inuestit & enuoloppe miserablement ceux qui par vn trop lourd engagement demeurent accablés sous leur charge, & qui par le poidz importun de tant de provisions inutiles n'ont peu gagner l'hostellerie, & cet heureux port de salut, qui comble nos esperances de joye, & pour lequel nous-nous sommes mis en chemin dès le premier moment que nous auons esté appellés du neant, pour entrer dans le pelerinage de cette vie.

## SECTION NEVFIESME.

### De la Liberté.

#### PARTIE PREMIERE.

*Que de toutes les choses que Dieu a faictes pour sa gloire, il n'y en a pas vne qui la releue dauantage, & la rende plus auguste que la liberté de l'homme.*



A contemplation du monde, & de tant de diuerſes creatures sorties du neant. Cette variété merueilleuse qui ſe void au Ciel & en la terre, cette marque particuliere qui diſtingue les pieces renfermées dans vne meſme eſpece, &

qui setrouuentrangées sous vne mesme enseigne. Cette mesme tige qui d'une plaisante bijarrerie produit tant de fleurs differentes par l'agreablemélange des couleurs que le pinceau naturel y applique si artistement. Ce mesme sang du Pere de famille qui imprime en ses descendants quelques lineaments, idées & traicts de son original; qui marque les freres d'une ie ne sçay quelle ressemblance, & ne laisse pas neantmoins de les distinguer les uns des autres. Cette grande estendue de mer autant remarquable par son effroyable figure, par ses mouvements reguliers, & l'enormité de son large estomach que par le peuple fertile dont elle est si nombreuse; qui dans le plus grand excès de sa cholere, garde le respect & l'obeissance, & n'ose violer un petit ban de sable, ny la planure de la terre que Dieu luy a donné pour limites de son empire. Toutes ces choses, dis-je, ne suffisoient pas pour raconter la merueille de Dieu, & nous entretenir plainement de sa Toute-puissance. Ce n'estoit pas encore assés d'avoir esleué bien loing de nous cette voûte estoilée, & la ficereté de ces flambeaux roulants si glorieusement sur nos testes. D'avoir estendu le vaste sein de l'air qui sert aux orages, aux tempestes, aux nuës & aux vents de divertissement spacieux, & de promenoir agreable; d'avoir enrichy la terre de tant de thresors, & d'un si grand nombre de creatures vivantes; Si Dieu pour nous faire voir le dernier traict de sa Toute-puissance, n'eut formé d'une morte de terre d'un amas de poussiere une petite Divinité capable de lignée & dans un estat libre & entier de se gouverner comme bon luy

luy semble; qui choisit ou refuse, condamne ou approuue, porte la main a l'eau, ou au feu, traite avec son maistre comme son semblable, se soubmet a ses loix si elles luy plaisent, les rejette, & les méprise si elles le degoustent. Il est vray que d'auoir réglé l'ordre & le cours des choses naturelles, les auoir tiré du neant, auoir poly, agencé, & estendu cette matiere, & d'une mesme paste auoir produict tant d'ouurages animés, si beaux & si differents: les conseruer par vn secours si ineffable; se rendre present a leur conduite, & ne les laisser iamais vaguer hors du chemin qui leur est prescrit; c'est vne grande merueille. Mais si Dieu en fut demeuré la, ce n'estoit pas assés; car quel est l'artisan industrieux qui ne l'imité presque ou ne le contreface en quelque chose, & qui d'une mesme cire ou d'autre matiere ne forme quantité de petites figures & machines qu'il fait remuer, aduancer ou reculer comme bon luy semble, par l'inuention & l'adresse de ces ressorts, & qui par cette demarche controuuée, neiette de l'estonnement dans l'esprit de ceux qui en ignorent la cause. De sorte que de se figurer vn Dieu present a toutes choses pour les conduire & empescher qu'elles ne se deuoyent & detraquent de leur chemin; ce ne seroit pas vne vertu si rare en ce souuerain maistre, duquel le pouuoir est si excellent. Mais d'auoir formé vne creature libre, & à la conduite de laquelle Dieu n'est necessaire que pour luy prester seulement le concours, du reste la laisse agir comme bon luy semble, sans la gesner ny la contraindre; Qu'est-ce autre chose à Dieu, sinon de former vn petit Dieu qui luy est aucunement semblable, &

faire l'ouurage le plus excellent qui puisse tomber en l'imagination Diuine & humaine? N'est-ce pas de gayeté de cœur, se faire icy bas vn compagnon? il me semble que de toutes les actions de la Diuinité qui se respendent au dehors, il ny en a pas vne qui releue la grâdeur de sa gloire a l'esgal de celle-cy. Plusieurs se sont pœnés sur l'intelligence de ce passage, qui nous apprend que Dieu fit l'homme à son image & semblance, ce qui ne peut estre entendu de la forme exterieure, puisque Dieu est tout esprit, & que les esprits & les corps n'ont point de ressemblance; il reste donc que ce soit de la forme interieure, laquelle est l'image de la Diuinité, c'est à dire commel'expliquent les Peres, qu'elle est libre en ses actions, & que ce caractere de liberté est l'image veritable de son original, & qui la faict estre semblable a Dieu. Toutes ses actions ne traittent elles pas du souuerain? il se taille des loix, il controlle celles que Dieu son maistre luy presente, les accepte pour vn temps, les reprouue & condamne en vn autre, se remet bien avec luy pour vn iour, rompt le lendemain si bon luy semble; affecte la Vertu ou le Vice, & espouse lequel des deux qui luy vient en fantaisie; tantost il prend le meilleur party, tantost il l'abandonne; il blasme les plus saintes actions, il s'en repent vn moment apres; Il entre dans vn lieu diffamé, & s'abandonne a toutes sortes de debauches; vne autrefois il se laisse gagner a la Vertu & deuient si constant & si genereux que la plus belle femme, & l'obiet le plus charmant accompagné de l'occasion & de toutes les commodités de pecher ne sera pas capable de vaincre sa continen-

ce. Que toutes les puissances naturelles s'efforcent par vne secrete & violente ardeur de l'engager, elles ne le peuvent terrasser, si la faim & la necessité de manger vient a le combattre, présentés luy les viandes les mieux apprêtées; Quoy que son appetit le sollicite, il se contiendra de manger pour l'heure qu'il voudra, & vous donnera par ce reffus vn témoignage certain & infalible de sa liberté. Il ne faut donc plus s'estonner, si la loy est aussi vieille que le premier des humains. Il estoit necessaire que Dieu apprît à l'homme l'ayant créé, qu'il l'auoit créé libre & dans vne pleine puissance de suiure le choix de ses mouuements & volontés, ce qu'il luy enseigna par la prompte deffence qu'il luy fit de porter la main sur le fruiet de reserve, & duquel peut estre Dieu luy eut en vn autre temps permis l'vzage, s'il se fut contenu dans l'obeissance. Il luy apprit par cette interdiction qu'il estoit en son pouuoir d'y satisfaire, ou de ne le faire pas. Qu'il luy donnoit vn priuilege qu'il déuoit employer a son aduantage, & ne le pas conuertir a son dommage & a sa perte. S'il neut point trouué de loy pour mettre sa liberté a l'espreuue, a quel marque, a quel coing la pouuoit-il recognoistre? d'obeir a ses inclinations, de contenter ses appetits, d'appaier sa soif & sa faim des viandes qui chatouilloient le plus ses appetits; estoit-ce vn moyen de s'en apperceuoir nullement? Enfin la nature de ses desirs sensuels, dans la belle commodité de se creuer & remplir, nel'eut point entreteenu de cette emancipation & priuilege d'vser de ces droicts; si Dieu mesme n'eust esté aussi soigneux de l'instruire, que de le former; & ne luy eut appris en mesme



temps, qu'il estoit en sa liberté d'obeir a son createur, ou de le contredire, de recevoir sa loy, ou de la repudier; de s'attacher à ses commandements, ou de les mépriser; de se conseruer la bonne intelligence en laquelle il estoit avec son maistre ou de la rompre. Enfin le choix libre & entier de suiure & embrasser la volonté de Dieu, ou la sienne propre.

## PARTIE DEUXIESME.

### De la Liberté.

*Dieu est iuste & tout connoissant, il s'ensuit donc qu'il prenoit nostre salut ou nostre perte de toute eternité, & que cette prescience infailible ne blesse point nostre liberté.*

**P**OUR establir la liberté de l'homme sans aucun contredit, & l'accorder avec la prescience de Dieu, & la predestination dont nous parlerons en son lieu, il ny a que deux choses à considerer, & qui en suite des traittés precedents ne doiuent plus recevoir de difficulté dans les Esprits les plus opiniaftres. La premiere, que Dieu est iuste, & partant il punit nos mauuaises actions & recompense les bonnes avec iustice. Or est il que si l'homme n'estoit pas libre, il ne seroit capable de bonnes ny de mauuaises actions puis qu'elles seroient toutes forcées & contrain-

res; le Vice & la Vertu ne feroient plus parties de nos volontés, le crime & l'innocence n'auroient aucune part en nos actions, non plus que le mespris & la louange. Donc il ny auroit point de iustice en Dieu, où elle seroit inutile & sans employ. Et partant il est necessaire d'a- uouer que l'homme est libre, & en estat de vouloir sans contrainte ce que bon luy semble.

Pour la seconde, il est certain que Dieu cognoist toutes choses passées, presentes & futures, & que la suite des temps avec ce qu'elle enuoloppe en sa circonference, ne compose qu'un cercle tousiours present deuant Dieu; Et s'il y en auoit quelqu'une qui pût eschaper à sa con- noissance, & s'écarter du contenu de ce cercle, elle seroit Dieu, parce qu'il s'ensuiuroit qu'elle ne dependroit pas de luy, & par consequent ayant en soy un estre independant de la Diuinité, elle seroit Dieu comme luy. Ce qui est absurd. Parce qu'il ne peut y auoir qu'un seul Dieu. Et partant il cognoit toutes choses necessaires fortuites ou volontaires, passées, presentes & futures, & sçait d'une science parfaite nos pensées, nos intentions, & les plus secrets mouuements de nos volontés.

Donc puisque la iustice de Dieu suppose necessairement nostre liberté, & que la diuinité est une preuue infaillible de sa toute connoissance, il s'ensuit que Dieu voit & connoist toutes nos actions libres, sans que la science parfaite qu'il a de leur fin, blesse ny endommage nostre liberté en quelque maniere que ce soit.

La difficulté qui nous reste est de sçauoir comme cela se peut faire, car quoy que cette demonstration ne re-

çoiue point de responce, nous auons neantmoins bien de la peine d'accorder à Dieu vne cōnoissance plus estenduë, plus libre & plus parfaite que la nostre. Si cette notion ne peut tomber bien distinctement en nostre pensée, pourquoy est-ce que Dieu la demestlera mieux que nous? Est-ce pas la vne belle maniere de philosopher; Sainct Augustin nous apprend que routes & quantes fois qu'en vn mesme sujet, il se rencontre deux choses, dont l'une est claire, certaine & euidente, & l'autre au contraire obscure, cachée & occulte: Que celle-cy n'empesche pas que nous n'ayons vne parfaite connoissance de l'autre. Nous pouuons dire le semblable en ce rencontre, & quoy qu'il soit vn peu difficile à l'esprit humain d'accorder la necessité de la connoissance diuine avec la liberté entiere de nos actions (ce que nous esclaircirons ty-  
apres.) & que nostre entendement trouue beaucoup d'obstacles pour lier & adiufter ces deux pieces differentes d'une estreinte bien ferme; si est-ce neantmoins qu'il ne peut douter du principe, ny parer à cette demonstration euidente, qui ne nous permet plus de soupçonner aucune chose au desaduantage de nostre liberté, & de la toute cognoissance de Dieu. Que si vn pere de famille à force de jeter les yeux sur ses enfans, en cognoit les humeurs; si vn bon phisionomiste par les traits & lineaments du visage, descouure vostre temperament & les plus secrets mouuements de vos inclinations, & s'il se trouue assez heureux de iuger de vos deportemens: ie vous demande si cette cognoissance impose quelque necessité à la conduite de vos actions! Que s'il rencontre

d'ordinaire au iugement qu'il fait de vostre conduite, il ne s'en faut pas estonner : On ne peut inferer de la qu'il y ait aucune fatalité dans les Astres qui influe vne contrainte, ou vne force secrete qui nous determine avec necessité à vn tel euenement. Toutes les choses exterieures, & les Astres mesmes qui se rendent les plus inthimes de nostre disposition, & s'auoisiuent le plus pres de nostre Nature par les vertus & puissances occultes qu'ils versent sur nous, dont ils destrempent nostre temperament & les principaux materiaux qui entrent dans le melange de nostre constitution, n'ont autre pouuoir sur nostre liberté, Que de la cajoler, & luy persuader d'embrasser les objets qu'ils enioluēt, & nous assuret estre les plus beaux & les plus aymables, leurs cōseils; toutefois ne nous violent pas. Nous sommes dans la pleine puissance d'y consentir, ou de les contrarier: le choix de l'vn ou de l'autre nous demeure sain & entier. Mais comme les hommes font peu ou point de reflection sur eux, qu'ils flattent leurs passions, & qu'ils feroient cōscience de gourmander leurs desirs, que d'ordinaire ils traitent en enfans gâtés lors qu'ils se mettent en pœne de faire quelque nouvelle conqueste, ils s'engagent insensiblement à les suivre, & les conduire au commencement par la main, ou comme les nourices font les enfans avec vne liziere; & parce que leur nature est de croistre tout a coup, & qu'en vn moment de pigmées qu'ils estoient ils deuenent geants, & d'une grandeur demesurée, s'ils tombent ils nous entraînent apres eux, & deuenons par cette cheute les esclaves de nostre temperament, qui faict que

l'art du Phisionomiste serend certain dans sa coniecture, & se trompe bien rarement en ses iugemens. La beauté des choses visibles & sensuelles tiennent nos yeux tousiours ouverts, & ne les fermons gueres que pour les heures de nostre repos; nos inclinations cependant qui ne sommeillent, & ne s'endorment iamais, demeurent les maistresses au logis. S'il y arriue quelque desordre, nous y arriuonstrop tard pour mettre les hola. Elles deuiennent enfin si superbes & si glorieuses, qu'elles nerecognoissent plus d'autre maistre en la maison que leur interest particulier qui nous entraïne & nous violente malgré nous quoy qu'en rechignant, mais il suffit, nostre volonté & nostre consentement leur ont donné pouuoir de tout faire. Que si vn homme par ce moyen setrouue capable de iuger certainement de la liberté de vos aétions, Trouuerons nous estrange que Dieu par vne Phisionomie occulte & intime de chaque chose ne cognoisse aussi parfaitement les mouuements de nostre liberté, que nous cognoissons ceux des causes naturelles, & que par vne lumiere diuine aiguë & penetrante, il ne perce l'obscurité de nos pensées, ne contemple l'estenduë de nostre liberté, n'embrace le champ large & spacieux de nos volonte, & ne voye certainement ou aboutissent toutes les passades, sinuosités, reflections & mouuements de la liberté de nostre esprit.

## PARTIE TROISIÈME.

## De la Liberté.

*La liberté de l'homme se trouue assaillie et combatue  
par la violence des objets qui l'environnent: mais  
elle ne peut estre vaincue sans son consentement.*

**T**OUTES les passions qui prennent pied & aduantage sur nous, sont autant de diuerses cordes qui nous tiraillent, & engagent nostre inclination a de differens partis. Il ne faut donc plus trouuer estrange si nostre liberté est ébranlée de tant de rudes secousses, & si de tant de choses contraires qui l'appellent, la sollicitent ou la tiennent en suspens, il ne s'en trouue iamais pas vne qui l'attache si ferme a vne des extremitéz, qu'elle ne regarde tousiours derriere, & ne cōserue beaucoup de desirs pour celle qu'elle abandonne. La loy diuine entretient l'homme de son deuoir & de son obéissance; s'il fait effort pour s'y acheminer, il entraîne quant & soy vne carcasse pesante, toute chargée de desirs charnels directement contraires & opposés à cette sainte profession. Le sensuel & le raisonnable sont deux pieces en luy qui d'ordinaire sont en noise & querele perpetuelle, & qui seigneurient souuent tour à tour. Ce qui a rendu l'homme pecheur bien plus excusable deuant Dieu que

les Anges , ausquels par la pureté & simplicité de leur nature, il restoit si peu d'occasion de se perdre, qu'il ny auoit que l'ambition seule de s'esleuer au Trosne de leur maistre, qui fut capable de les en bannir pour iamais. Au contraire la fragilité de nostre nature s'est trouuée si empresseée sous les différentes loix de l'esprit & des sens, que la misericorde de Dieu à pour nous obtenu vne requête Ciuile contre l'arrest de mort, & nous ayant releué de la premiere faute, nous à encores laissé l'vsage pretieux des Sacrements pour secourir nostre foiblesse, soutenir nostre fragilité, & la fortifier dans la voye de la grace contre les puissances de la chair, & les plus rudes attaques de ses ennemis. Mais sa foiblesse & la fragilité ne destruisent pas les principes de sa liberté, & n'empeschent pas qu'elle ne seroidisse quand bon luy semble, & ne suiue le party qui luy plait dauantage. Et parce qu'il est assez difficile de considerer exactement les pieces dont il est composé, qu'il ne demeure quelque soubçon que sa liberté ne soit estouffée sous le poids de celles qui sont les plus remarquables; Il ne sera pas mal a propos d'en faire vne legere dissection, & faire voir que séparées ou conjointes, elles n'ont droit que de conseil, & non pas de commandement & contrainte absoluë. S'il se trouue donc quelque chose capable de prendre pied sur sa liberté, & la jeter dans les fers, il faut que ce soit le sang du pere & de la mere, mellés de l'influence des astres qui forment nostre temperament; ou les choses exterieures qui sont capables de l'eschauffer & d'en rehausser les degres iusques au dernier point; Comme le vin, la beauté,

l'éloquence & autres objets qui nous violentent; où le concours de Dieu nécessaire à nos mouuements volontaires, aussi bien que naturels; ou sa prescience, ou la predestination. Mais toutes ces choses n'exercent aucune contrainte, & quoy qu'on veuille dire de la tyrannie de l'amour & de la beauté des objets qui se meslent en la douceur de nostre vie, & rudoyent la liberté & conduite de nos actions: Ce n'est toutesfois que par forme d'aduis & de conseil, qui de verité persuade de bonne grace, mais ne force pas nostre liberté sans nostre consentement. Pour suiure cet ordre, nous parlerons de chacun en son lieu le plus succinctement qu'il nous sera possible.

## PARTIE QUATRIESME.

*Il n'y a pas vne de toutes les choses qui nous violentent, dont l'Empire soit plus absolu que le temperament, lors principalement qu'il est chaud & sec & qu'il approche le plus du dernier degré de cette constitution.*

**D**E toutes les choses qui font partie de nous mesmes, il n'y en a pas vne qui prenne pied sur nous avec tant de tyrannie, que le temperament, qui procede de la cōstitution du pere & de la mere, de la disposition bonne ou mauuaise qu'ils ont au moment de la generation, soit auparauant ou



apres le repas, eschauffés plus ou moins du feu naturel de l'amour, ou de l'ardeur des viandes; dans vne humeur gaye ou melancolique; dans vne flamme a demy esteinte. ou du tout embrazée; dans vne saison chaude ou froide, & soubmis a vn nombre infiny d'accidents particuliers, accompagnés de l'aspect heureux ou malheureux des astres, engendrent vn enfant dont le temperament, outre qu'il se forme & se bastit de toutes ces rencontres particulieres, s'altere encore par l'humeur de la nourrice de laquelle il succe d'ordinaire les inclinations, aussi bien que le lait, D'ou vient que les freres yssus de mesme sang, sont si differents les vns des autres. Que si dans la vicissitude des saisons, nous voyons les influences du Ciel produire des effects si remarquables, qu'ils ne sont pas moins differents, que le froid du chaud, le sec de l'humide, l'hyuer de l'esté, le printemps de l'automne; Qui doute que ces mesmes astres, selon la difference de leurs aspects, l'aduersion, ou la bien-vueillance de leurs regards ne forment quelquefois en nostre nature des impressions si violentes, que quelque effort que l'homme face pour les redresser, quelque ply contraire qu'il entreprenne de donner a son inclination, elle retourne tousiours en sa premiere figure, & s'obstine contre la pureté de nos desseins & de nos intentions, lors principalement qu'ils trauaillent à la contenir, ou la reformer & changer de nature. Peu de gens le scauent que ceux qui en font les experiences. ie parle de ceux dont la nature par vn miserable degré de temperament chaud & sec au dernier point se trouue si puissante, qu'elle se porte tousiours

aux extremités, & ne se peut contenir dans la mediocrité que par la feuerité des loix d'une vertu heroïque, ou d'une Chrestienne & sainte profession: esloignés entièrement de ceux que nous voyons au contraire d'une paste si mole, d'une constitution si froide & humide qu'ils paroissent comme demy morts & languissants en toutes leurs poursuites; ils sont lâches & tiedes en tout ce qu'ils entreprennent, ils se portent en toutes choses d'un mouvement si tardif, & si paresseux qu'ils semblent toujours dormir, ou n'estre pas bien esueillés. L'aduoue qu'ils ont un grand aduantage dans le progrès de la pieté, Car pour peu de secours & d'appuy que leur preste la vertu, ils trouuent si peu de resistance a leurs desseins, si peu de contradiction a leurs mouuements, & les obstacles si foibles, qu'aux premiers efforts ils en triomphent sans beaucoup de peine. Que si au contraire ils s'abandonnent aux plaisirs & voluptés sensuelles, c'est avec une telle negligence, qu'elles semblent estre pour eux paistries d'eau froide tant leur agitation est lente, morne, paresseuse & de peu de vigueur. La nature pour eux est toute defectueuse, elle n'a iamais assés d'attraits & de charmes. Si une belle fille n'a l'industrie d'encherir les charmes de son visage par les ondes, les replis & le propre adiancement de ses cheveux; adoucir par estude le mouuement & la conduite de ses yeux, si une mouche bien adiuftée, un assassin placé aduantageusement ne releue sa blancheur, si une gorge n'est bien esleuée, si l'artifice du tailleur ne descouure la plus belle partie de son sein. Si un masque bien mis par la beauté des yeux & de

la bouche qu'il tient à descouvert, ne brusse nostre desir d'impatience de voir ce qui nous est desrobé, & que nos yeux par cet empeschement se persuadent estre tousiours plus beau que le reste; si les charmes de la voix, si la gentillesse de l'esprit, si la douceur de l'entretien, si la bonne grace, la naissance, les biens, la suite & le train y sont à desirer; Enfin si quelque autre chose ne s'y rencontre point, elle ne manque pas de deffaux pour attirer le mespris & la condamnation de ces bouches languides, desplaisantes & degoustées, qui a peine trouuent assés d'appetit pour faire vn bon repas d'vne viande la plus delicieuse. Ils querellent à toute heure leur Cuisinier d'estre si sterile en l'inuention des ragousts, & ne veulent pas entendre parler de quinze iours de celuy qui ce matin a esté seruy sur leur table. Il faut trouuer des grues, & inuenter des machines pour guinder leurs appetits & bander la mollesse de leurs foibles desirs, pour les eschauffer, & leur donner quelque satisfaction dans la iouissance du plus bel objet de la nature. Si ces sortes de gens par vne raisonnable & legitime reflection sçauoient considerer les graces que Dieu leur confere, & les aduantages qu'ils ont en la profession d'vne sainte Vertu: De combien de benedictions deuroient ils remplir le Ciel, de s'estre rendu si fauorable à leur naissance, d'auoir applany deuant eux toutes les voyes pour y paruenir; Que ceux du temperament contraire, & que nous auons appellé chaud & sec, rencontrent pleines d'espines raboteuses embarrassées, intriguées & si difficiles, que pour aduancer d'vn pas, il en faut faire trois en arriere, le front couuert de

fueur, la peau esgratignée les mains toutes sanglantes, hors d'haleine & tout pantelant, choquer, luitter, combattre & terrasser vn ennemy plus puissant que nous. Il ne faut point tant de saulces à vn appetit affamé, & qui ieusne de longue main. Il ne faut point de fard ny d'estude pour solliciter nostre continence qui ne se mutine que trop des liens dont elle se trouue chargée, & du peu de champ que nous luy donnons pour s'esbatre. Que ces coiffures nouvelles, que ces mousches, ces assassins, ces rubans à la mode demeurent sur la toilete, que toutes ces curieuses estoiffes soient renuoyées aux boutiques des Marchands, que la nature toute seule leur serue de femme de chambre, & se meste de les coiffer, parer & embellir: Quel desordre, quel rauage ne fait point vn regard donné bien apropos, vn œillade lancée à dessein dans vn sang adulte, chaud, enflammé & de facile esmotion? C'est vn venin qui trouue par nos yeux des conduits & passages si ouuerts, qu'il passe tout d'un coup iusques au cœur, & verse goutte a goutte dans la rencontre d'un conuersation innocente vn suc empoisonné qui nous gaigne l'esprit, & corrompt peu à peu toutes les facultés & puissances de nostre ame pour peu qu'elle y preste d'agrément & de volonté. Nostre chair est abreuuée d'une huile combustible, & nostre peau toute parsemée & couuerte de feu d'artifice: Nos mains & nos doits sont autant de meches sulfurées qui s'enflamment en vn instant, & embrasent d'une ardeur violente toutes les puissances sensuelles de l'homme vertueux. Est-il vne fois blessé, laissez le retourner chés

luy; il est frappé d'un trait empoisonné, qu'il n'arrache de son cœur qu'avec une extrême violence. Bref la plus haute vertu à bien souvent le plus à faire, & veut bien que nous confessions l'imbecillité de nostre nature, se treuver quelquefois si accablée, qu'il faut une puissance diuine, une grace particuliere pour luy soutenir le menton; Lors principalement que nous sommes assés malheureux pour rencontrer en la familiarité de nos conuersations de ces sortes d'affections muettes, & secretes qui d'abord & malgré nous se contractent mutuellement par les yeux, que le commun des hommes appelle inclinations ou participations de mesmes astres, & mesmes influences. En effect il ne se trouue rien de si puissant en ce rencontre, pour les contenir & tenfermer dans une modeste & sage retenue, Quel'assistance de Dieu & le secours de sa grace. Car tout ce qu'il y a d'ordinaire de plus rare & de plus aimable en un objet, se desploye tousiours en l'abord avec tant de pompe & d'esclat, qu'il est difficile d'en supporter le premier choc sans baisser la veüe. Ce sont ces boutiques du Palais, dont le propre adiancement nous paroist si pretieux qu'il surprend les yeux d'estonnement. A prestout, regardes les bien, ce ne sont que bagatelles; Ces Dames si bien parées, ces visages si rauissants me font souuenir de ces mets à l'Italienne qu'on sert à l'entrée de table, qui avec un peu de carte & de fausse couleur, imitent si artistement la ressemblance des viandes, qu'on pourroit y estre surpris. Ils ne seruent que pour irriter l'appetit, mais non pour l'appaiser. En effect la iouissance & l'usage de ces beaux fruits

fruits dont les plus aymables paroissent aujourd'huy si chargées, descouure assés par vne prompte satieté, que leur plus grande beauté ne consiste qu'en vne petite fleur qui leur couure le sein, & leur pare le visage: en vne legere superficie qui cache vn nombre infiny de deffauts & d'imperfections. Si vostre amour se rend trop curieux il la fane & la corrompt aussi-tost, que si elles sont assés malheureuses pour ne se pas deffendre de bonne heure de ces sortes de sentimens, & qu'elles se laissent tomber en l'experience de ce qu'elles deuroient ignorer toute leur vie, elles ne tarderont gueres a confesser que l'amour est vn trompeur, que c'est vn petit marchand infidelle qui court par la ville, qui s'ingere dans leurs ruelles, dans leurs cabinets, qui entre effrontement par tout iusques dans les Eglises, avec vn petit panier plain de fraises, ou d'autres fruiets agreables selon la saison, mais si tost qu'a prix d'argent il s'en est deffait entre leurs mains, qu'il leur a bien cousté, & qu'elles ont deuoré assés auide-ment ce qui en couuroit la surface, & luy seruoit de monstre & d'appas; le reste se trouue gasté, pourry, & corrompu, & leur déplaist apres tout a loisir, d'auoir payé si chèrement vne marchandise de si peu de valeur. Voila le pis que nous puisse faire la constitution des astres de nous ietter en l'vne des extremités de ce temperament, accompagné encores de beaucoup d'infirmitez & de maladies dont ils outragent le cours de nostre vie. Du reste nous en sommes les maistres: pour les differents degrez du meslange qui se peuuent rencontrer entre ces deux termes les plus esloignés: le nombre en est si grand

R

& d'une remarque si obscure & si difficile que nous ne nous y arresterons point pour le present. Le sage neantmoins dans le plus violent accès de ses agitations naturelles les tempere de bonne grace, & les range sous telle enseigne qu'il luy plaist. Sa liberalité n'en est point endommagée; elle demeure ferme & arrestée en son trofne, & quelque attentat que ces ennemis s'efforcent de luy faire, elle les repousse rudement, & d'une contenance graue, auguste & maicstueuse.

## PARTIE CINQUIESME.

*Quoy qu'on vueille dire de l'Eloquence, qu'elle conduise les hommes ainsi que bon luy semble comme des troupeaux, qu'elle les mene a la creche, & les empoisonne d'un certain mépris de leur sang & de leur vie, si est-ce qu'elle n'a point d'autre pouuoir sur nous que celuy qu'elle emprunte en nostre consentement.*



Ve dirons nous de l'Eloquence dont la secrette vertu remuë toutes nos passions comme il luy plaist, qui transfir & refroidit les plus chaudes esmotions d'une populace irritée, qui iette de l'ardeur & du feu dans le sang le plus froid, & les courages les plus glacés. Le pere de l'eloquence Romaine faisoit conscience de s'en seruir apres des Iuges, & ne feignoit point de dire que celuy

qui pratiquoit vn iuge & s'efforçoit de le corrompre par la force du bien dire, & surprendre sa religion par les charmes de l'Eloquence, n'estoit pas moins criminel que celuy qui s'efforçoit de le gagner par argent & la persuasion pretieuse & eloquente des presents. Que si elle est si perilleuse dans l'esprit de ceux mesmes dont la capacite & l'experience ne doibt rien admirer; quel desordre ne fera elle point parmy le peuple? N'entraînera elle pas avec ses charmes nostre liberté? ne iettera elle pas dans l'esclauage les plus francs & resolutz mouuements de nos volontés? Mais quelque opinion qu'en ait conceüe ce grand Orateur, quelques attraitz que luy puissent donner l'adresse & l'artifice des hommes, elle nous caiole bien, mais elle ne force pas. C'est vne garce effrontée qui est allea nos yeux ce que l'art & la nature luy ont donné de plus excellent pour eschauffer nos desirs, esmouvoir nos passions, esbranler, amollir & surprendre nos plus sainctes intentions, mais qui ne force, & ne gese pas nostre liberté, & ne nous priue point de cette puissance & faculté qui reste en nostre ame, de suiure & d'embrasser mesmes sans raison tel parti que bon luy semble. En vne grande troupe d'auditeurs qui entendent vne mesme harangue, ils se laissent toucher diuersement. Si c'est pour exciter vne sedition, pour s'acquerir vn priuilege esteint & supprimé par violence; l'vn est plus aisement persuadé que l'autre, le menu peuple plus facilement que le noble, & l'ignorant plustost que le sçauant. Rien n'engage tant la liberté de l'esprit que l'admiration & la nouueauté d'vne chose qui luy est proposée pour la



meilleure. La foiblesse naturelle de l'esprit a cela qu'elle se laisse mouuoir a toutes rencontres, & mal aisement peut elle supporter le choc des raisons contraires quel-  
 qu'e opiniastrété qu'elle ait a son parti, sans plier ou faire du moins vne demarche en arriere, quoy qu'elle demeure en garde, & en resolution ferme & entiere de ne lacher la prise. L'ignorant est vn auetugle qui suit le chemin auquel vous adressés le baston qui le conduit, il ne cognoist point de plus grand bien ny de plus grand mal que celuy que vous luy representés, & luy faittes apperce-  
 uoir; mais pour cela sa liberté ne laisse pas d'estre entiere, & le pouuoir qui reside en la bouche de l'orateur de le persuader & le pousser de quelque costé qu'il luy plaist, & qui entrainel vn plustost que l'autre est vn telmoi-  
 gnage indubitable de cette libre disposition de se porter a la paix ou a la guerre: Et parce que de foy il n'est pas ca-  
 pable de se proposer les raisons equitables de l'un ou de l'autre party, pour espouser celuy qui luy est le plus aduā-  
 tageux, l'orateur luy crayonne ce qu'il luy veut imprimer en sa fantaisie & luy en represente l'image, belle, rian-  
 te & bien parée, & ne leue point le rideau de dessus le ta-  
 bleau contraire, & qui peut estre toucheroit bien plus vi-  
 uement son auditeur. De deux armées qui viennent aux  
 prises, elles sont toutes deux gagnées par les raisons par-  
 ticulieres du motif de leur Prince, & s'ils auoient donné  
 pareil poids & credit aux raisons ennemyes, elles change-  
 roient d'enseigne & de quartier, mais non pas de dessein  
 de combattre, parce que les harangues de part & d'autre  
 aboutissent au sang, au meurtre, & au carnage. Il s'en-

suit donc que l'homme est entierement libre, puis que vous le trouués tousiours en estat de plier de quelque costé que bon luy semble; Il n'y a qu'à luy presenter les objects, & les en liouer le mieux qu'il vous est possible: Il ne se lairra toucher qu'à celuy qui s'approchera le plus de son interest. Les artifices de l'orateur sont autant de traits de pinceau qui les embellissent & enrichissent leur prix & leur merite: Ils sollicitent, mais ils ne contraignent point, puis que dans vne mesme assemblée les vns se trouuent persuadés les autres ne le sont pas. En nostre maniere d'agir & de rechercher les choses qui nous plaisent, il faut remarquer la faculté agissante qui est libre, soit pour le choix & la fin qu'elle se propose, soit pour les moyens qu'elle veut tenir pour y arriuer. Et la chose qui concilie nostre bien-vueillance, qui nous appelle & nous conuie agreablement parmy vn nombre infiny d'autres obiects qui nous inuestissent assortis de leurs beautés, & de leurs charmes particuliers qui nous donnent tousiours quelque tour de bec en passant, & nous plaisent quelquesfois iusques au point de renoncer a nostre premier dessein, pour nous engager a vne nouuelle entreprise. Cette puissance donc que nous ressentons si franche au dedans de nous, & d'une estendue & capacité si grande qu'elle s'efforce d'embrasser les choses mesmes qui sont directement opposées comme la volupré & la religion, auparauant son engagement est tousiours dans la faculté de choisir, de prendre ou de refuser, mais depuis qu'elle s'est vne fois declarée, Elle enflamme & entraine avec soy toutes nos passions,

sous le faix desquelles elle se trouue pour lors si accablée, & si puissamment embarassée, que nous ne pouuons plus la considerer en cét employ dans la mesme faculté de iuger & de choisir, qu'elle auoit aparauant son engagement. Comme en la cholere, tant que nous auons loisir d'en remarquer les degrés & les mouuements, nostre liberté est la maistresse qui aduance & recule comme il luy plaist, mais depuis qu'elle a pris party & que la chaleur du sang s'est embrasé au dernier point, elle perd ce beau tiltre & deuiet le iouët miserable de cette detestable passion, iusques a ce que les fumées de ce sang émeu se soient apaisées, & que cette yuressse naturelle soit entierement dissipée car bien que nostre liberté par le debordement de nos appetits, la persuasion de l'orateur, & l'eloquence des obiects qui caiolent & sollicitent nostre concupiscence, semble deuenir paralitique & presque esteinte pour vn long-temps par l'empoisonnement de l'obiect sous la tyrannie duquel elle a volontairement rendu les armes: Elle ne laisse pas neantmoins de conseruer sous la cendre, & retenir en soy ce principe de liberté capable de se resueiller a la moindre picqueure de cette grace surnaturelle dont il plaist a Dieu quelquefois d'esguillonner les cœurs les plus endurcis. Tels moins ceux qui apres auoir sommeillé & languy la meilleure partie de leur vie dans la seruitude de l'amour, de l'ambition, ou quelque autre vice, viennent en vn instant a rompre ces vieux liens, & s'affranchir de cét ancien esclauage; Vous diriez lors que le feu s'est prist tout a coup par tous les endroiets de leur maison, tant ils apportent de soings & de diligences a se

deſcharger des choſes qu'ils eſtimioient auparauant les plus cheres. Si la perte ne ſuffit pour mettre a la haſte tous ces meubles dehors, on les iette par les fenestres, & comme ſ'ils eſtoient peſtiferés ils ſont condamnés aux flâmes de cét amour diuin qui ne ſe faiſit iamais d'vne belle ame qu'il ne la rempliſſe de ioye & ne ſe face auſſi-toſt re-  
cognoiſtre par la merueille de ſes effectſ.

## PARTIE SIXIESME.

*Ce n'eſt pas ſans raiſon que les Poëtes ont ſoumis les Dieux à l'obeiſſance de l'Amour, puis qu'il attaque cette partie diuine qui eſt en nous, & que par des artifices merueilleux il ſurprend quelquefois les plus ſaincts mouuements de nos volontés.*



Comme les grandes ames ſont capables des entrepriſes les plus genereuſes, & qu'elles trouuent des lumieres qui leur deſcouurent de bonne heure non ſeulement la fauſſeté des plaiſirs qui abuſent & retiennent les autres, mais auſſi les portent au choix d'vne pureté de vie qui les eſleue au-  
tant au deſſus du commun des hommes, que l'erreur duquel elles ſe ſont dépoüillées, rend les autres abiects, vils & meſpriſables. Elles ſe doiuent ſur tout preſeruer des ruſes doulces & agreables de cette ſatisfaction ex-

tre me qui succede ordinairement a la gloire des combats quand ils sont fuiuis de la victoire; qui outre le plaisir d'auoir adroitement & genereusement combatu, nous iette en l'ame vn mespris de nostre ennemy, & releue de beaucoup la bonne opinion que nous auions conueu de nostre valeur. Cette ioye dans laquelle nostre cœur se plonge & s'abîme est vne eauë claire & nette mais de facile corruption? De cette pourriture se forme & s'engendrea loisir vne petite couleure qui va serpentant & s'insinuant dans nos entrailles, & par ses dangereuses sinuosités se coule & s'esleue insensiblement iusques au chef, & gaigne le plus pur, & le plus haut estage de nostre esprit. Nous l'appellons vanité d'autant plus perilleuse en cét estat, qu'elle trouue vne ame ouuerte de toutes parts, vn champ despouillé de toutes passîos, & qu'elle y respire bien plus a l'aïse, qu'elle ne faisoit, lors que l'amour, la cholere, la vangeance, l'ambition & les autres vices y tenoient chacun leur logement. Elle se iouë dans ce grand vague & fait quelquefois des coups si dangereux que nous les recognoissons plustost par la playe que nous en descouurons, & le sang espanché qui vient a nous affoiblir, que par la morsure & son esguillon. Quelque mauuais meſnage que nous fassions avec nos passions, quoy que nous ayons rôpu avec elles, la vanité naturelle demeure iouſiours derriere nous: Elle nous suit comme l'ombre iusques dedans la solitude. Si nous tournons la teste pour voir si nous sommes seuls, elle se detourne au meſme moment, & avec tant de ruse qu'elle eschappe a nostre veuë, & lors que dans la retraite la plus

plus secrette nous pensons estre en seureté, elle est derrierenous qui tient registre, & controllen os desseins & nos pensées; cette beste venimeuse dresse vn embusche a nos talons, & nous empesche si subtilement que nous sommes malades, & quelquefois hors d'esperance de remede auparauint d'en remarquer la blesseur. L'homme le plus desgagé de toutes passions, a-il vne fois conceu vne bonne opinion de soy, se croit il armé d'assés de vertu, de constance & de resolutiō, le voila prest a presenter le collet a l'ennemy le plus hardy? Il ne craint pas de se commettre, & se porter seul a la breche, son mespris fait litiere des rencontres les plus espineuses. Il ne se persuade pas qu'aucun obiect le puisse interesser; il regarde le plus beau, & le plus aimable d'un œil mesprisant, superbe & glorieux, & pour en triompher avec plus de gloire il affecte vne gayté & vne complaisance estudiée. Il se compromet facilement, il se hazarde sans crainte, & ne se souuiét plus que l'amour est trop ingenieux pour luy, qu'il à des ruses & des pratiques toutes particulieres qu'il deploye au besoin, lors principalement qu'il aborde & affronte ceux qui font tant les mauuais. Enfin qu'il y a de quoy surprendre nostre liberté, & serire de nos desseins, pour peu que nous sommeillons ou qu'il nous trouue hors de garde. Cependant nostre resolu continue son chemin, & se presente seul en la ruelle d'une Dame, voyons comme ils'en demestlera: Il s'engage dans la caiolerie, l'abord ne l'estonne point, & quoy qu'il se promette beaucoup de complaisance de la part de celle qu'il entretient, & qu'il la considere comme vn ancien obiect de ses flammes pas-

sees, il se sent le sang si froid & si temperé qu'il ne se persuade pas que les yeux les plus beaux soient capables d'y jeter la moindre esteincelle, ou du moins de luy faire prendre feu; il cause, il se diuertit, il tire son gland, il détache en parlant vne espeingle mal mise, & sans y penser, il redresse sur sa gorge vn mouchoir mal adiuaté, il ne s'aperçoit pas cependant que sa main s'appriuoise à luy toucher le sein, à la caresser, qu'elle se brusse par le bout des doigts, & que ce venin imperceptible se coule lentement iusques au cœur. Ses yeux le trahissent encore dauantage, car d'indifferents qu'ils estoient, ils deuiennent curieux, ils se plaisent au larcin, s'abandonnent au pillage, se mettent à butiner ce qui est de plus charmant en ce rare obiet & fouragent licentieusement tout ce qui est capable de les empoisonner. Ils s'ebloüissent dans ces beaux soleils, cette bouche riante leur decouure vn trésor de perles bien arrangées. Ce teint qui rougit à quelque repartie agreable, le surprend, & ne luy donne pas moins d'ardeur, que cette ieune Dame reçoit de pourpre & de feu sur ses ioües. Vn port maiestueux, vne bonne grace, vn soufrire, vne complaisance, vn secret témoignage d'amour, vne main qui par vne negligence affectée touche & presse la sienne bien à propos, met le feu insensiblement à tous les cantons de son ame. Attaque l'esprit, saisit le cœur & embraze toutes les passions qui luy sont soubmises; & quoy que sa resolution ne soit pas encore entierement gaignée, & qu'il se souuienne de ses premiers desseins; elle est maintenant si engagée qu'il y va trop de son honneur, n'ayant point surmonté.

l'abord, ou plustost ne l'ayant pas esuïté, elle se trouue si fort interessée qu'il y va de sa reputation de demeurer en si beau chemin, & quoy que la liberté de l'entendement face mine & contenance de reculer en arriere, elle ne trouue plus qui luy vueille obéir. Les cheuaux entraînent le carosse, le cocher s'est endormy, les rennes luy sont tombées des mains, sa passion ne l'entretient plus d'autres choses, que des raretés de l'obiect qui le rait. Si ce n'est assés de l'eloquence de soudiscours, embrazé par le feu des desirs, il deuient insolent & temeraire. La resistance l'anime dauantage, & l'engage de redoubler ses forces pour enleuer vne place que son ennemy n'a pas dessein de garder, & de desfendre plus long-temps. Cependant la violence de son ardeur qui auoit renfermé sous la clef sa liberté & ses saintes resolutions, s'estant ralentie, imprime en son ame vn sanglant déplaisir de s'estre laissé surprendre à cette vanité naturelle, qui par vn engagement trop licentieux la trahy lâchement & abandonné à la mercy des ennemys. Enfin quand il arriue que ces belles ames si esleuées & si remarquables par le mespris du monde & des choses que la nature nous a rendu si cheres, se laissent piquer a cette bonne opinion, à cet amour propre si mortel & si domageable, ils deuiennent semblables à ces grands vaisseaux de mer, peints & enrichis d'or & d'azur, qui portent en gros caractheres les noms glorieux de la Fortune, du Soleil, de la Prouidence, & de ce qu'il y a de plus riche & de plus pretieux dans le Ciel; Et cependant que leur rare beauté iette de l'admiration & de l'estonnement dans



les yeux de celuy qui les considere, ils perissent & se submergent lentement par le moyen de quelque petite ouverture cachée qui fait eau & attire insensiblement au fonds de la mer cette superbe masse qui nous causeoit auparavant tant de ravissement & de merueilles. Si la science n'est rare & au plus haut degré de sa perfection, difficilement se peut elle accorder avec vne humilité Chrestienne. Son orgueil & son enflure paroist en toutes occasions. Ceux qui par l'excellence de leur esprit se sont acquis le pouuoir d'instruire les autres, vzurpent facilement le droict de leur commander. La deference favorable qu'ils rencontrent en leurs auditeurs, est vne machine qui les esleue doucement, & qui sappe & mine les plus solides fondemens de leur humilité. Quelque doctrine que nous voyons esclatter en ces bouches si eloquentes, si l'interest ou la vanité les anime, nous pouuons dire encore qu'ils ressemblent a ces flambeaux qui se bruslent & se consomment miserablement, pendant qu'ils esclairent les autres. Apres tout quelque grace dont nostre ame se trouue comblée, nul n'est asseuré de la perseuerance, & le plus seur moyen de conseruer vne bonne conscience, est de luy donner pour fidele compagne & garde perpetuelle l'humilité, la crainte, & la des fiance de soy mesme.

## PARTIE SEPTIESME.

*Le consentement vniuersel des Philosophes et l'autorité que les Loix s'acquierent dans les Republicques, nous enseignent qu'il n'est rien de si libre que la volonté de l'homme.*



Ve si vostre curiosité veut passer plus oultre, & s'informer de la pensée & de l'opinion que les antiens ont eüe de nostre liberté, vous trouuerés les Philosophes engagés vniuersellement à sa deffence:

Les Peripateticiens, les Academiques, les Sages d'Egipte, & les Stoiciens mesmes qui se sont engagés avec tant d'opiniastrété à l'establissement d'une destinée à laquelle ils soubmettoient toutes choses, n'en ont ils pas exempté l'ame del'homme, qu'ils ont publié affranchie de cette dure loy. Et le maistre de l'eloquence Romaine qui estoit aussi bon Philosophe qu'excellent Orateur, à il pas mieux aimé (auraport de ce grand Pere del'Eglise) se rendre sacrilege, plustost que de declarer sa volonté esclau de la Prouidence Diuine, qu'ils appelloient du nom de fatalité. Il ne pouuoit coudre ny bien adiufter ensemble ces deux pieces de consequence, faute de cette lumiere Chrestienne, qui rend dés le berceau nos enfans plus fermes en la Philosophie, que ces grands persona-

ges ne se pouuoient promettre de certitude dans leurs plus eminentes ratiocinations. Que si vous interrogez les Republicques, pourquoy elles ne se peuuent maintenir sans vn si grand attirail d'ordonnances & vn si grand nombre de Loix: Elles vous respondront que l'homme est veritablement vn animal sociable qui prend vn extreme plaisir de viure en troupe & en compagnie; mais qu'il à des mouuements si extrauagants, que si sa volonté n'est retenuë par la crainte des Loix, qu'elle ne manquera iamais de s'eschaper & s'emporter en mille rencontres, & par son caprice troublera a tous moments le repos & la tranquillité de ses compagnons. Que s'il se trouuoit quelqu'vn si peu raisonnable qui voulut estre tout seul de l'opinion contraire, il vous est facile de le faire dedire, & l'obliger de se donner vn desmantry sur le champ; Menés-le aupres d'vn enfant ou d'vn insensé qui luy iette de la boüe, ou qu'il le frappe, il se retirera promptement, & tesmoignera quelque compassion de ces pauures miserables qui ne sont pas maistres de leur esprit. Leurs iniures ne sont pas capables de l'offencer. Qu'vn autre qu'il estime raisonnable luy vienne cracher au nez, ou luy donner vn soufflet, vous le verrés partir de la main & faire d'estranges extrauagances? Demandés luy, ce que c'est, il vous dira que c'est vn marault, qui luy à donné sur la ioüe, & qu'en recompense il la bien estrillé. Dites luy que cet homme ne pouuoit pas s'empescher de le battre, puis qu'il n'est pas libre, & qu'il est forcé en toutes choses: Il vous dira que cela est faux, & qu'il se pouuoit bien passer de le fraper, ou de luy chanter in-

iures, qu'il n'est pas d'humeur à souffrir & par ses actions vous fera voir que sa creance est contraire à ses paroles. Que si sur ce propos nous voulions rapporter icy les témoignages des saintes lettres, & les passages des Peres de l'Eglise, nous serions obligés de faire un volume plus grand que ce discours; mais il faut gagner chemin & suivre la pointe de nostre entreprise.

## SECTION DIXIESME.

## Du Concours.

*Le Concours de Dieu ne violente point nostre liberté. Avec les choses necessaires, il opere necessairement. Avec les natureles, naturellement, & librement avec celles que nous appellons libres.*

**P**UIS que de toutes les choses qui nous environnent, que de celles mesmes qui prennent part a nostre composition, & font la plus grande partie de nous mesmes, qui est le sang, la chair & tout ce qu'il se trouue en nous de grossier & materiel, quelque habitude & intelligence qu'ils ayent avec nostre volonté, n'en surprennent iamais la liberté sans son consentement; il faut encore passer plus outre, & voir si ces chaines inuisibles, sous l'estreinte desquel-

les toutes choses sont tenues dans le deuoir; & qui s'estendent & embrassent iusques au dernier moment des siecles, pesent en quelque maniere à nostre liberté, & l'empêchent de sorte qu'elle soit geseñée en la franchise de ses mouuements. Le Concours est vn de ces petits chaiffons qui del'vne de ses extremités aboutit à la Diuinité, & de l'autre s'estend iusques à la dernière des Creatures, & comprend dans le Cercle qu'il compose toutes les choses qui sont contenues en l'ordre de la creation. Pour le faire comprendre plus clairement, Nous disons que le Concours est vn rayon de la Diuinité qui se respand en toutes choses, par l'ayde, le secours & l'entremise duquel toutes les Creatures sont conseruées en leur estre, & en leur faculté d'agir, & sans lequel il n'est pas en leur puissance de subsister, ny de faire la moindre action qui nous puisse tomber en la pensée. Il est vray que par la nécessité & son poids admirable, il semble faire pancher la balance, & faire plier nostre volonté aux mouuements qu'il luy donne, puis qu'il n'y a rien qui puisse subsister sans cet ayde & ce secours Diuin, qui appuye & soustient toute la nature créée, & sans lequel elle ne pourroit pas seulement agir, mais tomberoit dans le neant. On pourroit quasi dire que ce soit la presence de Dieu que nous auons cy-deuant remarqué estre en toutes choses, comme leur estre veritable le plus occulte & le plus caché. Et puisque nostre liberté est vne piece du nombre de celles qu'il a créées, il en est pareillement l'estre le plus intime, le soustient & l'appuy. Mais comme nous ne scaurions marcher si la terre ou quelque corps

corps solide ne supporte le fardeau & la masse de nostre corps, Nostre liberté aussi ne peut subsister si elle n'est soustenuë de l'estre Diuin. Elle se meut comme dans son element avec vne aussi grande facilité que les oiseaux en l'air, & les poissons en la riuere; Et de mesme que la terre sur laquelle nous sommes appuyés, n'est pas cause que nous allons le pas, le trot où le galop; Dieu tout de mesme, quoy que par sa puissance & vertu Diuine il soustienne toutes choses, n'empesche pas que nostre volonté ne marche comme bon luy semble, à droit, à gauche, & n'aille tel train qu'il luy plaist. Pour estre le soustien & l'appuy des mouuements de nostre liberté, Il ne s'ensuit pas qu'il la contraigne; non plus que l'air n'est pas la cause du vol, ny de la diuersité des mouuements differents d'un oiseau. Le Roy vous donne vne charge de Conseiller dans vne Cour Souueraine, ce caractere qui ne vous peut estre donné que par le Prince, Vous met en main le pouuoir de bien faire, ou de faire mal; l'un & l'autre sont en vostre choix; Il ne gese en rien vostre liberté, il n'engage point vostre volonté à faire iustice, où iniustice, à conseruer à chacun ce qui luy appartient, ou oster à quelqu'un ce que vous voulés donner à vn autre. Vous estes libre & disposés de vostre conscience comme il vous plaist. Il est de mesme du concours Souuerain? Sans ce caractere, vous ne pouués faire ny bien, ny mal, mais il ne vous force ny ne vous oblige à l'un ny a l'autre. Qu'ainsi ne soit, vous vous rangés du party de Dieu en vn temps, & embrassés celuy de ses ennemis en vn autre. Il est vray qu'il meut

d'un mouuement, réglé certain, & qui ne se desuoie iamais, toutes les choses naturelles, Mais il m'eut librement les choses libres, & les remüe sans leur faire force ny violence, & sans leur imposer aucune contrainte. Pour bien entendre cecy, il faut sçauoir que toutesfois & quantes que de deux causes qui concurent à vn effet particulier, Il y en a vne generale, & l'autre particuliere, Il est certain que la generale se determine tousiours à la particuliere; comme vous entendés dire dans les escoles, que le Soleil, c'est adire son influence, sa chaleur & son mouuement requis & necessaire aux operations vitales, & l'homme, engendrent l'homme. Le Soleil cause vniuerselle, se determine à la particuliere qui est l'homme; Car avec le cheual il se determine à l'espece du cheual. Ainsi le concours de Dieu qui est vne cause generalissime, avec vne cause naturelle se borne & renferme à vn effet naturel, & avec vne cause libre se determine à vn effect libre & volontaire. Que si vous voulez vne comparaison bien familiere pour cette intelligence, Il ne faut que regarder le courant d'une riuere, si vous prenez deux courgés vuides bien bouchées & attachées ensemble, ou bien de ces balons ou vessies plaines de vent qui seruent à nager à ceux qui veulent apprendre, accomodés-y entre deux quelque verge de fer d'un poids raisonnable, ou quelque autre chose dont le mouuement naturel est d'aller au fonds de l'eau, vous fairés qu'elle ira tousiours audeffus, & se laira porter au courant de l'eau iusques au dernier point de sa course. Qu'un homme qui ne sçait pas bien nager en prenne de sembla-

bles, & se les applique sous les aisselles, pourueu que ce ne soit pas vn Paralitique ou vn estropié, au lieu de suivre le courant de l'eau, il se portera ou il voudra, pour peu qu'il face de mouuement, & prendra terre quand bon luy semblera. Ostés à cet homme, & à la verge de fer, ce secours qui les empeschoit d'enfoncer, vous les verrez tous deux couler au fonds de l'eau. Le concours de Dieu fait à l'égard de l'homme & des autres creatures vn effet tour semblable, il soustient le menton à nostre volonté, & empesche que les choses naturelles ny aucune des creatures ne tombe dans l'abisme du neant. Et quoy qu'il conduise celles-cy selon le courant de l'eau, & leur appetit naturel, il ne force, & ne contraint en aucune maniere nostre volonté, & luy laisse la liberté toute entiere de se porter à tel bord que bon luy semble, d'aller en bas ou contremont quand il luy plaist, d'aborder & prendre terre quand il luy vient en fantasie. La prouidence conserue la nature, & ne la destruit pas, ce dit le Docteur Angelique, qui fait que chaque chose est meüe selon sa condictio[n] & sa portée: les naturelles necessairement, les fortuites casuellement, & les volontaires librement & comme il leur plaist.



## De la Prescience.

*Il est certain que la Prescience de Dieu est infail-  
lible, mais ceux qui ne la peuuent accorder avec  
nostre liberté, ne cognoissent pas les forces & les  
vertus de l'une & de l'autre.*



L nous reste maintenant deux choses à examiner, l'une la prescience de Dieu, l'autre la predestination, que nos ennemis s'efforcent d'employer pour destruire & renuerfer les fondemens de nostre liberté. Mais comme les choses bien entendues n'engendrent point de trouble dans nostre esprit, il importe de proposer la difficulté qui semble gesner leur opinion, & demesler en peu de mots ce cahos ou embarrasement qu'ils se proposent sur cette matiere, Dieu, se disent-ils, preuoist & connoist les choses futures, donc elles doiuent arriuer de necessité, parce que Dieu ne peut se tromper en son calcul. On respond que pour bien iuger de la prescience de Dieu, il faut entendre premierement ce que c'est, & puis il n'y aura plus de difficulté. Les choses passées ou aduenir sont toutes presentes deuant Dieu, & quoy que à nostre esgard elles roullent succeßiuiement, & paroissent en l'ordre du temps qui leur est prescript, il les void aussi distinctement en leur terme final, qu'en leur principe. En effect

estant arriuées à leur fin, elles deuiennent necessaires & infaillibles. Mais il ne s'ensuit pas qu'elles le feussent auparauant. Vous considerés par exemple vn ieune garçon qui par diuertissement se iettera trente fois le iour du haut du Pont-neuf dans la riuiera, puis que vous le voyés, cela est certain, necessaire & infaillible, autrement vous ne le verriés pas. Mais cela n'empesche pas que ce garçon, n'ait en soy la liberté pleine & entiere de se ietter en leau, de le faire, ou de ne le faire pas, puis que pour vn sol il vous en donnera le plaisir. Vous ne sçauriés nyer que cette action ne soit necessaire, puis qu'elle est arriuée; & qu'elle ne procede d'un principe libre, & qui pouuoit eueparauant l'euenement de la chose, la faire, ou ne la faire pas; & partant la necessité se peut en quelque sens, accorder avec la liberté; & toute necessité n'endommage pas la franchise & indifférence de nos actions, mais seulement celle qu'ils appellent antecedente & qui preuiant l'action, parce que depuis qu'une chose est faite, il n'est pas seulement certain & infaillible qu'elle est; mais il est encores necessaire qu'elle soit, puis qu'elle est; Ce que les Theologiens appellent necessité de consequence; Celle cy donc, ne force pas comme vous voyés par l'exemple de celuy que vous aués veu se ietter en l'eau pour se baigner. Il n'y à que la premiere qui à pouuoir de lier & de contraindre, & laquelle n'a aucun empire sur les libres mouuements de nos volontés. Dieu tout de mesme, dont l'infinité compose vn cercle qui enuoloppe tout, & qui preuiant par sa cognoissance l'effect d'une chose, ne corrompt ny endommage en façon quelconque la

liberté de celle qui est fortuite, ou volontaire. Qui nous fait dire que deuant Dieu, il n'y a rien de casuel, mais à nostre esgard seulement. Car nous appellons chose fortuite, ce qui peut estre, ou n'estre pas; Comme la disposition que nous auons à parler, ou à nous taire. Il n'est pas impossible que vous ne puissiez parler. Il n'est pas impossible que vous ne vous puissiez taire. Beaucoup de choses arriuent qui pouuoient ne pas arriuer, a considerer l'indifference du lieu & principe d'ou elles partent; & beaucoup aussi ne sont pas aduenues qui pouuoient arriuer. Mais à l'esgard de Dieu qui voit la fin & le veritable aboutissement des choses, les void comme necessaires. Et partant ne sont point fortuites aupres de luy; Mais aussi n'impose-il point vne necessité, comme nous auons dit aux actions qui fluent d'une libre volonté, parce que la certitude qu'il en a, procede de la fin qui luy est presente, & a laquelle elles se font volontairement & librement acheminées.

On passe plus outre, & on nous obiecte que la prescience de Dieu est cause de toutes choses, & partant comme il n'est pas necessaire d'admettre plusieurs cordes pour tirer vn fardeau, si vne seule peut suffire. Il suffit donc que cette cognoissance & science diuine, se mesle de conduire toutes choses certainement à leur terme, sans que nostre liberté & nostre conseil se mette en peine de choisir. Mais il est facile d'éclaircir cette proposition, & en faire voir le deffaut. Vn Pere de l'Eglise, nous demestlera bien cette fusée & y satisfera en peu de mots. Si la Prescience de Dieu rend les choses necessaires, &

priue les hommes de liberté, c'est ou en tant qu'elle est Prescience, simplement, ou en tant qu'elle est prescience de Dieu. Si c'est en tant que Prescience, il s'ensuivra que la prescience de l'homme imposera vne necessité aux choses, ce qui est faux. Car la prescience que nous auons du leuer du Soleil qui se doit faire demain matin, ou d'une Eclipsé de Lune qui doit arriuer le mois prochain, quoy qu'elle soit tres certaine & infaillible, n'impose aucune necessité au Soleil, ny a la Lune: Et le Laboureur qui sème sa terre, à vne prescience & cognoissance anterieure que son grain germera, & luy produira avec le temps vne moisson fauorable, sans que pour cela on puisse dire qu'il impose au grain de bled aucune necessité d'agir, & partant la prescience, en tant que prescience n'oblige point, que si vous dittes qu'elle force en tant qu'elle est prescience de Dieu; ie vous responds que cela est faux & absurde, car tout de mesme que Dieu par sa prescience void & cognoist toutes les choses futures, il se cognoist aussi par elle mesme, & sçait tout ce qu'il veut faire; & partant, si elle est capable de lier & contraindre la liberté de l'homme, elle peut aussi lier & engager en Dieu mesme la liberté de ses actions, parce qu'il les a preueues, ce qui est absurde, & ne peut tomber sous le sens. Il s'ensuit donc que la prescience de Dieu, en quel que maniere que vous la vouliez ou la puissiez prendre, ne peut gener & contraindre la liberté de nos volontés. De sorte que nous pouons hardiment conclure avec le sentiment de Sainct Hierosime, Sainct Chrysostome, Sainct Epiphane, & autres Peres de l'E-

glise, que les choses n'arriuent pas parce que Dieu les a preuëties, mais au contraire que Dieu les a cogneües, parce qu'elles estoient futures. Il y à en Dieu deux sortes de cognoissances, l'une pratique, par laquelle il a créé le monde, l'autre speculatiue, par laquelle il void les choses & les considere sans leur imposer aucune sorte de necessité d'agir: Et c'est de celle-cy dont nous parlons, & que nous appellons prescience diuine, à laquelle rien ne peut eschaper dans la pureté de sa lumiere, qui enuifage toutes choses d'un clein d'œil, & qui n'impose aucune force, contrainte, ny dureté aux choses naturelles, fortuites & volontaires.



SECTION

## SECTION QVINZIESME.

## De la Predestination.

## PREMIERE PARTIE.

*La Predestination est la derniere retraitte des ennemis de nostre liberté, mais estant bien entendue, ils demeureront sans deffences & seront contrainsts de changer de party.*



E ne puis assés admirer la bonté de Dieu, de souffrir que nous portions à toutes heures nos mains impures & sacrileges sur ses Autels, & que nostre esprit esmoussé, qui n'a pas la force de penetrer le sein d'une petite fleur, contrainst de s'arrester à la superficie, & se contenter de la figure & de ses couleurs, se mette d'enuisager la Toutte-puissance, & avec ses foibles outils, entreprenne de mesurer la profondeur de ses abismes, & discourir des secrets de ses saintes volontés. Mais l'impieté du siecle profere tant de blasphemes contre cette divine majesté, qu'il semble que tout le monde ait droict de s'en scandaliser, & qu'il soit bien seant au moindre du peuple de se declarer soldat en cette cause, & de prendre les armes pour la defence d'une querelle si legitime. Nous disons que la predestination fait partie de cette providence dont nous avons parlé cy devant,

laquelles s'estend generally à toutes choses, mais celle-cy ne regarde que les personnes libres seulement. Comme les Anges auparavant leur cheute, & les hommes en l'estat present; Elle se prend aussi quelquefois en bonne & mauuaise part, & en ce cas on pourroit dire que c'est le decret ou l'arrest de nostre vie où de nostre mort, donné de toute eternité dans le sacré conseil de Dieu, & interuenu sur la cognoissance parfaite qu'il à de nos mauuaises actions, ou de nos bonnes œuvres & vertus Chrestiennes accompagnées de la grace, lesquelles quoy qu'à eschoir & non encores aduenues, sont aussi presentes deuant Dieu, que ce que nous voyons est present à nos yeux. Mais pour en parler plus distinctement, nous dirons que la predestination est vn choix que Dieu fait de quelques personnes, leurs merites preueus pour les approcher de sa diuine majesté & les couronner de gloire. La reprobation au contraire est le fumier, & le reiect qu'il faiet des autres comme indignes de cette haute recompense. Ce triage ce dit-on, est faiet de toute eternité, Il s'ensuit donc que quelque effort que nous puissions apporter, au contraire, nous ne sçaurions en rompre le cours, ny en diuertir le iugement. A cela la response est preste, & comme nous venons de dire que Dieu embrasse le passé & l'aduenir, que sa cognoissance preuient la suite des temps, & les euenemens des choses & qu'il les cognoist parce quelles doiuent arriuer, & non pas au contraire: il a aussi par la mesme prescience veu de toute eternité & à descouuert le merite, & la fin des bonnes actions des vns, lesquels il à aussi predestiné & resolu.

de toute eternité de recompenser en eschange d'une felicité eternelle. Et de reprouuer & chastier le crime des autres, qui luy estoit aussi present que vostre visage l'est à vos yeux dans la glace de vostre miroir. Et partant la predestination ou reprobation n'imposent aucune necessité, puis qu'elles engendrent del'euenement des choses, lesquelles pour estre fort esloignées de l'origine des temps ne laissent pas d'estre tousiours presentes deuant Dieu, & partant elle n'impose pas à nos volontés vne contrainte & vne force plus grande, que la prescience de Dieu que nous auons demonstré ne pouuoir en quelque maniere que ce soit blesser ou interesser nostre liberté; Et quoy qu'on vueille dire de ce decret, qu'il soit plus vieux que les temps, & qu'il ait autant d'âge que la diuinité, enfin qu'il soit eternel comme Dieu, il ne violente pas pour cela l'ordre des choses, que sa bonté à vne fois establie par sa diuine prouidence. Le mouuement des choses naturelles n'en est point retardé, la volonté des hommes n'en est pas moins libre, & son diuin concours comme nous auons remarqué, s'accommode à chacune des choses selon la puissance & disposition qui leur est donné du tres-haut. De dire qu'il eust esté plus expediant pour l'homme qui sera vn iour priué de la grace de Dieu, d'auoir esté pour iamais rayé du liure de vie, que d'y estre employé si desauantageusement, & avec des caracteres si effroyables. On respond qu'il suffit que toutes choses ayent esté créées pour la gloire de Dieu, & pour l'aduantage de l'homme, qu'il se doit contenter de iouir d'une pleine liberté, qu'il ne peut maintenant



douter qu'il ne depende entierement de luy de se perdre, ou de se sauuer; Que sa condemnation ne procede que de son crime, que ce sont les mauuaises actions qui fabriquent son mal-heur & exigent de la iustice de Dieu la punition de ses fautes. Enfin que la liberte de nos actions Chrestiennes se rend digne de la iustification, ou de la condemnation, & qu'elle determine la puissance de Dieu à l'un ou à l'autre. C'est donc nous qui sommes les artisans de nostre bonne ou mauuaise fortune; Et quoy que Dieu nous regarde de bien loing, qu'il soit eleué au dessus de nos têtes, & qu'il tiennne en ses mains ce beau Vase de Cristal, dans l'enclos duquel l'Vniuers est contenu & renfermé, & que ce Globe Elementaire comme vn petit point esgalement repoussé par tous les endroits de la circonference soit suspendu au milieu, il nous y considere libres, il nous laisse courir, arrester, reculer, esleuer, abaisser, comme il nous plaist, sans nous donner le moindre suiet de nous plaindre, ny d'acuser sa force ou sa violence. N'estoit-il pas aussi raisonnable puis qu'il est le maistre, & que toutes choses sont faites principalement pour sa gloire, que sa iustice trouua de quoy s'employer aussi bien que sa misericorde. Et si Dieu eut priué l'homme de conseil, & de la liberte avec laquelle il court & embrasse les objets qui le charment le plus, auroit on payeu raison de doubter que la iustice, cette noble vertu qui porte tant de marques de souveraineté se trouuaist en Dieu? & n'auroit on pas parlé de luy comme d'une cause forcée & contrainte, qui ne pouuoit produire, ny faire des creatures indifferentes, c'est

à dire qui eussent la faculté de choisir, & se porter au froid ou au chaud, à vne extremité, ou à vne autre. Que seroit-ce si toutes choses estoient naturelles, & n'auoient qu'une sorte de mouuement. De voir leuer & coucher le Soleil, la Lune & les Astres dans leurs periodes & mouuements reglés, reprendre leur train ordinaire, le Printemps succeder aux Hiuers, & l'Authonne aux Estés, le beau temps à la pluye, la verdure à la secheresse, les fruiets aux fleurs, & les moissons aux soings du labourage: diroit-on pas qu'elles procederoient d'un maistre qui ne scauroit qu'une leçon & la recommenceroit tousiours. Il falloit donc pour sa gloire qu'il y eust des creatures libres, & qui par l'indifference de leurs actions rendissent vn tesmoignage parfait de la Toute-puissance de Dieu.



## PARTIE DEUXIESME.

*Que la Predestination ne procede que du seul merite de nos actions, & que nos crimes sont les auteurs & les iuges de nostre condamnation.*



Ceux qui ont tant de curiosité que de s'enquerir des plus secrettes deliberations formées de toute eternité dans le sacré conseil de Dieu, ne doiuent pas ignorer que la premiere fin que ce souverain maistre s'est proposée estoit de placer toutes les creatures libres aduantageusement, & de les colloquer dans l'estat le plus glorieux qu'elles se pouuoient imaginer; Et quelques marques de severité que nous puissions appercevoir en sa main de Justice, Elle voudroit bien n'estre employée qu'à cet effect à nous recompencer, & non pas à nous punir. Mais le choix que nous faisons d'une vie libertine & detestable nous en arrache par violence, rend par ce moyen l'amour de Dieu inutile pour nous, & le priue de la fin qu'il s'estoit proposée, & à la quelle nous arriuerions tous pour peu qu'elle fut secondée de nos desseins & de nos saintes intentions. Il n'est rien de si certain qu'il faut mourir, & nous ne pouuons maintenât douter aussi qu'il ne nous faille vn iour calculer nos bonnes &

mauuaifes actions, & rendre vn compte exact de nostre vie passée deuant vn iuge, dont les yeux sont si clair voyants que nous ne pourrôs y coucher de faux emplois. Qu'elles deffenses pour nous, lors que Dieu armé de Iustice comparoistra deuant la face d'un si grand nombre de criminels! doutés vous que ce ne soit la douleur la plus cuisante, & vn despit contre nous mesmes le plus enragé de cognoistre lors, & voir à descouuert que c'est nostre seule volonté & libre arbitre qui nous aura taillé la part du gasteau que nous en aurons. Pour lors les mouuements de nostre condamnation nous paroistront si iustes en Dieu, & sa misericorde si grande, que nous serons accablés de honte & de confusion, & ne trouuerons pour nous tourmenter de pires ennemis que nous mesmes. Iugés si vous rencontrant de nuit en vne meslée; il vous arriuoit de tuer le plus intime de vos amis, & que la clarté du flambeau y arriuat à point nommé pour vous le faire voir sous vos genoux le poignard dans le sein, les yeux encore assés ouuerts pour luy faire cognoistre que c'est vous qui l'assasinez, sans vous pouuoir iustifier de vostre meprise, quoy que par effect vostre vengeance & le manteau de la nuit vous l'ait fait prendre pour vn autre. Quel rage, quel desespoir ne saisiroit point vos sentiments; qu'elles furies n'agiteroient point vostre ame, d'estre tombé dans vne si déplorable rencôtre? Auriés vous besoin pour vous tourmenter d'autres bourreaux que de vous mesmes? Ne seroit-ce pas assés de vostre propre conscience, de vos douleurs, & de vos desespoirs pour vous gesner dans vostre solitude, dans

vostre cabinet, sans qu'il fut besoin d'inuenter pour vous d'autres supplices. As-tu quelque amy qui te soit plus proche, & plus intime que ton ame? Dis-moy d'oc, Quand ce Soleil de Iustice viendra mettre toutes choses à descouuert, qu'il te fera voir ton appetit sensuel, le cousteau à la main, tout sanglant, plongé dans le sein de ton ame, sous le voile de tes lascches voluptez meurtrie à la faueur de tes crimes, & sous l'obscurité de tes sacrileges? Quels reproches ne te fera elle point de l'auoir si laschement trahie? De luy auoir dressé des embusches mortelles? & pour comble de tous malheurs, par la pointe d'un fer enuennimé, l'auoir outragée d'une viuante mort? Si les hommes se rendoient un peu soigneux de leur salut, & de s'informer de ce qu'ils doiuent à Dieu, & des bien faicts qu'ils en reçoient: Nous ne verrions point tant d'ingratitude & d'impiété dans le siecle; Mais comme s'ils faisoient trophées de leurs crimes, ceux que Dieu a le plus enrichy des lumieres de l'esprit, & de graces naturelles, se rendent aujourd'huy les plus mesconnoissants, & ne payent tant de rares presents que d'injures, d'opprobres, & de sacrileges. Cessez donc de vous plaindre de la Iustice de Dieu, vous la sentés & la preuoyés, sans vous mettre en peine de destourner de dessus vostre teste, cette lourde & puissante main; quelque aduertissement qu'il vous en puisse donner, ne trouue aupres de vous que du mespris & de la froideur; vostre ruine, vostre perte vous est apparante, & vous y courés, sans aucune contrainte. Vous n'oseriés, ce dites-vous, abandonner vostre ambition, ny fausser la parole que vous auez donnée

donnée à vos plaifirs. La Dame que vous ferués publicra voftre legereté, fe plaindra de voftre inconstance, & fes accusations rendront voftre foy & voftre reputation criminelles. Hé quoy cette grande fidelité que vous apportés à trahir voftre propre conscience, cette constance à mal faire, cette perseuerance pour vous si domma-geable, Vous mettra-elle à couuert de ces mains qui vous ont formé? de ces yeux qui font continuellement ouuerts dessus vous, & qui font les testmoins irreprochables de vos plus secretes pensées. La terre qui tremble à ses commandements, s'esleuera elle contre son maître, pour vous former vne petite loge & vous parer de la pointe enflammée de son foudre, des traits de sa cholere, & du feu de son indignation? Il vous à tant de fois recherché, sollicité & persuadé de changer de vie: vous estes vous mis en deuoir de le faire? vne legere occasion, vne foible consideration du monde, à rompu la trame des desseins que cét excellent ouurier auoit commencé en voftre ame. Quoy! voulés vous que cette grande misericorde de Dieu, qui fait quelquefois des coups si hardis dans le monde, vous parle dans vn Buiffon ardent, vous donne en vne nuit la cognoissance parfaite de toutes choses, & vous promene depuis le Tim iufques au Cedre; ou qu'il entreprenne de viue force de vous ietter à bas de voftre cheual, ou plustost qu'il abaifse la portiere de voftre carrosse, pour vous esleuer dans le Ciel, vous communiquer les rayons de sa gloire: Bref qu'il change par vne force diuine, toutes vos sales & malheureufes pensées, en de faints desirs & pieufes me-

ditions, sans que vous ayés la peine d'y contribuer aucune chose de vostre part, Ne vous y attendés pas, il vous fournit assés d'autres moyens. Il s'est seruy de ceux que ie viens de marquer, quand il en à esté besoin pour sa gloire, & le bien de son Eglise ? Et quoy que sa misericorde soit infinie comme luy, & qu'elle surpasse autant le reste des vertus, que l'aisné à dauantage sur ceux qu'i deuanee d'aage & de naissance; & que Dieu la respande encores quelquefois avec tant de profusion & de prodigalité, que nous en sommes estonnés; Comme il arrive en la personne de ceux dôt la vie passée noircie & toute couverte de crimes & d'impietés, se voit neantmoins au dernier soupir, couronnée d'une fauorable & bienheureuse fin ! Ne vous y attendés pas; Ces exemples frequents & familiers, sont pour vous autant de manieres de parler, dont Dieu se sert pour vous instruire, resveiller vos sentimens, & faire luire dans vostre cœur les rayons de la grace. Celuy est bien malheureux, qui ne se met de bonne heure en chemin, & ne s'efforce de la preuenir, d'aller audeuant & à la rencontre, paré de ses bonnes œuvres & saintes intentions. Souuenés vous d'envisager sa iustice, laquelle pour marcher lentement & à pas de plomb, ne donne pas moins de terreur & d'effroy à ceux qui la cognoissent. Elle voudroit bien n'estre employée qu'à recompencer nos bonnes œuvres, & nous donner le prix qu'elle propose pour gloire à l'esperance des combatans; mais nous la contrainçons à nous punir. Nous sommes les forgerons des chaînes qu'elle nous prepare. Enfin il depend de nous de les rompre, de les

mettre au feu, & de desarmer la main de Iustice des chastiments effroyables dont elle nous menasse.

## PARTIE TROISIEME.

*La misericorde de Dieu se porte quelquefois iusques au point d'esleuer au Trosne de sa gloire qui bon luy semble, sans aucun merite preueu, mais il n'en condamne iamais pas vn que la multitude des crimes n'ait forcé sa iustice de le punir.*

**I**L est vray que les saintes lettres sont toutes remplies des effects de sa misericorde, & nous la representent quelquefois d'as vn si grand excés, que de gayeté de cœur & pleine puissance, & autorité diuine, elle prend plaisir d'esleuer qui luy plaist sans aucun merite preueu, auectant d'esclat & de pompe que nostre esprit n'en peut conceuoir que de l'estonnement. Il ne le faut pas trouuer estrange! il tranche du souuerain quand bon luy semble, & fait des liberalités dignes de sa grandeur. Qu'importe? elles ne sont à charge à personne, il ne foule point ses sujets, il n'incommode ny n'appauurit son Domaine? Telsmoin vn Iacob, qu'il gratifie du droit d'ainesse, qu'il comble de benedictions, dont le pauvre Esäü est frustré. Celuy-cy tombe dans sa disgrâce, & se void priué de tous les aduantages qu'il void entre les



main de son frere. Mais peut-on trouuer estrange que celuy qui forme les metaux dans les entrailles de la terre en dispose comme il luy plaist. Que celluy qui marque les degres d'honneur entres les hommes, esleue les vns, abaisse les autres, & les place à tel rang que bon luy-semble. Qu'il face naistre les vns pour commander, les autres pour obeïr! qu'il employe les vns à la charrue & au labourage, les autres à establir les loix, & regler les polices. Si toutes choses estoient esgalles, comme pourroit-on nommer cette republique. Ou seroit la grace, la beauté, & les proportions du corps politique, qui doit auoir sa teste, son corps, ses membres & ses dimensions iustes & bien porportionnées. Si toutes les parties du corps humain enuioient la beauté de l'œil, & que pour les satisfaire elles fussent toutes conuerties en cette noble partie, ne seroit-ce pas vn monstre affreux & espouuentable, plustost qu'un corps bien formé. Et si les charges, les biens & les degres d'honneur estoient esgaux, que deuiendroient les Arts mechaniques, qui voudroit trauailler pour ses compagnons, & faire les offices les plus vils dont vn estat ne scauroit se passer! de qu'elle obligation nous à-il preferé à tant d'autres; En effect il est le maistre de l'hottellerie, il nous y donne tel giste qu'il luy plaist. Ne nous oblige-il pas assés de nous donner le couuert; est il tenu de nous faire manger à sa table, si par nostre humilité & nos seruices, nous ne nous rendons digne de cette grace? aussi n'y a-il rien qui nous pesse en ce rencontre que la disgrâce & le malheur d'Esau; Nous le plaignons de ce qu' auparauant qu'il eut

fait aucune chose digne de chastiment, Dieu le regarde d'un œil courroucé, & plein de haine? Mais il n'est pas difficile de satisfaire à cette objection, & aux autres qui sont de pareille nature. Le Saint Esprit pour se communiquer & se faire voir prend des formes corporelles, il descend en langue de feu, il se respand en l'air comme un vent terrible & impetueux? veut-il parler à nous, il emprunte nostre façon d'exprimer les choses, il se sert d'un langage humain & accommodant à nostre foiblesse. Et parce que les benedictions temporelles sont apperceuës de l'œil des hommes, comme vne rosée diuine que Dieu verse sur la teste de ses fauoris; nous expliquons aussi-tost le lieu qui en est despourueu, ou sur lequel elle ne tombe pas en si grande abondance, infortuné, malheureux, disgracié, expose à la cholere du Ciel, & à la haine de Dieu. Si vous vous en rapportés à saint Hierosme, il vous dira pour confirmer cette pensée, que Iacob & sa lignée, en consequence de cette faueur diuine habiterent la terre de promission, & Esaü au contraire avec ses descendants les deserts & les montaignes rudes, aspres & infertiles. Mais nous pouuons dire dauantage & mettre en auant que l'amour que Dieu eut pour Iacob, se doit entendre de cette grace qu'on appelle efficace, dont Esaü demeura priué, sans qu'il eut droit de s'en plaindre, puis qu'il ne l'auoit pas merité. Et parce que les choses paroissent d'auantage par l'opposition de leurs contraires? Iacob qui de soy n'en estoit pas plus digne que son frere, ayant reçu de Dieu cette faueur comme elle a esté appelée tesmoignage d'amour; la priua-

tion de cette grace a esté nommée courroux, indignation, haine; Quoy que vous n'ignoriez pas que Dieu est affranchi de toutes passions; & que de toutes les choses qu'il a faites il n'y en a pas vne qui puisse deuenir l'obiet de sa haine; Car elles seroient toutes parfaictemēt bōnes, si le peché qui est le bel ouurage de nos mains & de nostre esprit, ne les auoit toutes defigurées. Il ne faut donc pas se persuader que l'amour & la haine en la personne de ces deux freres, se puissent entendre de cette predestination ou reprobation dont nous auons cy-deuant parlé, mais seulement de la grace, efficace ou de la priuatiō d'icelle, & laquelle personne ne peut meriter de soy par les œuures simplement morales & naturelles. Elle depend immediatement de la misericorde de Dieu, qui la distribue a qui il luy plaist, sans qu'un autre ait raison de s'en formaliser? il ne faut donc pas se persuader que la reprobation d'Esau, se puisse entendre d'autre chose que de ceste grace, & non pas de la gloire eternelle: A laquelle nous sommes appellés par les bonnes œuures animes du feu de la charité. De sorte que nous pouuons dire, qu'il y a deux sortes de predestination qui ne doiuent point estre confonduës? L'une qui regarde la grace preuenante & efficace qui vient de Dieu, & se distribue sans aucun merite? L'autre qui se rapporte a la gloire, laquelle d'ordinaire n'a son fondement que sur le merite de nos bonnes œuures, assorties & accompagnées de la foy & de la charité? Et partant qu'il y a deux sortes de reprobation, l'une la priuation de la grace efficace, l'autre la priuation de la gloire: Et c'est de la premiere seulement que doit estre

expliqué le passage conceruant ces deux freres, & les autres semblables, comme lors qu'il est parlé du potier, lequel d'un meisme argille, & d'une meisme terre peut faire vn vaisseau d'election & d'honneur pour seruir sur le buffet pour estre paré de fleurs, & vn autre pour les vsages les plus vils & les plus mesprisables.

Les Pelagiens tenoient faussement que par le seul merite de nos œuures moralement bonnes nous pouuions meriter vne grace suffisante pour nous conduire a la gloire eternelle. Parce qu'il ne suffit pas de bien faire, comme de donner l'aumosne, de ieusner, ces actions doiuent estre aussi accompagnées de la foy, de l'esperance, de la charité par le moyen desquelles nous nous conuilions la grace suffisante & efficace, & par celle-cy en quelque façon la vertu de la perseuerance qui nous conduit en cette bonne compagnie iusques a la fin desirable. En effect la nature toute pourrie & infectée par le peché, panche tousiours vers le neant, & ne peut rien produire de foy qui soit iustificiant sans l'aide & le secours de cette rose surnaturelle qui luy donne vne nouuelle vie, & luy communique la vertu de germer, & produire par le moyen des vertus Chrestiennes, cette belle fleur que nous auons appellé grace suffisante. La grace d'oe qui nous releue du borbier, qui nous ouure, facilite, & applanit le chemin a la gloire! est le domaine & l'heritage de Iesus-Christ. c'est celle dont parle S. Paul si souvent, & de laquelle Dieu dispose coume il luy plaist. S'il nous presente la main pour nous releuer du precipice où le peché nous auoit attiré, c'est vn effect de sa misericor-

de? S'il nous y laisse croupir, & qu'il se rapporte a nostre industrie & nos propres forces de nous en sortir, c'est l'effect de sa iustice: il n'y est point obligé! il se faut donc efforcer; Trauailions de nous mesmes; mettons nous en besoigne; quoy qu'il face, quelque rigueur que sa iustice exerce sur nous, elle n'endommage iamais la piece de nostre salut? nostre volonté n'en est pas moins libre. Il est vray qu'il a remply le Ciel de beaucoup de personnes qui ne l'ont merité que par la grace, que sa misericorde à pris plaisir de verser prodigalement sur leurs testes: Mais il ne se trouue point qu'il en ait iamais condamné vn seul, qu'avec bonne & iuste cognoissance de cause, comme dit S. Agustin. *Bonus est Deus iustus est Deus; potest sine bonis liberare quia bonus est, non potest sine malis operibus damnare quia iustus est.* Et qu' auparauant la multitude des offences n'ait accablé le pecheur, & rendu la misericorde de Dieu inutile & infructueuse. S'il nous a reprouué de toute eternité, ce sont nos crimes qui ont esté les auteurs & les iuges de cette reprobation; il n'a fait qu'en prononcer le decret & la sentence: c'est nous mesmes qui l'auons escrite & formée en caractere si gros & si lisible qu'il n'hezite point en cette prononciation. Ou sera donc nostre refuge? quels reproches alleguerons nous contre des preuues si conuinquantes? Qui sera celuy qui vueille contester contre son propre escript, lors qu'il le verra en la main de son Dieu? Quels moyens de faux pourra-il proposer contre vne piece si claire & si euidente? Aura-il pas bien plustost faict de prononcer soy-mesme son arrest de mort, d'attirer sur sa teste coupable toutes sortes

toutes sortes de maledictions , & conjurer les montagnes de l'accabler pour se metre à couuert pour iamais de la presence de son Dieu , & de l'horreur de ses crimes.

## SECTION DERNIERE.

### De la Raison & de la Foy.

#### PARTIE PREMIERE.

*Qu'il y à pareille difference entre la Raison & la Foy, qu'entre la Lune & le Soleil: & qu'il se faut servir de la raison comme d'une chandelle, ou de la clarté de la Lune pour affermir une mauvaise veüe.*

**E**Ncore est-il bien iuste de faire quelques ciuilités à la Raison, qui nous a entretenu le moins-mal qu'il luy à este possible des plus hauts misteres de nostre Religion, & ne se point separer d'elle sans honnesteré & sans compliment. C'est elle qui nous met la Couronne sur la teste en la Republique du monde, par elle nous assujetissons à nos loix toutes creatures viuantes , & par elle encore nous deuenons les maistres de nous mesmes & les Roys de nos passions: qui est à mon aduis le plus haut degre de

Y

souueraineté qui nous puisse moralement tomber en la pensée. Que si ie m'eschape contre elle quelque fois, c'est lors seulement que ie la considere aupres de la Foy, & qu'elle veut entreprendre de marcher coste à coste de cette diuine Princeſſe, parce qu'en cet eſtat, quelques charmes & quelque teint vermeil que la Nature luy puisse donner; elle deuient si paſſe, si languissante & si deſſaite, qu'elle fait pitié & n'est quasi plus ſupportable. Il me ſemble à la bien examiner que nous ne la ſçaurions mieux comparer qu'à la Lune: Elle naiſt & fort peu à peu du ſein de l'obſcurité, elle à ſon Croiſſant & ſon période auſſi bien que cet aſtre. Et comme celuy-cy au plus haut point de ſa clarté ſe rend fauorable aux Voyageurs, & reſpand meſme aſſés de iour dans vne claire nuit, pour faciliter entre les hommes quelque eſpece de commerce. La Raiſon tout de meſme parſeuenue à ſon période dans le pelerinage du monde, nous donne de belles lumieres, mais vn peu confuſes. Elle nous peint toutes choſes à ſa mode, c'eſt à dire d'vn coloris aſſés rude & obſcur quoy que agreable. Enfin ſi vous la conſiderés dans le plus haut point de ſon exaltation, vous trouuerés qu'elle ne laiſſe pas d'auoir ſes taches & ſes deſſauts, & d'eclipſer encore quelquefois auſſi bien que la Lune. Teſmoins ces grands eſprits de l'Antiquité, qui pour n'auoir eu uſage d'autre clarté que celle de la raiſon, ont touſiours imprimé dans leurs eſcrits quelques marques de ſon deſſaut de lumiere. Nous ne laiſſons pas toutesſois d'en receuoir vn grand ſecours: Car comme le mouuement de la Lune eſt neceſ-

faire pour l'agitation & vicissitude continuelle des generations & alterations qui se forment au monde sublu-naire. La raison pareillement ne l'est pas moins en la conduite de nos mœurs, au repos des familles & à la conseruation des estats qui se meuuent & ne se remuent que par ses influences: le veux dire les Loix qui nous sont prescrites par la raison. On dit que ceux qui ont languy vn long temps dans les cachots, priués du iour & de la lumiere, s'ils sont exposés tout à coup a la clarté du Soleil ils deuient esbloüis, & courent fortune de perdre la veüe. Nous pouuons dire le semblable de ceux qui languissent dans les tenebres de l'Atheisme, ou qui se nourrissent dans l'infame obscurité de l'impieté. Si ce n'est vn coup de la main de Dieu ( auquel tout est possible) il ne faut pas se promettre de les tirer de ces cachots profonds & obscurs pour les exposer d'abord a la grande clarté de la foy: Et c'est en ce cas que Dieu veut bien qu'on les soulage, & que par l'aide de la raison naturelle, comme vne autre Lune naissante, lors qu'elle commence a poindre, on les accoustume de supporter peu a peu, & selon les degres de son accroissement, les rayons qu'elle multiplie de iour à autre iusques au plus haut degre de son exaltation; afin que leur veüe s'estant ainsi affermie, avec le temps elle puisse acquerir les forces qui luy sont necessaires pour marcher de iour & enuisager le Soleil de la Foy, qui brille d'une clarté toute diuine. En effet l'ame du iuste neglige tous les aduantages de la raison: & quelques offes que celle-cy luy fasse de l'es-leuer sur les es-paules iusques au trosne de la diuine ma-



jesté, elle desdaigne modestement son foible secours, & trouue dans les secretes pratiques de la foy, des lumieres bien plus seures, & plus clair voyantes. En cette desmarche nous la pouuons comparer à cette Dame dont il est dit en la Saincte parole, qu'elle estoit reuestuë du Soleil qui luy seruoit de coiffure & d'embelissement, que sa face majestueuse estoit toute rayonnante de gloire: & qu'elle auoit la Lune sous les pieds; puisque l'ame fidelle ne se pare le chef que de la Couronne esclatante, & des pretieux ornements de la Foy: Qu'elle marche glorieusement en cet estat, & foule aux pieds tout le secours & l'assistance qu'elle se pourroit prometre de la raison naturelle.

---

## PARTIE DEUXIESME.

*Qu'il est ordinaire à Dieu de se seruir des choses  
les plus foibles pour en faire les plus  
grandes merueilles.*



IEU est vne bonté si merueilleuse qu'il nous presente vn nombre infiny de voyes pour nous esleuer a luy. Les vns s'y acheminent quelquefois par le desespoir, & le desplaisir qu'ils ont de suruiure a vne disgrâce, a vne perte de biens. d'autres par la crainte de l'aduenir, & des effroyables douleurs qu'ils presentent estre préparés a leurs crimes. D'autres par la speculation des choses naturelles, & la ne-

cessité que la raison produit des mysteres de la Religion. Mais entre tous Dieu chérit & fauorise d'auantage celuy qui par vne profonde humilité & profession de foy toute pure, & toute simple, se rend le sectateur de ses loix, & le fidelle obseruateur de ses mandemens. Examinés la force des raisons toute nuës, & ne considérés la mediocrité de ma condition, ny celle de mon esprit: & souuenés vous que les operations de Dieu sont inerueilleuses: ses moyens sont tous particuliers, & d'ordinaire opposés à la prudence des hommes. Pour donner vn Prince à son peuple; il ne le va pas chercher dans la Cour des grands: il ne prend point de Philosophie ny de Legislateur pour le commander: il le choisit au milieu des troupeaux, & des gens grossiers & rustiques; il le tire de l'estable, de la bouë & de la lie du peuple pour l'esleuer à ce trosneroyal. Il ne se sert pas tousiours de la masse d'Hercule pour deffaire les monstres. Il n'employe que l'effort d'vn petit Berger pour la defaite d'vn geant & la ruine des Philistins. Nostre Histoire nous fait voir qu'vne simple Bergere a redressé la Couronne toute panchante, & la remise sur la teste de nos Roys, dans la plus forte tempeste, pour arrester sur mer le plus puissant Nauire, il ne faut que l'effort d'vn petit poisson, vn peu plus grand que le doigt: Et pour renuerser des montaignes & des villes entieres, il suffit d'vn peu d'air & de vent contrainct & renfermé. Mais pour confondre la sagesse mondaine, & assuiettir les Empires, Dieu à-il choisi d'autres personnes que des gens simples, & d'vne condition vile; entre les mains desquels il a depesé la force, la sa-

pience & l'autorité des miracles? Dieu refusoit des signes de sa diuinité à ceux qui les demandoient, parce qu'il cognoissoit leur endurcissement. Vostre curiosité fait aujourd'huy la mesme requeste: Vous demandés des raisons naturelles ou il ne faut que la foy, & l'usage des vertus Chrestiennes. Dieu suscite la moindre de ses creatures pour vous en marquer aujourd'huy dans ce discours plus qu'il n'en faut pour vostre satisfaction: ne les negligés pas, faites en vostre profit: Et croyés que si elles ne produisent en vous & en vostre amy l'effect que ie desire, que ce n'est pas à leur foiblesse, qu'il s'en faut prendre: & qu'elles n'ont que trop de vigueur & de force pour vous conuaincre.



## PARTIE TROISIEME.

*Que pour bien iuger des differentes conditions, il les faut esprouuer: & que la plusspart des hommes abusent des richesses de l'esprit, comme des biens de fortune.*



N vn mot pour bien iuger de quelque condition que ce soit, il la faut esprouuer: & le plus grand deffaut que ie trouue en la conduite des hommes, c'est qu'ils viuent comme des plantes attachées par le pied a vne sorte de condition: ils semblent qu'ils y ayent pris racine. Quelqu'un s'attache-il à vne charge: il y entre ieune, & n'en sort point, qu'il ne luy rende par deuoir les derniers soupirs de sa vie. Est-il besoin de s'aquerir le tiltre de fidelité aupres d'une Dame; il la faut adorer iusques à ce que les defauts de sa vieillesse vous fassent peur. Nostre profession est tousiours la meilleure: & quoy qu'elles nous pèsent bien souuent, iusques à la quereller & iniurier: nous sommes si lâches, que nous n'oserions quitter prise à la mode des forçats qui accouquinés dans vne Galere, apres auoir acheué leurs temps n'en veulent plus sortir. Essayés vn peu du changement: faites pour le salut de vostre ame, l'espace de deux ans, ce que vous aués fait le reste de vostre vie pour la perdre. Et apres tout que vous peut-il

l'inegalité, la vanité disposent de leurs mouuements interieurs: ou s'ils tiennent compte des vertus, c'est pour en discourir de la mesme sorte, que de la republique de ce grand Philosophe, ou del'Orateur de Ciceron! En vn mot d'vne chose qui ne sera iamais qu'en idée & en peinture. Les autres les prodiguent à de folles despences: à corrompre par flatteries les bonnes mœurs d'un grand, dont ils ont l'oreille fauorable, à parler contre Dieu, & empoisonner l'esprit des ieunes gens d'atheisme & d'impiété, & seduire la foiblesse de l'esprit d'une ieune fille, qui à peine de se deffendre de la bonne opinion qu'on luy fait conceuoir de sa beauré qu'elle regarde en son miroir, & accuse comme criminelle, si elle ne se haste de confier à vos plaisirs la perte de son honneur & celle de sa conscience. C'est pour vous de grandes trophées, & des victoires de consequence: comme si c'estoit vne grande merueille, de tromper le mauuais soin d'une mere, s'assubietir vn ieune courage, & vaincre la resolution d'une fille, qui en ce ieune âge n'en a gueres que pour se destruire: & qui encores a plus de peine de resister aux efforts de ses propres desirs, qu'à la violence & à l'adresse de tous vos artifices.

Z

## PARTIE QUATRIESME.

*Que les estoiles sont plus brillantes aupres du Soleil, que les meilleurs esprits de nos libertins, n'ont d'éclat aupres des Saintés Peres de l'Eglise: Et que ces grands personnages, par la consideration de l'intérest le plus aduantageux ont suuy le meilleur party.*

**N**E vous persuadés pas que j'ay esté moins curieux que vous, de rechercher la tranquillité de la vie, & la solidité des plaisirs qui s'y peuvent rencontrer. Si j'auois employé autant de temps au soin de m'enrichir, ou d'aduancer ma fortune, elle seroit peut-estre plus aduantageuse qu'elle n'est: mais j'en suis satisfait. Le temperament chaud & sec, duquel ie suis, me donnent assés d'inclination à l'ambition, à l'amour & à toute sorte de passions aigües. La curiosité de sçauoir & cognoistre la verité, a faict plus de la moitié de ma vie: la meditation à eu plus de part en mon estude que les liures; & ce peu que j'en ay veu m'a plus instruit le iugement, que remply la memoire: de sorte que ie n'en suis point embarrassé, & ne dois qu'à la raison ce peu de cognoissance que j'ay de la nature. Pour auoir esté nourri, & eleué dás la delicatesse de la Cour: n'estimés pas que ces plaisirs soient si rares qu'ils nous soient in-

cogneus. Je n'ay pas vescu iusques à présent dans vne si grande obscurité, que ie n'aye haleiné la Cour de trois Princes, aussi grands qu'il y en aïen la Chrestienté, & avec quelque sorte d'employ: & que ie n'aye fort bien remarqué, que hors quelque legere apparence d'agréement, le reste n'est qu'une carcasse couuerte d'une peau bien mince & bien delicate, qui n'a pour embonpoint, que le vent dont elle est toute boursoufflée: & pour beauté, qu'un peu de fard & de fausse couleur. Mais pour terminer ce different, voyés la suite des temps qui a produit un nombre de grands & Saints Personnages, qui n'ont pas moins signalé leurs siecles, par la sainteté de leur vie, que par l'eminence de leurs escripts & de leur doctrine. Un S. Paul, un S. Hierosme, un S. Augustin, auoient-ils moins de cognoissance du monde, qu'un tas de ieunes gens qui se figurent en cognoistrelles delicatesses, & posseder un haut degré de science, pourueu qu'il vous payent d'un *est-il possible! Il n'est pas croyable.* Vous persuadez-vous que ces Saints Personnages n'ayent pas esté autant amoureux de leur interest, que vous le pouuez estre du vostre. Pour scauoir s'ils estoient aussi capables de le cognoistre, & de le choisir que tous ces libertins: ie m'en rapporte à ceux qui en peuuent faire la difference. Et à vray dire le raisonnement & l'esprit de ces ieunes gens est si foible, à comparaison de ces merueilles de nature, qu'une estoille respand plus de iour, & luit d'auantage aupres du Soleil, que ces petits feuz follets n'ont de clarte, aupres de ces grandes lumieres: dont la force de l'esprit est si vigoureuse, l'erudition si puis-

fante, & les pensées si esleuées qu'elles ne souffrent aucune atteinte de leur conception puerile, & eschappent facilement à la mauuaise veüe de ceux qui bornent leur cognoissance & leur volupté, dans la mesure & l'estendue de leur sens. Pour estre estimés grands personnages, il suffit qu'ils ayent mis le nez dans Charron : & qu'en deux ou trois soirées ils ayent appris à parler hardiment de la Religion, & des choses diuines. Ce n'est pas que i'entreprenne de blâmer ses intentions, que ie veux croire auoir esté aussi saintes, que sa profession : Mais il faut que i'aduoue que ie suis estonné de ce qu'on à permis que ce Liure (par la facilité de son debit) soit tombé entre les mains de tout le monde : iusques aux femmes & aux filles : sa lecture a mon aduis est de telle consequence en vn foible esprit, ignorant ou malicieux : qu'elle est capable de le faire eschapper en mille impietés. C'est vn cousteau bien tranchant, qui entre les mains de celuy qui ne le sçait pas manier, le coupe, & le blesse bien plus souvent qu'il ne luy sert. En effect ostés aujourdhuy la lecture de la Sagesse de Charron, à tout ce qu'il y a d'impies dans la Cour, & vous n'y trouuerés de reste qu'un libertinage affecté, & vne ignorance toute pure.



## PARTIE CINQVIESME.

*Qu'entre les hommes il y a trois sortes d'esprits: dont les premiers & les derniers sont tousiours d'accord. Les impies sont du moyen ordre, partant incapables d'obeir n'y de commander.*



Ntre les hommes nous ne pouuons bonnement remarquer que trois estages d'esprits, entre lesquels ceux du moyen sont d'ordinaire de pire condition que les deux autres. Des premiers les vns pour estre de grands genies, par vne viuë lumiere de l'esprit, ont enuysagé la verité, & se sont rendus capables de la cognoistre, & de nous en donner de notions, sur lesquelles les loix Morales & Politiques ont esté establies. Les autres pour auoir esté illuminés de de la Toute puissance de Dieu, ont receu dans leur sein les lumieres diuines, qui y ont esté enuoyées comme pour y prendre corps & s'y affeubler de quelque voisle ou vestemens pour se proportionner par ce moyen aucunement à la foiblesse de nostre veüe, en se communiquant a nous: soit en la publicatiō des saintes loix, soit en l'interpretation des volontés diuines. Ces Saincts Personnages estoient entre Dieu & les hommes, ce que la region de l'air est entre nous & le Soleil. C'est vne eau rarefiée & bien estenduë qui tempere l'ardeur de ses rayons, & nous

lestend plus supportables. Les plus foibles & ceux du dernier estage se rencontrent tousiours dans la voye la meilleure: parce qu'ils se cõtètent de suiure ce qui leur est prescript. Il n'y à que ceux qui se trouuent au second estage qui sont à plaindre: en ce que, pour estre trop foibles, & ne pouuoir suiure le train des premiers; ils sont incapables de commander; & pour estre vains & glorieux refusent d'obcir, & de suiure comme les autres. Ils mesprisent ceux qui cheminent, sans s'informer ou ils vont: ils feroient trop empresseés, s'ils marchoient en troupe: ils veulent vn chemin particulier, & enyurés de leurs folles pensées vont tousiours chancellants. Enfin ce sont des meteores, qui se formét en cette moyenne region, comme des nûes sans eau, batûes & agitées de tous vents. Des feux de nuit, des fausses estoilles: ce sont des vaisseaux vuides abandonnés & destitués de Pilote en plaine mer, qui vont flottant çà & là au gré des vents & des ondes. Bref ils se portent en toutes choses d'une demarche mal assurée: ils ne sçauent que fuir ou que suiure; ce qu'ils approuuent maintenant, ils le condamnent deux heures apres: & n'ont rié de stable, certain & assuré qu'une perpetuelle agitation, inquietude & legereté d'esprit. Pourueu qu'un vers bien poly, une lettre bien limée eschappe de leur plume: qu'ils iugent de la beauté d'un Romant, de la douceur de son stile: qu'ils ayent assés d'assurance pour faire les mauuais, & debiter en la compagnie des femmes, qu'ils ne craignent gueres les menasses des Predicateurs; & que par la nouueauté de la chose, ils tirent de l'admiration du sexe le plus timide,

les voila satisfaits. Suiués-les iusques chés eux dans leur cabinet, dans le secret de leur conscience, dans la solitude, ils ne tardent queres à s'en desdire. Entendent ils vn coup de tonnerre: se trouuent-ils en peril: la fiebure où la crainte de l'aduenir, heurtent-elles vn peu rudement à leur poitrine: au premier coup vous les voyés pâlir, trembler & desmentir par leur contenance effrayée leur vanité, leurs paroles & leurs sentiments; semblables à ces valets & mauuais seruiteurs, qui ne se laissent point obliger à la douceur, ny à la bien-vueillance: & ne se souuiennent iamais de leur deuoir, que lors qu'ils voyent le baston en la main de leur maistre. Ils sont incapables de vertu & de cette glorieuse estime que nous conceuons des belles choses, & par laquelle sans autre interest, que celluy de la beauré, & du merite qui s'y rencontre, nous aymons & cherissons la diuinité, & tout ce qui nous est présenté de sa part. Vne prosperité mediocre leur enfle le cœur, & par vne bouffée de vent extraordinaire qui les esleue dans le vague de leurs foibles imaginations, ils foulent aux pieds les misteres des choses diuines. L'affliction au cōtraire, l'aduersité, ou la maladie les effemine, & les rend si lasches, qu'ils tombent en vn moment, ou dans la superstition, ou dans le desespoir. Considerés leurs forces: vous les trouuerés despourueus de toute vigueur. Ils sont comme ces bonnes mesnageres, qui s'occupent à espargner cinq sols, & ne se mettent pas en peine d'vne affaire de mille escus. L'esprit de l'homme à decertaines proportions qui correspondent à sa force & à son estenduë. Est-il question de cent pistolles: y va-il

de vos appointements, de vos pensions, de vos interets: Il faut troubler le repos de la republique, interrompre le sommeil, marcher de nuit comme de iour, abandonner les heures du repas, employer tous ses amis, flater & idolatrer ses ennemis pour en venir about. Est-il question du salut de vostre ame, des pensées de l'eternité, de l'amour que vous deués à Dieu, & de celluy que vous debués à vous mesmes; Vostre veuë est trop courte, elle perd en ce rencontre les proportions, & les mesures. On aura bien tousiours loisir d'y penser, me dites vous: C'est la derniere affaire ou il faut mettre ordre. Quand la maladie vous arrestera dans vn lit, que le desespoir aura ruiné la science de vos Medecins: qu'il vous faudra enfin abandonner vos plaisirs, vos biens, vos amis, & vos infames diuertissements: Il sera temps pour lors de composer avec Dieu, encore vous sera-il fort obligé de ce miserable reste vie, que vous luy consignerés entre les mains: Dans vn temps peut-estre, ou vostre raison sera si foible, vostre courage si abatu, vostre cœur si lasche & si deffait, & vostre pensée si languide, qu'elle n'aura pas la vigueur de s'enflammer, ny d'allumer en vostre miserable poitrine vn bon remords de conscience. Pourquoy, me dirés vous? tant de charmes dans le monde: à quoy tant de mets si delicieux, & de fruits si agreables, si ce n'est pour s'en seruir. Je vous responds à cella, que vostre vertu auroit bien peu de merite, si iamais elle ne venoit aux prises avec les ennemis. Qu'auroit seruy la liberté que Dieu a donné à l'homme, comme vne marque de la diuinité entre les Creatures, s'il ne luy

luy auoit donné quand & quand le moyen facile de se perdre ou de se sauuer. N'auroit-ce pas esté vn deffaut en la diuinité, de faire vne creature libre, & ne luy laisser pas la faculté de choisir, de prendre, ou de refuser. Il falloit donc que la tentation fut introduite dans le monde pour l'employ de nostre liberté, & de nostre vertu. Vous auez donc mauuaise grace, de quereller à toute heure les doux attraits d'une icune beauté; s'ils vous charment, ils font leur deuoir: pensés de mesmes à faire le vostre, qui est de les repousser genereusement, & de les mespriser. Soyés aussi soigneux & diligent de vous acquiter de la charge à laquelle vous estes appelé, qu'ils rendent d'obeissance au commandement qui leur est prescrit.

## PARTIE SIXIESME.

*Que la Foy à ses beautés & ses charmes, & que  
l'impie ne peut cognoistre l'estat paisible  
de l'ame du Iuste.*



Haque chose à ses beautés & ses deffauts: vous ne cognoissés que trop les deffectuosités qui se rencontrent en la iouyssance des plaisirs mondains: Il est inutile de vous en discourir; Mais parce que vous considerés le mystere de la Foy comme vne montaigne herissée de toutes parts, aspre, rude & de difficile accès; qui n'a en son abord, ny

A a

en sa planure aucun agrément ny beauté: Treuues bon que ie vous marque quelque chose de ses aduantages: & qu'on vous face perdre la mauuaise opinion que vous en aués. Il est vray que la profession de la Foy à cela, qu'elle montre d'abord toutes ses espines: mais à la continuë, vous ny rencontrerés que des Roses. Elle à ses beautés, & ses charmes cachés & peu communicables, qu'à ceux qui la pratiquent: Les douleurs, les afflictions, les tribulations heurtent elles à vostre maison; vous leur ouurés la porte, les receués gayement & d'un visage content & satisfait. Ce sont des messagers de vostre maistre, qui vous viennent entretenir du soin qu'il à de vous conseruer, de la crainte de vous perdre, & de la curiosité d'esprouuer, si l'amour que vous aués pour luy à de bonnes racines: & si la tranquillité & le repos d'une vie trop longue & trop paisible, n'est point capable de l'alterer & le corrompre. Que si les peines plus rigoureuses, qu'une ame iuste souffre pour son Dieu, luy sont si agreables: L'amour ayant cela de propre qu'il applanit les voyes pour aspres, rudes & difficiles qu'elles puissent estre, & les rend agreables pour paruenir à son but. Jugés par comparaison des charmes & douceurs qu'il communique à l'ame du iuste, dans le repos continuë de sa conscience, dans l'entretien de son Dieu, dans les rauissements de son amour, & la participation ineffable de la gloire de son maistre, qu'elle apperçoit dans ses plus secrets mouuements. Ne vous persuadés pas aussi de faire tout ce chemin en peu d'heure: Vous ny arriuerés pas en vn iour, il est long, penible & laborieux.

La plus courte voye, qu'on vous puisse enseigner, est de se retirer d'abord aux deserts, & à la solitude. Tant que vous souffrires vos entretiens & vos diuertissemens ordinaires, n'esperés pas d'en venir a bout. Cette solitude se trouue partout: Vous la portés quant & vous, si vostre resolution est assés noble pour former ce genereux dessein; ne craignés plus ces objets effeminés! qu'ils fassent apres tous leurs efforts; qu'ils vous frappent l'aveü; que ces discours accoustumés vous touchent l'oreille, ils demeureront à la porte & ne feront plus d'impression en vostre cœur ny en vostre pensée. Aurés vous vne fois banny & retranché de vostre ame tous ces vices mal-heureux, dont elle estoit auparauant infectée: Vous en pourrés faire aisément vn desert profitable, dans lequel vous vous retirerez quand il vous plaira; & ny receuerés pour compagnie que vos saintes pensées & pieuses Meditations. Quoy qu'on vueille dire, nous n'auons pas moins de disposition au bien qu'au mal. nous sommes composés de deux pieces: le materiel & spirituel, qui sont dans vn tel équilibre, qu'il depend de nous de faire pancher la balance du costé qu'il nous plaist: Elles s'eleuent ou s'abaissent en nous selon le poids & le mouuement que nous leur donnons. Si vous iettés les yeux sur ceux qui sont habitués dans le vice: il semble que les puissances de l'esprit soient entiere-ment esteintes en ces sortes de gens; tant ils sont assoupis dans ceste lethargie. Et si vous entrés dans les cloïstres & l'escole de la pieté, vous y trouuerés les puissances de l'esprit si viues, & si entieres: que ce qu'il

A a ij

y a de materiel est deuenu paralytique, & n'a plus de mouuement : il ne fait plus de rebellion à l'esprit, en effet ils ne se querellent plus. Car le combat ne s'esmeut ordinairement, qu'entre les contendants qui se treuuent d'une pareille force, ou à plus près. Tesmoins les animaux les plus farouches, qui hors la necessité d'une extreme faim, desdaignent de se commettre avec les plus foibles, & ceux qui leur paroissent estre inegaux en force & en vigueur. La difference de nos deux contestants est, que le materiel quelque soyn qu'il ayt de nous plaire, ne donne iamais assés par son impuissance, ou donne trop & deuiet enuieux par une satieté importune. Le spirituel au contraire comble vostre cœur de ioye & de satisfactions continuelles, remplit toute l'estenduë de vostre ame de benedictions & de flammes innocentes, qui nous expliquent par leurs presences le lieu d'ou elles viennent; Et comme elles charrient & entraînent tousiours quelque chose de misterieux, & qui se ressent de la qualité veritable de sa diuine source & premiere origine.



## PARTIE SEPTIESME.

*Que Dieu à plus cheri, les pecheurs conuertis que  
les autres: Et que la raison enfin nous doit  
consigner entre les mains de la foy.*



E vous rebutés pas par la difficulté de l'entreprise, & persuadés-vous, que si vous fondés vos forces, vous les trouuerés plus vigoureuses que vous ne penses estre. Vous estes de ceux qui sont capables de beaucoup de bien ou de beaucoup de mal. La Cour ne fait cas de vous que par les bones qualités, que la nature vous à données & dont vous rendrés compte vn iour; puis qu'au lieu de les sacrifier à Dieu, & aux soings de vostre salut, vous les arrachés de dessus l'autel, pour les respan dre inutilement dans le monde, & sans autre esperance de fruit, que d'un peu de fumée & de vent, qui se dissipera avec le dernier de vos iours. Que si vous ne vous haltés encore, de banir de vostre cœur & de vostre pensée toutes ces ieunes beautés qui luy donnent tant d'alarmes, vous courés fortune d'en estre mesprisé deormais. Contentés-vous de leur auoir donné vos plus belles années: le reste commence à s'esuenter, il ne sent tantost plus que l'aigre & le moisi. Dieu qui vous les a donnés pour sa gloire, & non pour celle des creatures est prest

d'en receuoir les misérables restes, & de vous en sçauoir encore beaucoup de gré: vn âge meur, vn sang temperé, & vne raisonnable experience des choses, telles que vous vous estes acquise est bien profitable entre ses mains. C'est vne merueille que Dieu ait plus chery les pecheurs conuertis que les autres. C'est par eux qu'il a fait les grands coups d'estat dans l'Empire de l'Eglise. Vn saint Pierre, vn saint Paul, vn saint Augustin, vous en peuuent rendre tesmoignage. Il y à plus de force à se releuer estant tombé sur le panchant d'vne montagne roide & difficile, & regagner à force de bras & de mains le petit sentier & chemin battu; qu'à marcher plainement, & sans choper iusques au bout. Il y à plus d'adresse au Medecin de guerir vn malade, que de continuer la santé à celuy qui se porte bien. Les hommes sont amoureux de leurs ouurages, & principalement lors qu'ils leurs ont cousté beaucoup de peine. Le pecheur conuerty est l'ouurage de Dieu: c'est le fruiet arrousé de son sang, c'est l'enfant de son Martyre & de sa Croix: iugés s'il en doit faire estat. Et c'est par ces raisons, que nous pouons certainement comprendre, pourquoy Dieu a faict tant de cas de s'acquerir vne ame peschereffe. Il y à plus de difficulté de blanchir le mouchoir qui sera tombé dans la fange, dans l'enguent & dans l'ordure; que celuy qui se sallit entre nos mains. La Couronne, le Sceptre & le trophée de nostre Maistre, n'ont pour ornements & pour pierreries, que les pechés qu'il a surmontés & menés en triomphe dans le Ciel. Bref ils sont aussi glorieux & adorables sur sa Croix, qu'ils sont infames & detestables dans l'ame de l'homme.

Qu'il vous fuffie donc que la raifon naturelle vous ait mené par la main iufques au pied del' Autel: qu'elle ait arraché le voifle qui vous faifoit paroître ces mifteres fi obscurs, & fi confus. Sa charge eft finie, elle vous refigne maintenant entre les mains de la foy: qui eft vn Officier dont la dignité eft bien plus releuée. Il entre dans le cabinet de fon maiftre, il garde la porte: Vous ne fçauriés y auoir d'accés que par fon moyen. La raifon vous à promené dans les iardins, dans la baffe-cour & dans la falle de ce beau Palais; Elle vous à conduit par tout iufqu'à la Chambre de prefence où repose le Seigneur, & faict fa retraite ordinaire. Elle heurte pour vous à la porte, & vous met entre les mains de ce fauory, qui feul à le pouuoir de vous prefenter à fon maiftre, luy rendre vofre perfonne & vos feruices agreables; & vous faire part enfin des lumieres, qui rempliront bien vofre penfée d'autres douceurs & d'autres fatisfactions, que toutes celles que vous pouués attendre de la Raifon, de la Nature, du Monde & de vos Plaiſirs.

FIN.

A 21  
165h 021

$$\begin{array}{r} 73 \\ 12 \\ \hline 146 \\ 73 \\ \hline 219 \end{array}$$

$$\begin{array}{r} 73 \\ 11 \\ \hline 84 \end{array}$$

$$\begin{array}{r} 264 \\ 434 \\ \hline 698 \\ 71 \\ \hline 769 \end{array}$$

$$\begin{array}{r} 277 \\ 77 \\ \hline 354 \end{array}$$

— ad. fund —

$$\begin{array}{r} 25 \\ 13 \\ \hline 38 \\ 26 \\ \hline 64 \end{array}$$

Michael

Mickney

$$\begin{array}{r} 364 \\ 2912 \\ \hline 3276 \end{array}$$

— ad. fund —





